

# DIBUULULA DYÀ

## YESÙ KILISTÒ



Twasàkidila, wa manza tètè, Mwanètù Neville.

Nudi mwà kusòmbaayi.

<sup>2</sup> Ngeela meeji ne bàakamba musangu kampànda, ne: “Mvwa ne disànkà pàakangambilabò ne: “Tuye mu nzùbu wa Mukalenge.””

<sup>3</sup> Mpindyewu, nwatùfwilaayikù luse mutùdi katùyi ne myaba, anyi myaba yà disòmba, bwà bwònsò bàdi mwab’ewu aba, nènku pàmwàpa nebàvule mu lumingu lùlwalwà elu, bantu bààlwà, pùumvwàbò bwà masangisha aa.

<sup>4</sup> Kàdi kabingila kàà cikondo cyà pabwàci eci kàvwa bwà twamòna mwà . . . Nyumà Mwìmpè uvwa mutèeke didimwija dyà ditwishiibwa edi pa mwoyi wànyì, ne: “Bivwa bikèngela bwà Èkèleeziyà mu ditùkù edi kwikalaye ne Mukenji ewu.” Bwalu, ndi ngiitabuuja ne m’Mikenji yà mitàmbe kwikala yà pabwàyì yà Bible, bwalu yidi yibuulula Kilistò mu Èkèleeziyà Wendè pa dìbà edi.

<sup>5</sup> Nènku, muntu kèna mwà kwikala ne diitabuuja anyi kumanya cidìye wenza, anyi kuyaayàye to, ànu yèyè mwikale ne cikampànda, cintu kampànda cyà kushindikilayepu meeji èndè ne diitabuuja. Ki bwà cinyi, pàikalà Mufùndu mutùbuulwile Kilistò mu matùkù à ndekeelu aa, ne ngiikàdilù wa cikondo, mbifwànyìne kutwenzela bimpè bwà—bwà kuCikenketa ne kujandula ne tudi penyì.

<sup>6</sup> Mpindyewu, tudi—tudi tuumva bibì be mùdi èkèleeziyà wetù kàyì mutàmbe bunène to, dǐngà ditùkù tudi tutèkemena bwà kupeta wa munène.

<sup>7</sup> Nènku matùkù ànaayi a ndekeelu aa, nangàngà, a dilonga dyà cyòci eci pa citùpà cyà maalu malonda cyà—cyà Mukàndà wà Bwàkabuulwibwà, Ndi mukapone pa bintu bímvwà nciyi mwà kwela meeji ne bikaatukù byenzeke bulelèlè to. Nènku mbimfikìshe too ne—ne ku dyumvwa ne, paanyimà pàà *Bikondo Mwandamutekète byà Èkèleeziyà* ebi, mèmè mubijikije, Ndi njinga kwikala ne mulongolongo wa masangisha à mùshindù awu bwà kutwala “Èkèleeziyà mu—mulelèlè ne èkèleeziyà wa mashimi,” yònsò pàmwè, ànu mu maalu malonda ne mu Mifùndù. Byenze bu musangu kampànda wùntù muteeta, mu diyiiisha kampànda, bwà kwangata “Mvinyò mulelèlè ne mvinyò wa mashimi,” yidi yisanganyibwa mu Bible. Nènku tudi . . .

<sup>8</sup> Netwikale mwà kuteeta bwà kupeta ndambù wa nkwasà, pândi ngeela meeji bwà mùshindù wà bantu kusòmbabù apa. Nènku netùpete, netùteete bwà kupeta, ndambù mukwàbò wà nkwasà, bwà kuteeta kuuja bibambalu byà paanyimà ebi, ne pambelu, ne ndambù mukwàbò eku ne eku, bwà twamòna mwà kusòmbeshaku ndambù mukwàbò wà bantu mu masangisha aa.

<sup>9</sup> Mpindyewu, pa bwalu ebu, ndi muswè kulòmba muntu ne muntu wa kunùdi udi maalu aa makùngàme bulelèlè, mmufwànyine—mmufwànine kulwa díbà dyònsò ditwikalà mwà—mwà kuByùmvwija. Nènku ncyèna mufwànyineku kubanga to, anyi mwà ngeela meeji mèmè mwine ne... [Katùpà kàà mukàbà wà mèyi munda mutupu—Muf.] ... kubanga bwà... [Katùpà kàà mukàbà wà mèyi munda mutupu.] ... Mukàndà munène wà Bwàkabuulwibwà ewu wà... [Katùpà kàà mukàbà wà mèyi munda mutupu.] ... Bikondo Mwandamutekète byà Èkèleeziyà. Kàdi ndi ngeeyemena Nzambì ne mwanyì mwònsò, bwà—bwà kucimbuulwila pândi mfikakù.

<sup>10</sup> Bwalu bulonda bwà mu bufùki ebu, bwikale bwà... bwangacila kùdi bafùndi bàà maalu malonda bàà batàmbe kwikala bàà pabwàbù bándiku mumanye. Ndi mwadije mu bìrò byànyì mwàmwa, ànu mpindyewu ewu, mèyi a nsèka matwè ku ataanu anyì àsambòmbò, *Baabùlona Yibidi* wà Hislop, *Mukàndà Wà Bafwile Diitabuujà* wà Foxe, ne mikwàbò mikàndà minène; bu mùdi Nsangilu wa Kumpàla kwà Nicée, mikàndà mitwè ku yinaayi pa bwalu abu, mukàndà wònsò ne mabeji àmba kutwa ku nkamà yinaayi. Nènku mwaba awu Nsangilu wa Nicée, ne maalu malonda ónsò atùdi pèètù mwà kupeta awu. Bwalu, paanyimà pàà cyòci eci, kwangacila ku mukàbà wà mèyi, netùfunde dyela dyà nsèke pa Bikondo Mwandamutekète byà Èkèleeziyà, bwà kutuma pa buloba bujima, mutùdi mwà kukòkeshila pèètù amu, bwalu tudi mu matùkù à ndekeelu. Tukaadi ku cikondo cyà nshìikidilu.

<sup>11</sup> Kabuvwaku bwanji kungiimana ku mwoyi bikolè mùshindù ewu to ànu ku ma—masungulangana à ndekeelu aa, ne pashìishe mèmè kumòna mwaba utùvwà tusanganyibwa. Pashìishe ke Nyumà Mwîmpè kubanga kunsokolwela, bwà—bwà kudimwija bantu, ne kuteeka cyòci eci. Nènku ncyèna mwà kucyènza mu—mu èkèleeziyà bu nùnkù, mu mùshindù mukumbane to. Nènku díbà adi mèmè musòmba paanshi ne kudítwa ànu mu difùndà dyà mukàndà... Ndi ndyùmvwà ne bu mèmè mwà kufika ku cyambilu, ne disonsodiibwa dyà Nyumà Mwîmpè munkaci mwà beena Kilistò adi kulwadì pambidi pàanyì, bwà kunkwàcishakù, díbà adi ndi mufwànyine kutàmba kukumbana bwà kufùnda mukàndà awu pa díbà adi, paanyimà pàà mèmè mumane kubyàngàcila pa mukàbà wà mèyi, bwalu kwàka tudi bafwànyine kupeta disonsodiibwa dyàbi. Mikàndà, mu bushùwà bwà bwalu, neyìlongolodiibweku ndambù mu

mùshindù kampànda, bwalu, apa, tudi twamba bintu bitùdi katùyi mwà kufùnda mu mukànda to. Ne pashiishe tudi... Ne tudi tupicisha dîbà dipitepите búngi mu dyambulula bintu twètù biine, anyi ki muntù ngenza's. Ne pashiishe, mu mukànda, nebilongolodiiwbwè byònsò. Kàdi netùteetè bwà kubiteeka byònsò, ne mwètù pèètù mwònsò amu, pa mikàbà yà mèyi.

<sup>12</sup> Mpindyewu, mikàbà yà mèyi, dilòòlò dyònsò, maalu mafùnda à kubala ne bikwàbò, nsongàalùme ayi neyìkale naabi pambelu pàà nzùbu pàapa.

<sup>13</sup> Mpindyewu, ndi mwa kwikala ncìyi ne mùshindù dilòòlò dyònsò to, bu mutwängàci twètù biine dipangadika bwà kuteeta bwà butùmbi bwà Nzambi, bwà—bwà kutwàla Mikenji mwandamutekète yà èkèleeziyà eyi, anyi Bikondo Mwandamutekète byà Èkèleeziya, mu malòòlò mwandamutekète; kwangata dilòòlò dyònsò, cikondo cìmwè. Bu mùdi, mu dimwè dilòòlò, Efèso; mu dibiidi dilòòlò, Seemùnà; mu dísààtù dilòòlò, Pèegàmo; mu dînàayi dilòòlò, Twatilà; mu dítàànù dilòòlò, Saadi; ne mu diisambòmbò dilòòlò, Filàdelèfiyà; ne mu dyàlumingu mu dindà ne mu dyàlumingu dilòòlò, cyà Laòdikiyà, cikondo cyà èkèleeziyà citùdi ne mwoyi eci. Mfili maalu malonda à èkèleeziyà wa ku cibangidilu, ne—ne bafundi ne balongi bàà maalu malonda, ne banjelo bàà cikondo aci, ne—ne mikenji, ne lwendu lwà èkèleeziyà, mudiye mulwè too ne ku cikondo eci.

<sup>14</sup> Nènku bìdi bikemesha bwà kumòna mùshindù ùdi bwalu ne bwalu budyanjila kwamba bwònsò bwà Mufùndu awu bünwangana menemene ne maalu malonda, ànu menemene, ku meeji a cyòci aci. Civwa mene cinkèmeshe bikolè be, mu mùshindù wà ne, makèlèlèlè awu, mvwa mubale too ne pàmvwà ngumvwa byenze bu ne mèsù àànyi avwa mùle àmba kutaayika. Kì mèmè kupatuka e kwambila mukàjàànyi ne: “Kacya ncitu mwanji kwelaku meeji ne bìdi mwà kwikala mùshindù awu to.” Nwamònu anyi? Mùshindù mwine ùvwàbi bwalu bunène's!

<sup>15</sup> Nènku mpindyewu, misangu mikwàbò, ndi mwà kwikala ncìyi mufwànyine kucijikija dilòòlò dimwèpelè to, èkèleeziyà, mukenji wà èkèleeziyà. Nènku mèmè ncìyi mwà kucijikija, dilòòlò to, dîbà adi nèncijikije pààcyabu mu dindà dyàlonda pa dîbà dikumi jaajaaja. Nebàcìmanyishe dilòòlò dyònsò, kùdi aba bàdi baswè kulwa bwà kutèeleja citùpa cikwàbò aci, bwalu tuyààya, tuteeta, bwà kubikwàta pa mukàbà wà mèyi. Nèngenzè masangisha pashiishe kuumukila pa dîbà dikumi jaajaaja, mu dindà, too ne mu nkànkala, mundaamuunya, bwà kuteeta kuwutwala, citùpa cikwàbò cyà mukenji aci, bwalu bàdi mwà kuwùkwàta pa mukàbà wà mèyi. Kabiyi. . .

<sup>16</sup> Tudi bamanyishe ne kakwàkwikala masangisha à dyondopa to, bwalu tudi tuteeta kushàala mu cipaapu cyà cipròfetà cyà mu

Bible. Dîbà adi, tudi benze disangisha dyà dyondopa ànu àbìdì àdì panshì aa mwab'ewu. Pashiishe paanyimà pàà masangisha aa mamane kujika, dîbà adi netwikale ne masangisha à dyondopa paanyimà mwaba ewu.

<sup>17</sup> Kàdi mpindyewu ndi—ndi muswè kutòokeshà eci menemene, bwà muntu yònsò wàmòna mwà kuvùluka, ne mpindyewu, mu mwab'ewu, bìdì mwà kwenzeka ne binutape ne binùhulùmune panshì, ne bitùpèeshe twètù bònsò dinyùkishiibwa dinène. Kàdi mémè ndi mwambule bujitu, kabiyi bwà—bwà cingà cintu to ànu kuyiisha kwà Dîyì. Aci, s' ki kwajiki. Ànu—ànu kacya ngaakwàta ku Dîyì. Nènku misangu yàbùngì mbifwànyine, mu bikondo byà èkèleeziyà ebi, mbifwànyine kudileejila pa òngumba dyà muntu kampànda. Nènku byòbì byenzè nàнку, kì mbwena kwamba ne mbyenza bwà kufiitangana mèyì à àtapangana to. Bìdì—bìdì ànu kwamba cìdì Mufùndu mwambe, ne dibuulula dìndì naadi bwàCì. Nènku nwènù nwela meeji ne ndi mutùpàkane mu bwalu abu, dîbà adi kanushàadi bacìndamine ku mwoyi to, nwànsambidilaayikù ànu bwà Nzambì wàndeejakù cìdì cìmpè, bwalu ndi muswè bulelèlè kwikala mu bululàme.

<sup>18</sup> Ne pashiishe cikwàbò cintu, mu kujingulula bujitu bùndì naabu, mu—mu disangisha bu edi nùнку ewu, bwà kulongesha bantu, ne Nyumà Mwìmpè neàndumbùlwishe bwà mèyì àndì ngamba mu cyambilu emu. Pa nàнку nudi numòna mutùdì tulenga bwalu ebu byà kakùyì tuseku to. Mpindyewu, wetù. . .

<sup>19</sup> Nùнку's mvw'a kuswa kwenzela cyòci eci mwaba mukwàbò wà cyanàana. Kàdi, bu mùdìbì ne ndilongesha, dîbà adi mu wetù. . . Mu masangisha à butangadiki à pambelu, muntu ne muntu wa kutùdì ùdì ne mmwenenu kampànda anyì—anyì dijingulula, anyì wa bwena utukù mu cikondo cijima eci, ne tudi ne èkèleeziyà yètù twètù, ne bìdì èkèleeziyà yètù ayì yitùlongesha, ne bitùdì twitabuuja. Tudi. . . Ncitu muswe kubwela mu èkèleeziyà wa muntu mukwàbò, anyì munkaci mwà bantu mùshindù awu to, ne kwamba cintu kampànda cyà cibèngangane ne mùdì bantu balongeshiibwe. Bwalu, ndekeelu wa byònsò, ntu nkaadi mwakule patòòke ne. . .

<sup>20</sup> Muntu yèyè mwikale mwena Kàtòlikè, ne yèyè mweyemene Èkèleeziyà wa Kàtòlikè bwà lupandu, mmujimine. Yèyè mwikale Baptiste, ne mweyemene Èkèleeziyà wa ba-Baptiste, s'mmujimine. Anyi mwena Mpenta, mweyemene Èkèleeziyà wa Mpenta awu bwà kumusùngilaye, s'mmujimine. Kàdi. . . Èkèleeziyà kanà yònsò ewu's! Kàdi muntu nkààyà awu yèyè mwikishile ne dísù dikolè pa diitabuuja mu byenzedi bijikija byà Kilistò ku Kàlvariyo, mmusùngidiibwe, nànsha yèyè mwikàle wa mu èkèleeziyà kaayi. Bwalu: “Ku diitabuuja nkunùdì basùngidiibwe, ne ciine aci ku ngàsà.”

<sup>21</sup> Mpindyewu, misangu mikwàbò, mu kwenza kwà cyòci eci, dîbà adi nèngeelè meeji, mu nzùbu wànyì sungasunga mukese

ewu utùvwà babange kukaadi bidimu byàbúngì, ànu ne mushiki wa kale wà mabwe à nshàmenda ne bikwàbò, nènku bwétù twétù ùdi bu mwaba wa cijila. Katwena baswe, nànsha byà munyi, baswè kucimòna cishintuluke to, bwalu ewu ki mwaba wà kumpàla wàkabanga Nzambi kutwilangana neetù, mpatuvwa mene katùyì nànsha beele mabwe panshi pèndè apa to. Kàdi mbi—mbikafike mu cipidi cyà ne mpindyewu too ne mukàadii ùkùlakaja emu, ne tudi ne ndongamu wa lwibaku—lwibaku mwab'ewu, bwà kupatakaja èkèleeziyà eku ne eku kwà mwaba wònsò ewu's.

<sup>22</sup> Mpindyewu, ne patwàmba kufikila ku diine dîbà adi, ndi ndyùmvwà ne pândi mfùma mu budimi bwà bwambi, pândi ncìyi mwà kutapa bânà bèètù ku mwoyi ne, anyì, mayiisha ne bikwàbò to, dîbà adi bidi bimpèèsha bukenji bwà kwamba patòoke mmwenenu wanyì mèmè sungasunga, mu—mu wànyì. . . mu cyambilu emu. Ne pa nàнку wèwè mwambe ne: “Ndi mulongeshiibwe mu mùshindù mushiilàngàneku ndambù,” Ndi mufwnàiyine. . . Ne pashiishe, mu cyòci eci, tudi ànu tubiikila muntu kanà yònsò udi muswè kulwà awu. Nwamònu anyi? Kakwena muntu nànsha umwe udi ucìtuudila mfranga to, anyì nî ncinyì cyònsò. N'Tabernacle ewu's. Nènku muntu yònsò udi muswè kulwà awu, tudi tumwakidila ànu bimpè bwà kulwaye. Lwàku wèwè ànu kulwa. Pa nàнку ndi nnulòmba bwà nulwe ne Bible wenù, mu disangisha dyònsò, ne nulwe ne kidiyò ne dibèji.

<sup>23</sup> Nènku mpindyewu, ne mèyi ònsò à dyela naawu nsèke ne bikwàbò, ncìvwa nkumbana bwà kutwàla mikàndà yònsò ayi to. Pa nàнку ndi ànu mufunde, mufunde apa, musangu wònsò, pa dibèji kaaba aka, tuntu tukesè tündi mwangate mu maalu-malonda ne dyela dyà nsèke, ne bikwàbò, bìndi mufwànyine kukùmbana ànu mwà kubibadila mu—mu tuntu tufùnda etu etu, pamutù pàà kwangata mukàndà ne kubanga kubuulula mabèji awu. Kàdi, pakàadibi bikafika ku Mifùndu, netwangate Bible. Nènku pashiishe mu dyela dyà nsèke, nèngumvwije; anyì mu maalu-malonda, ne mmufùndi kaayi wa maalu malonda uvwa mucyàmbe, ne bikwàbò. Dîbà adi mu. . . Mu bushùwà bwà bwalu, bwà mukàndà wikala ne cyà kulwa awu, mòna's, dîbà adi's tudi mwà kuwùfùnda bimpè ku cyamù dîbà adi, ne biikale mwà kupeta byònsò byenza mùdibi bikèngela.

<sup>24</sup> Mpindyewu, netwènzè ne mwetu mwònsò bwà kubanga kumpàla kwà dîbà ne kupatuka kumpàla kwà dîbà mu mishindù yònsò. Neciikale matùkù mwandamukùlù, à masangisha, kubangila ku dyàlumingu too ne ku dyàlumingu dikwàbò.

<sup>25</sup> Mu dindà emu ndi mbanga ne nshapità wa 1 wa Bwàkabuulwibwà, wa Mukàndà wà Bwàkabuulwibwà. Ne Bwàkabuulwibwà mbukosa mu bitùpà bisatu. Nènku nshapità yisatu yà kumpàla ki yitwikala ne cyà kukwàta naayi mudimu mu matùkù mwandamukùlù aa. Pààbi, cikondo cyà èkèleeziyà cimwèpele cidi mwà kutwangata ngondo mujimà.



kuya kule; ku mulongo mwinâyì, kujiminaye ne kukabwela mu—mu civùmvù, èkèleeziyà kulela èkèleeziyà wa civùmvù.

<sup>31</sup> Ne pashiishe Èkèleeziyà mùle tente ne Nyumà! Byôbi biine, ndi ngamba bwalu ebu ne kaneemu kàà difwàna dyà Nzambì bwà ntèndeleeleu wa muntu yònsò. Kuumukila ànu ku cibangidilu, too ne mu cikondo eci, Èkèleeziyà mulelèlè, wa bushùwà ùvwà ànu ng'Èkèleeziyà wa mpenta. Mbulelèlè. Nzambì wàkalaminyina Èkèleeziyà ewu.

<sup>32</sup> Kàdi mèmè ntu ànu ndikonka misangu yàbùngì, pàakamba Yesù dìyì adi, wàmba ne: “Kanùcìnyi to, nwènù kasumbù kakesè kàà mikòòkò, ndiswa dyakàne dyà Taatù wenù bwà kunùpeesha bukalenge.” Ntu misangu yònsò ànu ndikonka civwa aci ciswa kumvwija, kàdi ndi ncyùmvwa mpindyewu's.

<sup>33</sup> Lumingu lushààle elu tuvwa benze disangisha mu Shreveport, mu Louisiane, disangisha dyà ditàmbe bunène dyà mu nyumà dìmvwàku mubwele kacya, bwà kacya bandela. Shreveport!

<sup>34</sup> Mwva. . . Mwva ne ndambù wa matùkù à diikisha, nènku mwva muye mu Kentucky ne Mwanèètù Wood ewu, umwe wa ku balami bàà mu èkèleeziyà, anyi balubuludi's we, bwà kulemba nyama. Twètù kubwela mu meetu.

<sup>35</sup> Mwva mwase nshìndì wa kumpàla. Ki mèmè kwamba ne: “Nèngǎnji ànu kwindila,” bwalu muntu kampànda mmupicilemu ne yimwè mbwa. Ki mèmè kwamba ne: “Nèngǎnji ànu kwindila too ne pààpatuka nshìndì mu milundu. Kubàndayi lubilu mu micì amu, mu milundu ayi, kàdi kusokomayi mpindyewu.” Mèmè kwamba ne: “Pààpatukayi. . . Mèmè nènsembè apa bwà kwindila.” Bwalu kùdi mashika à menemene ne à makolè, ne macì àmba kutuuka. Kàdi, nudi bamanye's, mpepèle yèbè yà—yà mikole yipicila mu mpòngò amu's. Mèmè ne: “Nèngǎnji ànu kwindila too ne pààpàtukà nshìndì.”

<sup>36</sup> Ndi mwenze ànu ntwa nyimà panshi, s'ki Nyumà Mwimpè kwamba ne: “Juuka, nda lwà mu mwaba unùdi nubiikila ne 'lupòngò lwà mwena manayi mwimpe.' Nèngàakulemù neebè.”

<sup>37</sup> Ki mèmè kuya mu mwaba awu ùmvwà mwinyike ne “lupòngò lwà mwena manayi mwimpe.” Bwalu, cìmvwa mwinyikile mpòngò ayi dìnà, mèmè mwine, mbwà ngamòna mwà kumanya mwaba ùmvwa nsanganyibwa. “Lupòngò lwà mwena manayi mwimpe,” bivwa mbwalu bavwa ne. . . Mwva mubwele muntwamu ne kumòna nshìndì dikumi ne yisambòmbò misòmbè ku mucì; kwasa bùngì bungaanyishila, kushiya mikwàbò ayi mwaba awu, ne kukwàta njila kuya. Nènku aci's ki dinàya adi, mwà kudyenza. Nànku dībà adi mèmè kucibiikila ne: “lupòngò lwa mwena manayi mwimpe.”

<sup>38</sup> Ki Yèyè kuntèelela ne: “Mwaba ùtù ubiikila ne 'lupòngò lwà mwena manayi mwimpe awu.’” Kì n'Yèyè uvwa mulùbiikila to, kàdi mèmè nguvwa mulùbiikila nànku.

<sup>39</sup> Pashìishe mêmè kuya lwà ku mutù kwà lupòngò alu ne kusòmba mwinshi mwà mucì wà lusanga lutòòke, ne kwindila bu citùpà cijima cyà dîbà, kàdi cintu nànshapu cimwe cyà kwenzeka. Mêmè kudyàdija panshi, kupona mikookwela panshi mêmè mwine, kwela byanza muulu. Ki kushiishaYe kwakula naanyi.

<sup>40</sup> Nènku pààkenzaYe nànkù, Mèyì àkambuulwilaYe, pa Mufùndu mwine ewu utùdì ne cyà kufikaku mu dindà emu ewu, Ncivwaku kacya mwanji kucimòna kwònsò aku to, kacya bàndela.

<sup>41</sup> Nènku pashìishe pàngààkafikà ku Shreveport, mu Louisiane, mukàji kampànda udi mukàji mwikale ne mapà, dîna dyèndè m'Mandamu Schrader . . .

<sup>42</sup> Kukaadi bidimu byàbùngì, pààkatuutakeena naanyi Mwanjèlo wa Mukalenge lwà kwinshì ku musulu eku, bwà musangu wà kumpàla, ne kumwènèka mu Bukènkè abu, ne Mèyì àkambaye mwaba awu; paanyimà pàà bidimu dikumi ne cimwè, pàngààkabwelà mu disangisha kampànda, mukàji mutekète ewu wàkajuuka ne kwakulaye mu myakulu ne kwandamunaye. Cìvwa mmwaku ku mwaku cintu cimwècimwè cyàkamba Mwanjèlo aci.

<sup>43</sup> Nènku mukàji mutekète umwèumwè ewu, pàngààkabwelà mu tabernacle ku . . .anyi mu mwaba mwine wà ku Shreveport wutùvwà tusanganyiibwamù ewu, Life Tabernacle, Nyumà Mwîmpè kupwekaye pa mukàji awu ne kwàmba ku mwaku ku mwaku cyàkangambilaYe lwà pa kakùnà apu. Dîbà adi Nyumà kubanga kunyunga ne kufila dikudimuna, ùdyanjila kwamba maalu ku dibuulula, ku cipròfetà, bintu bìvwà mwà kwenzeka mu disangisha dilòòlò dìvwà dilondà adi, kàdi musangu nànsha ùmwè kabivwaku bipangila to.

<sup>44</sup> Kumpàla kwà cyòci aci, mukàji mutekète kampànda kujuukaye mu disangisha amu, mukàji kampànda wa ba-Baptistes kulwaye mwaba awu kàyi mumanye cìvwàye mwà kwenza to. Nènku ùvwa mwimane munkaci mwà disangisha ne Nyumà Mwîmpè kumutuulukilaye pambidi, ki kubangaye kwakula mu myakulu, mukàji kampànda wa ba-Baptistes wa mu Èkèleeziyà wa ba-Baptistes wa Dyàmbedi wa mu Shreveport. Ne pashìishe kàvwa mumanye cìvwàye mwenze to. Nènku dîbà adi, kumpàla kwà yèyè kwamba nî ncinyì nî ncinyì, Nyumà Mwîmpè kufila dyandamuna, kwamba ne: "EMU MMUDÌ MUKALENGE WÀMBA, 'Munda mwà ngondo yisatu, nekwikale Nyumà wa Mòsà, Eliyà, ne Kilistò, munkaci mwà kukwàta mudimu mu tabernacle emu.'" S'ki cyòci aci cyenzeke, ànu menemene.

<sup>45</sup> Muntu mulùme baptiste kampànda wa ku Meridian, mu Mississippi, kwenzaye ne àteekà cyanza cyèndè pa frigo wendè, bwà kupatula cintu kampànda mu frigo amu, ki Nyumà wa Nzambì kumupwekela pambidi. Ne yèyè wàkaakula mu



myakulu, kàyi mumanyè cìvwàye wènza aci to. Nènku kumpàla kwà yèyè kupeta...kumpàla kwà yèyè kuumvwa cìvwàye wenza, Nyumà Mwîmpè kwakula kwamba ne: “Nda ku Shreveport, mu Louisiane. Musadidi wanyì neàkwambile cyà dyenza.”

<sup>46</sup> Ki kulwaye mwaba awu, kwambaye ne: “Ebu bwalu ncyèna mbuumvwakù to; kacya kabùtu bwenzekekù nànsha.” Kaa, ekèlekèle!

Tudi ne mwoyi mu matùkù à ndekeelu pabwîpì menemene ne Dilwa dyà Mukalenge.

<sup>47</sup> Èkèleeziyà mukesè awu ùtu misangu yònsò ànu wa banyààbanyà, wa Mpenta awu. Ncyèna nswa kwamba dingumba dyà beena Mpenta adi to. Kî ndìndì nswa kwamba to. Kàdi, mbantu bàdi ne dilabula dyà mpenta! Mpenta kî mbulongolodi nànsha. Mpenta ndilabula didi diya kùdi ewu yònsò udi muswè. Mwena Kàtòlikè, mwena Yuda, muntu ucìdi witabuujilakù, ba-Méthodistes, ba-Baptistes ne: “Ewu yònsò udi muswè, àlwe.” Ndilabula didi muntu nkaaya...Nzambi kàtu ùkwàta mudimu ne dingumba to, Yèyè kàtuku nànsha ùkwàta mudimu ne bàà Bisàmbà byà bendè bu—bu cisà anyi cisàmbà kampànda to. Ùdi ùkwàta mudimu ne bantu nkààya ne: “Ewu yònsò udi muswè.” Ikalè mutòòke, mufiike, wa kalaabi, mufiikuluke; Méthodiste, Baptiste, mwena Mishòonyì, mwena Kàtòlikè, cyònsò cidiye aci: “Àlwe,” nî nganyì yònsò. Ndi ne disànkà dyàbùngì bu mudiYe mucyènzè mùshindù awu. Ndi... .

<sup>48</sup> Ànu muvwa muntu awu mwambe musangu kampànda ne: “Mbipiciibwe ne mèmè mMuumvwa wamba aci pamutu pàà kuteela dínà dyànyì ne: ‘William Branham àlwe,’ bwalu nkufwànyìne kwikala bakwàbò baa William Branham. Kàdi pààkambaYe ne: ‘Ewu yònsò,’ ndi *mumanye* ne aci ncingangate.”

Pa nànkù mùshindù awu ke utùdi bwònsò mwà kudyùm vwa ne: “Ewu yònsò udi muswè, àlwe.”

<sup>49</sup> Mpindyewu, ndi mumanye ne kùdi bantu bààbùngì munkaci mwà kwindila pambelu apa mu nzùbu ya bilaala-beenyi ne bilaala-beenyi byà bàlaminyinamu màshinyi, bàdi bàfùmìna pa buloba bujima. Nwamònu anyì? Kùdi bantu mwab’ewu bafùmìne ku Irlandè ne mu myaba mishiilèshiiilàngane, bindile bipungidi ebi. Kàdi ncyèna mwà kubyangata mpindyewu mene to. Ndi muswè kufila dìbà dyànyì ku cyòci eci, nudi nuumvwa’s.

<sup>50</sup> Pàndì mfùma ku ngendu eyi, ndi ngààlukila nangananga bwà kupeta—kupeta muntu kampànda wa kukwàcila mudimu, bwalu bàtu balama bipungidi. Kàdi mpindyewu mene bìdi bìkèngela bwà twètù kubiteeka ku luseka bwà Cyòci eci.

<sup>51</sup> Mpindyewu, cintu ànu cìmwèpele kumpàla kwà twètù kubanga Mukàndà ewu. Ku cibangidilu kwakadi Èkèleeziyà wa Mpenta. Èkèleeziyà wa Mpenta awu wàkapàtuka mu bukolè bwà Nyumà ne kufùnda Mukàndà wà Byenzedi. Musangu mwibìbi,

ùdi ubanga kukèèpela, èkèleeziyà kulwa wa kwisùkwisù. Cíkondo ciibìdi cyà èkèleeziyà, civwa ànu bintu byà kwisùkwisù byètù byà menemene ebi, kàdi kaaDimiinu kakesè kàà Mpenta aku kavwa ànu katungunuke ne kulwa, kàà nyumà. Pashiishe kubwelaci mu bikondo byà midimà, byà bidimu bitwe ku cinunu ne nkàmà yinaayi ne byà mu njila, cyà dikèngeshiibwa dyà midimà. Cíkondo cikesè cyà Mpenta aci kutungukaci ànu ne kwikala ne mwoyi ku cyôci aci. Mùshindù mwine ùdici cipandukè, kanunkonkiku to. Civwa ncyanza cyà Nzambì, cintu cimwèpelè civwa mwà kwikala cicyenze.

<sup>52</sup> Bwalu, bàkabàpoopela, ku makunji. Nènku kwangatabò bantu balùme ne kubiinamijabo pa—pa cikuuku, ne kwangatabo mpoopo ya micì e kubafinyikabo mu mikòlò, kàdi kulekela nyama, mbwa, yibadiila lwànyimà, yibatuulakaja mala, kumpàla mene kwà kufwàbo. Kwangata bantu bakàji, kubàkosa mabèèle, ne lushoola mùshindù *ewu*, dibèèlè dyàbo dyà dyàbalùme adi, kàdi biimana ne balekela mashi awu ànu àtuuta lubòlèlèlè panshi, too ne mudibo batuula nkìndà. Bàngata bàndà mu mafu à baamaamù bwà kwelela mbwa ne ngulube, piine apu mbòbò ànu babàtàngile's. Wa bwalu bàmba muvwaci bwena Kilistò; kàdi's Bible mmwambe, ne Yesù wàkamba ne: "Nebyènzekè ne nebiikalè mwà kunùshipa, beela meeji ne bàvwa bènzela Nzambì mudimu." Nwamònu anyì?

<sup>53</sup> Nènku mpindyewu cintu aci ncilambe too ne mu cikondo cikwàbò. Ki ndekeelu wa byònsò kupatukaci. Pashiishe tudi tumòna ne pàvwà èkèleeziyà ùpatuka mu dilongolola amu, kulalukaye ànu kulaluka, kubangila ànu musangu awu, ne kuyayè kule ne Nyumà, kuyayè kule ne Nyumà, ànu nànkù too ne ku cikondo cyà ndekeelu eci pakaadiye pabwipi ne kudyenza cimuku ne kwenza cimfwànyì cyà nyama wa lwonji.

<sup>54</sup> Kàdi Nyumà mukèsè awu neikale ne mwoyi munda mwà myoyi yà bantu too ne pààlwà Yesù. Bikèngela bwà kwikalabi nànkù. Lamàayi aci mu meeji.

<sup>55</sup> Netùcizole pa mbòdi pààpa, kwangata maalu-malonda ne bikwàbò byònsò, bwà kunuleeja ne bidi ànu mùshindù awu menemene. Nenwàngate maalu-malonda, nwènù biine, bwà nucibale. Numònè cidi Bible mwambe, ne pashiishe cidi maalu-malonda mambe. Numòne mùdici cipetangana ànu menemene mùshindù awu. Kaa!

<sup>56</sup> Katùteeciku bwònsò kwangata eci ànu bu dilonda dyà bwalu to, kàdi ne dísù dikolè, ne dísù dikolè twangate madimwija à Nyumà Mwîmpè bwà kusambila, muunya ne bufùku. Kanulekediku cintu nànsha cimwè cinupangisha bwà kusambila to.

<sup>57</sup> Patùdi tuditwamù, netùpatulemu nsòmbelu yà bantu banène bàà kale wàwa, ne mùshindù wàkadikèngeshabo. Neùmòne mùshindù ùdi cyùdi wèwè mwenze cikese. Bitu bimfikisha ku

didyùmvwa mêmè mwine bundu misangu mikwàbò, mùshindù ùdibi bikèngela bwà twètù kwikalala ne bintu byònsò ànu bipeepèle nunku ewu, kàdi bóbò bàakapeta bintu byònsò ne lutátu. “Bàakalalakana,” mwàkamba Pòlò mu Ebèlu 11, “bavwàle bisèbà byà mikooko ne byà mbùji, bakengeshiibwe ne batàcishiibwe, banyengibwe byònsò.” Bujaadiki bwètù nebwikale cinyi kumpàla kwà bwàbù’s? Mmùshindù kaayi wikalàbu ku luseke lwà aci’s? Kàdi twètù bikèngela twikale ne bintu byònsò ànu byà bilenga.

<sup>58</sup> Mpindyewu, ànu bwà kaneemu cyanàànà, bangabanga ne twètù kubuulula Mukàndà, ndi njinga bwà twètù bònsò, bàdi mwà kucyenza abu, kujuukilaku ànu kuulu katanci kakesè cyanàànà bwà disambila. Mpindyewu ne meeji matòòke a mu mwoyi wèbè, nunganaku mwaku wà disambila bwà...kùdì Nzambi.

<sup>59</sup> Mukalenge Nzambi, Mufùki wa maulu ne buloba, Mfukyamukele wa Mwoyi wà Kashidi, ne Mufidi wa mapà ònsò mîmpè ne mapwàngane. Tudi baswè kuKulòmba, Mukalenge, dyàmbedi, bwà kutùfwilaku luse ku dibenga kucyùka dyètù dyònsò dyà myanda, ne ku mpèkaatù yètù ne matomboka ètù biKwenzela, ne benzelangane muntu ne mukwèndè ne bakwètù.

<sup>60</sup> Swàkukù bwà cikondo cikesè cyà didisanga eci kaciiikadi ànu bwà diibakiibwa dyà misùukà yètù twètù nkaayaayi to, kàdi swàkukù bwà biikale bwà kutùtòokeshila mu mùshindù wà, ne kutùpa disonsodiibwa, mu mùshindù wà twàya kambila bakwàbò. Swàku bwà ciikàle cikondo cyà didilambulula, biikale tudisanga ne Mubidi wà Kilistò mu kaabujimà ne biikale badilongòlole bwà Dyambwibwa.

<sup>61</sup> Taatù Nzambi, kî nku njiyà yàànyì mêmè mwine to, mumanye ne musadidi Webè, ne basadidi bakwàbò bwònsò aba, kî mbakumbane bwà mudimu munène ewu to. Tumòna muvwa bantu banène, bàà kale, bapete bujitu pa myoyi yàbo bwà kuteeta kubuulula Eci, anyi bwà kwela nsèke pa Dibuuulula dinène edi; díbà adi tudi tufika ku dyumvwa ne tudi, bapite ne mùdibo, katùyi bakumbane to. Kàdi Wèwè ke dyètù dikumbànyina.

<sup>62</sup> Nènku ndi ndòmba, Taatù wa mu Dyulu, bwà Wèwè kwenza cintu kampànda cyà pabwàci munda mwà díbà edi, bwà Nyumà Mwîmpè kwikalalaYe ne bukòokeshi pa mwoyi ne mwoyi wònsò. Tengùla mishiku yìdì yàkula ne maci àdi atèeleja. Nènku pààjika cyònsò, ne twètù kucilambula Kùdì, swàku bwà tupatukeku ku mushiku wà mbèlù wà nzùbu ewu, twenda twamba ne: “Bivwa bîmpè bwà twètù kwikalapù’s. Nyumà Mwîmpè mmwakule neetù patùvwà basòmbè mwaba awu apu. Nènku mpindyewu tudi bakange mwoyi bwà kwenza cyònsò citùdì mwà kwenza pàcidi Makènè à dilòlò munkaci mwà kuteema.” Enzàku nànkù, Mukalenge.

<sup>63</sup> Swàku, mu disangisha edi, bwà kufikisha balùme ne bakàji ku dipeta dyà lukunukunu, mu mùshindù mupyamùpyà. Swàku Ùjuulà baakudi bàà mu myakulu, bandamunyi bàà myakulu. Swàku Ùjuulà mapà à cipròfetà. Juulaku bayiishi, bampaasàtà, batangadiki, ne bikwàbò, bwà Èkèleeziyà wàmòna mwà kwibakiibwa. Juulaku ba-missionnaires bwà kuyabò mu budimi bwà bwambi mwàmwa ne kutwàla Èvànjeeliyò wa butumbi ewu. Kwònsò kwàyà Dìyi aku, swàku bwà Dyàmata mu buloba bwìmpè, dipàtula makwàbò lukama, bwalu tudì twitabuuja ne tudì ku ndekeelu wa cikondo. Dikùmbana dyà maalu ònsò dikaadi pabwìpì.

<sup>64</sup> Twènzèlèku bintu ebi, Taatù. Ne kumutù kwà maalu ònsò, Mukalenge, pa dìbà edi, Nkwacisheku, mèmè mwena lukengelu ewu. Bwalu ndi ndòmba nànkù, pàndì ndilambula Kùdì bwà masangisha aa apa, mu Dìna dyà Yesù Kilistò. Amen.

[Mwanèètù wa bakàji kampànda ùdi wakula mu mwakulu mukwàbò, mwanèètù wa balùme kampànda ùdi wandamuna—Muf.]

<sup>65</sup> Nzambi wa Bukolè, Wàkabiisha Yesù ku bafwè, tudì ne disànkà dyàbùngì dyà kumanya ne Nyumà Webè mmusòmbèle munkaci mwètù. Yèyè ùtu misangu yònsò ànu wa cyà bushùwà ne kacya kàtukù mwanji kwamba mwaku wà mashimi to. Nènku mpindyewu, Taatù, shindikaaku Dìyi Dyèbè patùdì tubala apa, bwà butumbi Bwèbè. Nènku swàku bwà mwoyi ne mwoyi wònsò, bu muWàkamba ne: “Yikalaayi badilongololè ne pabwìpi, bwalu nekùlwe cintu kampànda.” Bìdi mwà kwikala ne bantu nebààkidile didimwija dyàbò dyà ndekeelu bwà kuumuka ku bintu bìdìbo benza mpindyewu ebi, kuya ku njila wa bushùwà. Tudì tuKwela twasàkidila, Nzambi wa Cijila, mu Dìna dyà Mwàn’Èbè, Mukalenge Yesù. Amen.

<sup>66</sup> Tubuulula mpindyewu mu Mukàndà wà Bwàkabuulwibwà, nshapità wa 1. Mpindyewu, dyàmbedi, ndi muswe kubala mvensa yisàtù yà kumpàla yà Bwàkabuulwibwà.

*Dibuulula dyà Yesù Kilistò, didì Nzambi mumupe, bwà kuleeja musadidi wendè maalu àdì ne cyà kukumbana mu cikòsò; nènku wàkatuma ne kuwùmvwijila kùdì mwanjèlo kùdì musadidi wendè Yone:*

*Yèyè udi ufila bujaadiki bwà dīyì dyà Nzambi, ne bwà bujaadiki bwà Yesù Kilistò, ne bwà byònsò. . . bwà bintu byònsò byàkamònaye abi.*

*Wa disànkà ng’ewu udi ubala, ne aba bàdì buumvwa mèyi à cipròfetà eci, ne balama maalu àdì mafùndamù: bwalu cikondo cikaadi pabwìpì.*

<sup>67</sup> Ànu muumvwa mwambe kumpàla, mpindyewu, mu eci netùteetè bwà kwenza ditaata dikesè dyà Mukàndà mpindyewu, bilondeshile maalu-malonda ne bikwàbò. Nènku misangu

wònsò panùdi nummòna nta pa dîsù ku mabeji àndi mufùnde apa aa, ncintu cîndi mwangacile mu nsèke myela ne bikwàbò.

<sup>68</sup> Mpindyewu, mufùndi wa Mukàndà ewu n'Yone, Yone Munsantu wa Nzambì, wàkafùndila lukòngò lùcilwalwà (A). (B) Kutumina banjèlo mwandamutekète bàà bipungu mwandamutekète bisunguluke byà cikondo cyà beena Kilistò, cikondo cyà kuumukila ànu ku matùkù à bapostòlò too ne ku Dilwa dyà Mukalenge. Nènku. . . mpindyewu, bikondo bìdi bimweneka mu dilondangana, cikondo ne cikondo, kuumukila ku dibànda dyà Mukalenge wetù too ne ku Dilwa Dyèndè cyàkàbìdì. Cikondo ne cikondo cyà èkèleeziyà ncileejùbwe ku ngiikadilu waci wa nyumà. (E) Cikondo ne cikondo cyònsò cyà èkèleeziyà cidi mwà kudimweneshila ku ngààkwilu waci wa mu Mifùndu ne wa nyumà. Pàdì Nyumà wakula, cikondo cyònsò cidi cidimwenesha. Cikondo cyònsò cidi citwala Mvinyo mulelèlè wa Kilistò, virgo wa Meeji awu's. Nènku cikondo cyònsò cidi citwtwàla mvinyo musomeka, virgo mukùtākane awu's.

<sup>69</sup> Bafùndi bàà maalu-malonda bàdi biitabuuja ne, eci ki nsòmbelu wa Yone. Yone uvwa musòmbele munda mwà bidimu byèndè byà ndekeelu mu cimenga cyà Efèsò ne wàkafwilamu. Yèyè uvwa mu cisanga cyà Patèmò, dîbà divwàye ufùnda Mukàndà, wà Bwàkabuulwibwà. Kacivwa bwalu-bulonda bwà nsòmbelu wèndè to, kàdi bwalu-bulonda bwà Kilistò mu bikondo bìcìvwà bilwa. Nwamònu anyi? Cívwa ncipròfetà. Kì nnsòmbelu wa Yone to, kì nnsòmbelu wa Kilistò to, kadi kwamba kwà cipròfetà cyà cikondo kampànda cìcìvwà cilwa. Kacivwa mèyi èndè à cipròfetà to; kàdi, makùmbù à Mukalenge, à ne dîsù dikolè. Kacivwa Dibuulula dyà Yone Munsantu wa Nzambì to, kàdi Dibuulula dyà Kilistò Mukalenge.

<sup>70</sup> S'ki Mukàndà wà ndekeelu wà Dipungila Dipyadipyà's, kadi ùdi wàmba bwà mbangilu ne ndekeelu wa cipungu cyà Èvanjeeliyò. Bamanyi bàà mabàlà bàà Bible bàtu biitaba aci.

<sup>71</sup> Mikàndà mifùndila bikondo mwandamutekète byà èkèleeziyà yàkafùndiibwa, mu cipròfetà, bwà bikondo bìcìvwà bilwa abi. Pòlò ngwàkafùnda bwà mwoyi ne butumbi bwà èkèleeziyà mwandamutekète yìvwàpu mu ditùkù dyèndè ayi. Yone wàkafùnda bwà mwoyi ne butumbi bwà èkèleeziyà mwandamutekète mu matùkù àcìvwà alwa, ne Yone ùvwa wàmabila bampaasàtà anyi misànjeelà mwandamutekète kàbìdì buludi beena Kilistò bàvwà mwinshì mwà banjèlo mwandamutekète bashiilèshìilàngàne aba.

<sup>72</sup> Mpindyewu, Mukàndà wà Bwàkabuulwibwà, mpindyewu netwàngate, bu mutùdi tusunsula cyòci eci mu dindà emu ne mu dilòlò edi. Nènku netùteete bwà kupàtuka lwà pa dîbà dikumi ne òmwè jaajaaja anyi dîbà dikumi ne òmwè ne tusunsa makumi asatu, cintu bu nànkù awu, ne pashìishe kubanga cyàkàbìdì dilòlò edi pa dîbà mwandamutekète.

<sup>73</sup> Mpindyewu bidì byakula mu nshapità 1 ewu. Mvensa wa 1 ewu, ùdi—ùdi cyà bushùwà wàmba patòòke cidiYe, bwalu n'Dibuulula dyà Yesù Kilistò. mvensa mwi<sup>2</sup>, Munsantu Yone wa Nzambì ki mufùndi ne musadidi. Mvensa mwi<sup>3</sup>, mabenesha mmambiibwe. Mvensa mwi<sup>4</sup> too ne ku mwi<sup>6</sup>, ndyela dyà èkèleeziyà mwoyi. Mvensa wa 7, dimanyisha. Mvensa wa 8, Buzambì bwà kumutu kwà bwònsò bwà Yesù Kilistò. Kuumukila ku mvensa wa 9 too ne ku wa 20, ncikèènà-kumòna cyà Patèmò.

<sup>74</sup> Nènku, kàbìdì, mvensa wa 14 ne wa 15 ayi yìdi yileeja butùmbi Bwèndè misangu mwandamutekète bwà Mupersona Wèndè. Kaa, s'mbilenga kumòna patùdi tumòna Kilistò mu bantu Bèndè misangu mwandamutekète bàà wènd-... ngiikadilu misangu mwandamutekète yà bantu Bèndè, mu dibìishiibwa Dyèndè dyà butùmbi.

<sup>75</sup> Mpindyewu, myanzu yìdi yileeja ngiikadilu.

*Dibuulula dyà Yesù Kilistò, . . .*

<sup>76</sup> Kî ndibuulula dyà Yone Munsantu wa Nzambì to, kàdi Dibuulula dyà Yesù Kilistò, Mwànà wa Nzambì.

<sup>77</sup> Mpindyewu, mwaku wa cyena Ngelika bwà *dibuulula m'bwàkabuulwibà*, cidi cyumvwija ne “divungùlula.” Nènku mvwa ngàngata mwaku awu ngenda ngukenketa. Ùdi umvwija, bwàkabuulwibwà awu, ùdi bwà . . . Mbyenze bu mùdì musongi wa mpìngù, mwenze lupìngù kampànda lunène, kàdi kacya wàshààla mululame lubwikila ne cibwikilu kampànda. Nènku pashìishe uya kapanda cibwikilu aci ne ùbuulula ciwaye naaci paanyimà pàà cibwikilu aci. Aci's ndyumusha dyà cibwikilu's.

<sup>78</sup> Kàdi Mukàndà ewu kî ndyumusha dyà cibwikilu, mu mùshindù awu, dyà Mupersona wà Yesù Kilistò to. Nànsha nànku, ncyà bushùwà ne cidi cyàkula bwà Buzambì Bwèndè ne bwà misangu mwandamutekète yà buntu Bwèndè, ne kàbìdì bwà bintu bidìYe, bu mùdì Mwakwidi, Mfùmù, ne bikwàbò. Kàdi ndibuulula dyà byenzedi Byèndè mu matùkù àcilwalwà mu bikondo mwandamutekète byà èkèleeziyà bìdì bilwa. Cidi . . .

<sup>79</sup> Pàvwà Mukalenge wetù pa buloba, bayiidi kuMukonkabo, bàmba ne: “Mulongeshi, newikalè mu cikondo eci mwà kwalujulula bukalenge kùdi Izàlèlèlà anyì?”

<sup>80</sup> Ki Yesù kwamba ne: “Ki mbwalu bwènù bwà kumanya dībà adi anyì cikondo to.” Nènku muntu nànsha umwe kî mmufwànyine kumanya to. Yèyè ne: “Nànsha Mwànà mwine,” too ne dībà adi, “kàvwa mumanye to.”

<sup>81</sup> Kàdi paanyimà pàà lufù Lwèndè, dijiikiibwa, ne dibìika dyà ku lufù, ne dibànda dyà mu Butùmbi, Wàkapetela kùdi Nzambì maalu àcilwalwà à Èkèleeziyà. Pashìishe kwalukilaYè, bwà kutwàdila Èkèleeziyà Mukenji ewu, ne Mukenji wà dilwa

Dyèndè ewu ne ngiikadilu wa èkèleeziyà Yèndè munda mwà Cíkondo.

<sup>82</sup> Kàvwa mwà kucyènza kumpàla kwà lufù Lwèndè, dijiikiibwa, ne dibiika dyà ku lufù to, bwalu Yèyè kàvwa mwanji kucimanya to. Kàdi nuvwaku bamòne mùdi Mufùndu wàmba mwab'ewu anyi?

*Dibuulula dyà Yesù Kilistò, dyàkamupa Nzambi (Kilistò), . . .*

<sup>83</sup> Mùshindù mwine wàkafilà Nzambi Taatù Dibuulula kùdi Mwán'Èndè Yesù Kilistò. Nènku kutùmaYè mwanjèlo Wèndè kùdi Yone, bwà kuumvwija maalu aa àvwàku; àvwàku, àdiku, ne ikàlaku. Kaa, mbileejìibwe mu mùshindù mulenga wà dikema's wè!

<sup>84</sup> Mpindyewu, mu cikondo cinène cìcilwalwà cìvwà Yone mumòne eci's! Mpindyewu, aa, Dibuulula edi òvwa dimupèèbwe, menemene, bwà kubuulula kiipacila kasungùlùke kàà Kilistò, cìvwaYe mwà kwikala ne muvwaYe mwà kwikala, mu cikondo ne cikondo cyònsò. Ki bwà cinyi mvwa mwambe, mu dindà emu ne, lamààyì meeji ènù pa Èkèleeziyà mulelèlè. Èkèleeziyà mulelèlè wàkabanga mu Ditùkù dyà Mpenta.

<sup>85</sup> Kakwenaku mwena tèòlòji nànsha umwe, mumanyi wa dibàla wa Bible, anyì mumanyi wa maalu malonda, ùdi mwà kwamba ne wàkabanga mu matùkù à Martin Luther, à Wesley, mu cikondo cyà Kàtòlikè, anyì mu cikondo cikwàbò kanà cyònsò eci to. Wàkabanga ku Mpenta. Aci's ke cìvwà dibanjija dyà Èkèleeziyà. Aci's ke cìvwa ntwadijilu's. Nànku, ki bwà cinyi, mu muyiiki wa dipiyangana ne muntu kanà yònsò, imannyina wèwè ku ciibi cyà Mpenta aci, nènku kabeena ne kukwàbò kwà kuya to.

<sup>86</sup> Mbyenze bu kutèeka kalulù mu budimi kampànda. Wèwè's udi mumanye mwaba ònsò ùdi masoso ònsò, nànku wèwè muàjike. Nebikèngele bwà kwalukidilaku ànu mwaba ùmwèùmwè uvwaku kalwile awu.

<sup>87</sup> Èè, s'ki mùshindù ngwòwò awu, muntu kanà yònsò udi wakula bwà maèkèleeziyà ne bikondo byà èkèleeziyà, ne byenzi byà Nyumà Mwímpè, nebikèngele bwà nwènù kwalukila ku mbangilu, ku cibangidilu. Nebikèngele bwà kwalukila kwòkò aku bwalu Nzambi kèna ne mikalu to, ne Yèyè ngwa bukolè bwònsò. Ki bwà cinyi, Yèyè bu mùdiye kàyì mikàlù, Yèyè kèna mwà kwenza cintu kampànda *kaaba aka*, ne kwenza cintu kampànda cya cibengangana naaci, *mwab'ewu* to. Bìkèngela bwà Yèyè kwenza musangu wònsò mwàkenzaYe musangu wa kumpàla awu.

<sup>88</sup> Bu mwàkambà Peetèlo, mu ditùkù dyà . . . pààkapetà bàà Bisàmbà byà bendè Nyumà Mwímpè apu, yèyè ne: "Tudi mwà kubàkandika màyì, bu mudibi ne mbapete Nyumà Mwímpè bu mutwàkapeta ku cibangidilu anyi?"

Yesù, pàvwàYe pa buloba, wàkaakula wàmba ne: “Bidi. . .”

<sup>89</sup> Muntu kampànda kulwa kwamba ne: “Mikenji yìdi yitwànyishila bwà kwipata bakàji bèètù, bwà bwalu kanà bwònsò ebu anyi?”

<sup>90</sup> Yesù wàkamba ne: “Ewu wàkenza muntu mulùme, ngwàkenza mukàji. Bwà bwalu ebu muntu mulùme neikale. . .”

Yèyè ne: “Kàdi Mòsà wàkatwànyishila bwà kufùnda mukànda wà kushipa naawu dibàkà.”

Yesù wàkamba ne: “Kabìvwa nàнку ku cibangidilu to.”

<sup>91</sup> Alùkilaayi ku cibangidilu. Ki bwà cinyi, twètù baswè kwakula pa cikondo cyà èkèleeziyà, bìdi bikèngela bwà twètù kwalukila ku cibangidilu, kutèeka ku luseke diyi dyònsò didi muntu kanà yònsò mwakùle munda mwà cikondo.

<sup>92</sup> Ewu m’Mukànda wà bukenji kutàmbe Mukànda kanà wònsò wà mu Bible. Ewu ki Mukànda umwèpelè ùdi Kilistò mutwèpù citampì Cyèndè. Ùdi ùbanga ne dibènesha ne ùdi ùjika ne mulawu. “Wa disànkà ng’ewu udi ubala.” Ne: “Wa dyàkabi nguumusha ní ncinyi cyònsò mu Wòwò awu.”

<sup>93</sup> Ke Mukànda umwèpelè wàkafùnda Kilistò, Yèyè mwine, wà mu Bible mujimà. Mikenji Dikumi, Yèyè ngwàkafùnda ne munu Wèndè. Ncyà bushùwà. Beena Yuda bàakatungunuka ànu ne kwikala bakwàtekù. Nènku, leelù ewu, cintu’s n’—n’Dibuulula.

<sup>94</sup> Nènku piikalaku kùtuku Mukànda ùtu Sàtaanà mukine mu Bible, ngwà Bwàkabuulwibwà. Kùdi yìbìdi. . . Ùtu mukine Mufùndu ònsò, nènku òwò’s nsangilu yònsò nkòng wa Mifùndu. Kàdi, piikalaku cintu kampànda, cidiye mutàmbe kukina, m’Bwàkabuulwibwà ne Genèsè. Bwalu, Genèsè ùdi wàmba cibangidilu. Bwàkabuulwibwà bùdi bùbuulula cìikalà mwà kumwenzekela mu ditùkù dyà ndekeelu. Neàswikiibwe munda mwà bidimu cinunu; pashiishe yèyè, ne mupròfetà wa mashimi, ne nyama wa lwonji, nebiimanshiibwe, ne mwoyi, mu Dijiba dyà Kapyà.

<sup>95</sup> Nènku yèyè neàlwishe Mukànda wà Genèsè pa ne ùdi—ùdi mwikale wà bushùwà. Neàmbè, ne: “Ki ngwà cyà bushùwà to.” Nènku yèyè neasalakajè meeji à bantu. Tàngilàayi mwaba wùdi dyabulu ùsanganyiibwa, Mukànda wà Genèsè awu anyi Mukànda wà Bwàkabuulwibwà, wà kumpàla ne wà ndekeelu.

<sup>96</sup> Ne Mukànda wà Bwàkabuulwibwà ùdi ne bimfwànyì bipite bùngì mu òwò kutàmbe ne Mikànda mikwàbò yònsò yà mu Bible. Ùdi ne bimfwànyì bipite bùngì bwalu m’Mukànda wà cipròfetà. M’Mukànda wà cipròfetà. Ki bwà cinyi bìdi bikèngela bwà kuumvwibwawu kùdi kasùmbù kàà bantu kàà cipròfetà. Ewu Mukànda kî mmwenzela bantu bwònsò to. Kakwena muntu nànsha umwe udi mwà kuwùmvwà to, nànsha kakesè. Mukànda ewu mmwenzela kasùmbù kampànda kàà bantu. Lwà mu Dutèlònòma amu, Mbambe ne: “Bintu bisokoka bìdi byà—byà—



byà Mukalenge.” Ncyà bushùwà. Ne Yéyè ùdi ùtùbulwila twètù, bânà Bèndè, bintu bisokoka. Pa nànkù kabyena byenda. . .

<sup>97</sup> Meeji à musunya kaènakù mwà kuumwva maalu manène à mu Mifùndu aa to, bwalu mmakutakane bwàbò bôbò. Kàdi kùdì aba bàdi banangi bàà Dìyì dyà Nzambi, ki bàdi Mukàndà mufùndila, kùdì Èkèleeziyà. Dibuulula dyà Yesù Kilistò: “Kùdì èkèleeziyà ku Efèsò, kùdì èkèleeziyà wa Seemùnà, kùdì èkèleeziyà, kùdì maèkèleeziyà,” ànu nànkù. Dibuulula dyà Yesù Kilistò kùdì Èkèleeziyà. Mèmè ntu munange aci.

<sup>98</sup> Ne mònaayi, cidi kàbidi dikùmbana dyònsò dyà Mifùndu, dikùmbana dyà maalu ònsò mu kaabujimà. Nènku ncitèèkiibwe pa mwaba mwimpè, ku ndekeelu kwà Bible. Dibuulula dyà cintu cyònsò mu kaabujimà nditèèka paanyimà apa ne dibènesha kùdì udi uCìbala ne ùCìtèèleja, ne mulawu kùdì aba bàdi bàsàkidilaku anyi buumushilakù. Ki nsangilu ònsò mu kaabujimà, kaa, cyeyemenu aci. Cintu nànsha cimwè kacyèna mwà kusàkidiiBwaKù to. Nènku pàdi muntu uteeta kuumushilaKù cintu kampànda, anyi kusakidilaKù cintu kampànda, Nzambi mmwambe ne Yéyè ùvwa mwà kuumusha citùpà cimwècimwè aci mu Mukàndà wà Mwoyi. Nwamònu anyi? Ùvwa mwà kuumusha citùpà cyèndè mu Mukàndà awu, bu yéyè mwà kusàkidilaKù.

<sup>99</sup> Ki bwà cinyi, patùdi tumòna mishindù yà Dibuulula dyà Mukalenge wetù, mùdiYe, cidiYe, muntu nànsha bamwamba ne nganyi wadidìnga kusàkidila ku Aci anyi kuumushilaKù kantu kampànda, ncipròfeta cyà mashimi. Bààbùngì bakaadi bateetètèete kwamba ne bàvwa ne cintu kampànda paanyimà pàà Cyòci aci. Kàdi Aci ki Dibuulula mu kaabujimà dyà Mukalenge Yesù mu cikondo Cyèndè cyà èkèleeziyà ne mu Ditùkù Dyèndè, Dibuulula dyà Mukalenge wetù.

<sup>100</sup> Mpindyewu—mpindyewu, *kubuulula*, mwaku wa cyena Ngelika, cintu kampànda citu cisokoka, cibuul-. . . “cibuulula” Kilistò.

Mpindyewu, mvensa udi ulonda awu, tudi tusangana, mu mvensa mwi2.

<sup>101</sup> Mvensa wa 1 udi ubuulula Kilistò, Dibuulula, anyi dibuuludiibwa. Kaa! Mùshindù mwine wùvwa cikondo cyà ndekeelu ne Dilwa dyà Mukalenge biikale kabìy-. . . biikale bibwikila, kùdì bapostòlo’s wè! Bààkeela lukonko alu, kàdi umwèpelè ngwakashààla ne mwoyi bwà kupeta Dibuulula adi’s. Nènku kàbidi, kàvwa nànsha mucyumvwe to, bwalu bwalu-bulonda abu kabuvwa bwanji kwenjibwa to.

<sup>102</sup> Mpindyewu, bwalu-bulonda bwà Mukàndà ewu, anyi dyu—dyumvwija dyà Mukàndà ewu, bìvwa byambila èkèleeziyà mwandamutekète mu Asie Mineure, yìvwa ku mu ciine cikondo aci’s. Bivwa byambila èkèleeziyà mwandamutekète ayi. Kuvwa èkèleeziyà mipite kutàmba mwandamutekète ayi, mu ditùkù adi.

Kàdi dínà yònsò wa ku èkèleeziyà ayi uvwa mukumbanangane ne ngiikadilu wa mu èkèleeziyà awu amu, uvwa mufwànyine kumulondesha mu cikondo cyònsò, ngiikadilu wa èkèleeziyà awu. Bu mùdi wa Efeso, ùvwa ne ngiikadilu kampànda. Seemùnà, Peegàmò, ànu nàнку, Filàdèlèfiyà, yònsò wa ku èkèleeziyà ayi ùvwa ne ngiikadilu munda mwèndè amu, uvwa mufwànyine kumweneka cyàkàbìdi mu bikondo bìcìvwà bilwa. Kaa! Bu wèwè ànu mwà . . .

<sup>103</sup> Muntu kanà yònsò ewu ùdi mwà kumòna ngangàcìlù wa— wa mu nyumà wa Mifùndu ne mufwànyine kwamba ne yòyi kayìvwa misonsoala anyi? Cyenzedi cyèbè wèwè mwine, kabingila kiine, twipàcìlà mene twà bantu atu, mòna's, s'bidì bijaadika ne Mufùndu mmusonsola, pa kumòna mùshindù ùdi Nzambì ukumbaja bintu abi. Cinùdì ànu nwenza, *apa* eci, ncimfwànyì cyà cintu kampànda.

<sup>104</sup> Bu mùdi Abraham ùlambula Izàkà, mwanèndè umwèpelè wa balùme; cimfwànyì cyà Nzambì ùfila Mwàn'Èndè, nkama yà bidimu mimane kupita. Mùshindù ùvwa Yòzefù musùmbishìibwe ne mwediibwe mu buloko, mukinyìibwe kùdi bânà bààbo ne munangìibwe kùdi tatwèndè; Yesù's, mu cimfwànyì. Muvwa Nyumà mukwate mudimu munda mwà Yòzefù, muntu wetù ewu, kàdi mwikàle ulèeja cimfwànyì cyà nsòmbelu wa Kìlistò, ànu menemene. Mùshindù, Davidi, ùvwa Mwànà wa Davidi musòmbe pa mukùnà ùmwèùmwe awu's. Pààkabèngiibwà Davidi bu mfùmù ne pààkabàndàye pa kakùnà aku, Mukùnà wà Olèvà, kutàngila paanyimà, ùdila, bu mfùmù mubèngiibwe; nkama yà bidimu ndambù paanyimà pàà aci, Mwànà wa Davidi wàkabànda kakùnà kòkò kàmwèkàmwè aku, bu Mfùmù mubèngiibwe, ne wàkadidila Yèlusàlèrà. Nyumà mu cimfwànyì ne mu mmwenekelu. Kaa!

<sup>105</sup> Dìbà adi nudi mwà kumòna Èkèleeziyà munène wa mpenta awu mu ditùkù dyà ndekeelu edi anyi? Nudikù mwà kumòna mùvwà Nzambì mumubanjije mu Ditùkù dyà Mpenta anyi? Bìvwa bìkèngela bwà Nyumà awu kushààlayè mu Èkèleeziyà munda mwà bikondo byònsò.

<sup>106</sup> Bakaadi ne bintu byà kwìsùkwìsù ne kabàyi bacyùka maalu to. Byàkakèngela biikale ne dìngumba. Byàkakèngela bwà bòbò kusangisha èkèleeziyà ne mbùlàmatadi pàmwè, ne ndekeelu wa byònsò bààkacyènta ne bààkatwala nkàmà yà bidimu byà dikengeshiibwa. Pashiishe, Dilongolola, bààkapàtuka. Nènku cidimu cyònsò, bàvwa benda buumusha byà Nyumà ne bàsàkidilakù byà mubidi, bàkose byà Nyumà ne bàsàkidilaku byà mubidi, mu mùshindù wà ne mpindyewu bakaadi pabwìpi ne kucyenza cyàkàbìdi. Tudi ne mwoyi mu mèbà à ndekeelu aa, à dyoya edi, dikùmbana dyà maalu ònsò à èkèleeziyà. Tudi mu Filàdelefiyà . . . anyi mu Cikondo cyà Èkèleeziyà wa Laòdikiyà.

<sup>107</sup> Mpindyewu, nshapita wa 1, mvensa wa 1, wàkafdiibwa

kùdì—kùdì Yone. Mpindyewu, mufùndi nganyi? Yone. Yone. Kacivwa dibuulula dyà Yone to, ne tudi bamanye ne kabivwa nàнку to, bwalu civwa n’Dibuulula dyà Mukalenge Yesù Kilistò. Yèyè ùvwa eci, yèyè wàkasungudiibwa bu muyiidi. Ne Mukàndà Wòwò mwine ùdi ùbuulula cintu civwàku, Yesù Kilistò, kuvwaYe ùbuulula.

<sup>108</sup> Nènku wàkatùmiibwa kùdì. . . “Ne wàkamanyisha eci kùdì mwanjèlo wendè kùdì Yone.” Katwèna bamanye ne mwanjèlo awu uvwa nganyi to. Bible kèna wamba ne mwanjèlo awu uvwa nganyi to. Kàdi tudi bamanye ne ùvwa mmupròfetà, bwalu Bible mmwambe pashiishe, ne: “Mémè Yesù ndi mutùme mwanjèlo wanyi bwà kufila bujaadiki bwà maalu àdi ne cyà kukùmbana mu citùpà ciipi eci’s.”

<sup>109</sup> Pashiishe tudi tujandula ne pàkaavwà Yone ukeba kukuukwila mwanjèlo awu, mwanjèlo wàkamba ne: “Mòna ne kwenji nàнку to.” Bwàkabuulwibwà 22, ngeela meeji ne mmwómò. Ki yèyè ne: “Bwalu mémè ndi musadidi neebè ne umwe wa ku bânà bèènu bapròfetà.” Ùvwa mufwànyine kwikala Eliyà. Ùvwa mufwànyine kwikala umwe wa ku bapròfetà. Yone uvwa mùpostòlò. Kàdi mupròfetà ewu uvwa mutumiiibwe.

<sup>110</sup> Nènku Yone, bu mùvwàye mùpostòlò, tàngilàayi ngiikadilu wa mikàndà yèndè mifundilangana ayi, yijaadika ne kavwa n’Yone wàkacifùnda to, bwalu kacivwa ne ngiikadilu bu wa Yone to. Angataayi Yone wa Kumpàla, Yone Mwibìdi, ne bikwàbò, nuyibale. Nènku tàngilàayi ngiikadilu waayi, pashiishe tàngilàayi ngiikadilu wa eci. Yone ùvwa mufùndi ne ùvwa mùpostòlò, kàdi eci nnyumà wa mupròfetà. Mmuntu mushiilàngàne, ànu byà menemene. Nwamònu anyi? Kacivwa mifùndu yà Yone to. Kacivwa dibuulula dyà Yone to. Civwa n’Dibuulula dyà Nzambi dyà Yesù Kilistò kùdì maèkèleeziyà. Nènku civwa ne. . . Yone ùvwa ànu mufùndi cyanàànà, mufùndi’s, ne—ne Mukàndà ùdi wamba cintu cimwècimwè aci.

<sup>111</sup> Mpindyewu, kabivwa bitùmina Yone to. Bivwa bitùmina Èkèleeziyà. Eyo. Yone, pa diine dîbà adi, ùvwa mpaasàtà wa èkèleeziyà wa Efèso. Nènku mpindyewu Mukàndà mmutùmina Yone. . . anyi mutùmina èkèleeziyà, kî n’Yone to.

<sup>112</sup> Mpindyewu mvensa mwi3, Ùdi ùmanyisha dibèènesha. Tèlejàayaaku eci nùнку.

*Wa disànkà ng’ewu udi ubala, ne aba bàdi buumvwa mèyi à cipròfetà eci, ne balama maalu àdi mafùndamù: bwalu cikondo cikaadi pabwìpi.*

<sup>113</sup> Ncikondo kaayi cikàadi pabwìpi? Cikondo cìdi bintu ebi byenzeka, pàdi Dibuulula dyà Yesù Kilistò edi dijikijiibwa mu cikondo ne cikondo cyànso cyà èkèleeziyà.

<sup>114</sup> Mpindyewu cìdiYe mucifùndile mùshindù ewu. Bu yèyè mwambe ne: “Èè, mpindyewu, Yèyè. . .” Bavwa baMwindile; bu

ne cívwa cibүүлùdìibwe, bu Yèyè. . . bu ne cívwa cibүүлùdìibwe kùdì Yone, bwà ne Úvwa ne cyà kulwa ànu pàvwà èkèleeziyà ne yàjìkìèè. Ki mwàkadyàmbedilaci Yone's. Kàdi bu byòbì nàнку, èkèleeziyà ayi, pavwayi ànu ne yàjìkì, yívwa yilwa. . . Bu yèyè mumanye, bu byòbì bimubuulwila ne kùvwa ne cyà kwikala bikondo mwandamutekète bileebilè byà èkèleeziyà, bidimu binunu byàbùngì, anyi nkàmà ya bidimu bùngì cyanààna, dìbà adi kakuvwa kufwànyìnekù kwikala kabingila nànsha kàmwè kàà dindila to. Bòbò's bàvwa bafwànyìne ànu kwikala benze maalu à cyàbo cikondo cyà èkèleeziyà.

<sup>115</sup> Ki bwà cinyi, Nzambì ùvwa mucyàmbè, kàdi kacívwa cibүүлùdìibwe kùdìbò to. Kacívwa cibүүлùdìibwe kùdì Martin Luther to, bintu bìvwà John Wesley mumanye pa Mifundu abi's. Ki mbìbuulùdìibwe kùdì ba-Baptistes, bìdì beena Mpenta bamanye pa Mifundu to, bwalu bìdì mu cikondo cishiilàngàne. Ncikondo cishiilàngàne. Ne Nzambì ùtu ùbuulula maalu Endè ànu mu movù wààwù. Kaa!

<sup>116</sup> Kwèna mwà kukuna matalà mu movù wa bintu bitoloka ne kunowa ànu musangu ùmwèùm wè awu to. Udi ukuna dimiinu ne didi dītòloka too ne ku diboba. Nzambì ùdì ùkùna Dîyi Dyèndè ne pashìishe Didi dītòloka. Ne pashìishe tudi tutàngila paanyimà twamba ne: “Dìvwa aci.” Mòna's, cyà bushùwà, tudi tuDìmòna paanyimà pàà Dimane kubuuludiibwa.

<sup>117</sup> Mpindyewu: “Babèneshìibwe,” Dîyi, dimanyisha dyà dibèneshà, pa mvensa mwi3 ne: “kùdì aba bàdì babala anyi batèèleja maalu masokoka ààdì.”

<sup>118</sup> Enza. . . meeji à musunya acyèpuka, bwalu meeji à musunya kì mmamanye kantu nànsha kàmwè pa bwalu abu to. Kabyena bikèmesha to pàdì meeji à musunya kaàyi macimanyè to, bwalu n'Sàtaanà mu meeji à musunya awu. Nèku Sàtaanà mmwedìibwe patòòke, ne Sàtaanà kàtu muswè bwà kwediibwaye patòòke.

<sup>119</sup> Nudi numòna mùdìbi byenza Sàtaanà bwòwà pàdìye wela meeji ne neèdìibwè patòòke anyi? Tàngilàayi mu dimwè dyà ku masangisha. Tàngilàyi numòne cyenzedi cyà bantu. Tàngilàayi pambelu, mu disangisha amu. Pabwìpì menemene ne Sàtaanà kwedibwayè patòòke, pa muntu kampànda, s'nudi mwà kumòna mùdì kwìsù kwèndè kùshintuluka's. Nudi numòna's, kì mbamanye cyà kwela meeji to. Dyàkàmwè, Nyumà Mwìmpè ùdì ùpweka ne ùtandula démon awu. Kaa! Yèyè's ùtu ukina disangisha dyà mùshindù awu's. Ki bwà cinyi tudi bapetè mvità yà mùshindù awu's, mbwalu Dîyi dyà Nzambì dìdì ditandula dyabùlù. Nwamònu anyi? Dyòdì ndidì dyàmba cidiye.

<sup>120</sup> Bu mùdì wamba ne: “Mukàjì udi musòmbe apa ewu,” ku disonsodiibwa dyà Nyumà Mwìmpè, wamba ne: “dìna dyèndè m'Mandemwanzele Jones. Mmufùmine ku Mwaba kampànda.”

Acì cìdi cyènza cinyi? Cìdi cibakula nyumà wendè, cimufikisha mu mwaba kampànda.

<sup>121</sup> “Wámmani munyi? Muntu awu kî mmumanya mémè to, nànkus cidi ne cyà kwikala nyumà kampànda. Nnyumà wa mùshindù kaayi?”

“N’Nyumà wa Nzambi’s.”

“Mmunyi? Mbwalu kaayi ebu kúndi?”

<sup>122</sup> “Udi ne òsaamà dyà cyâdì, kansêrè,” nànsha ciikàle cinyi, “kadi EMU MMÜDÌ MUKALENGE WÁMBA . . .”

“Kaa!” Kaa, mùshindù mwine ùdi Sàtaanà ukina ciine aci’s, bwalu Cìdi cimutandula.

<sup>123</sup> Mpindyewu, meeji a musunya’s adi àtàngila, àmba ne: “Ndibala dyà meeji à mu mutù, lubùku.” Ki mbamanyè to. Ncikutakane bwàbo bôbò.

<sup>124</sup> Kàdi bwà aba bàdi bamanyè Cìdici, kaa, dibènesha kaayi’s wè! Ncinyi ciine aci? Dibuulula. Dibuulula dyà nganyi? Dyà muntu udi ku cyambilu anyi? Dyà Yesù Kilistò mu cikondo cyà ndekeelu cyà èkèleeziyà eci, mwikale uDibuulula yêyè mwine mùvwàYe mulaye ne Neènzè. Nwamònu anyi?

<sup>125</sup> Ndibuulula, nwamònu’s, ne Sàtaanà ùtu ukina aci. Èkèlekèle, mùshindù mwine udiye ùcikina’s wè! Yêyè mmutandùdiibwe, citandula ndongamu wendè. Sàtaanà ùtu ùkina Bwàkabuulwibwà ne Genèsè, ndi mufunde kaaba aka. Ncyà bushùwà menemene.

<sup>126</sup> Mpindyewu, yêyè ùdi ukina dibuulula bwà cinyi? Bwà cinyi yêyè ùdi ubèngangana ne dibuulula’s? Mbwalu kakùyi tuseku to nsangilu yònsò nkòong wa Díyi dyà Nzambi ne Èkèleeziyà wa Nzambi mbiibakila pa dibuulula.

<sup>127</sup> Kabyàkwikala ku dilonga dyà—dyà tùlaasà, nànsha twètù biikale ne sèminèrè milenga ya bishi. Mbaalukile kule be mu cikondo cyà mifitù. Kakùyi mpatà to Bible ne Èkèleeziyà n’dibuulula.

<sup>128</sup> Tubuululàayi, ndi ne ndambù wa Mifundu mifunda kaaba aka, Maataayi, nshapità wa—wa 16 ku mvensa wa 18. Tùtapàayi ànu dísù kakesè—kakesè cyanàànà mu Maataayi 16:18, tumòne mwaba udi Mifundu ayi, mwaba ùdi dibuulula. Úpweka ùfùmina ku mukùnà, ku mvensa wa 17.

*Ki Yesù kwandamuna ne kumwambila ne: Udi mubènèshùbwe, Simona wa Bàà-Yona: bwalu ki mmunyiiinyi ne mashi bìdì bìkubuulwileci to, kadi Taatù wanyi udi mu dyulu.*

*Nènku ndi nkwambila...wêwè ne...wêwè udi Peetèlo, kadi pa lubwebwe elu mémè nèngiibakilepu èkèleeziyà wanyi; ne biibi byà iferno kabyàkumutàmba bukolè to.*

<sup>129</sup> Mpindyewu, èkèleeziyà wa Kàtòlikè ùdi wàmba ne: “Yèyè mumwibakile pa Peetèlo.” Èè, aci, ncyà bushùwà ne aci’s ngeelelu wa meeji wa mu musunya’s. Kwena mwà kudifwànyikijilaku bwà ne ngeelèlu wa meeji wa nyumà ùdi mwà kuumvwa cintu bu nàнку to; mùdi Nzambì, ne Mwàn’Èndè Sungasunga mwimane mwaba awu, kàdi mufwànyine ànu kwibakila Èkèleeziyà Wendè pa muntu wetu wa patupù, bu bantu bònsò, mulela mu mpèkaatù ewu. Muntu awu kucijaadikaye. Yèyè, mwikàle ne nyumà ùmwèùmwe awu pambidi pèndè, wàkeela Yesù mulawu ne kuMuvilayè ànu mwìsù Mwèndè amu’s. Kacìvwa Peetèlo to.

<sup>130</sup> Anyì, kacìvwa nànsha mene lu—lubwebwe kampànda lùvwù lusanganyiibwa mwaba awu, bu mùdi èkèleeziyà mikwàbò yàmba ne ki mùvwàbi to. Kacìvwa lubwebwe to. Bwalu, Peetèlo . . .

<sup>131</sup> Lubwebwe lùvwàYe wàmba mwaba awu alu, kalùvwa Peetèlo nànsha, anyì Yèyè mwine to.

<sup>132</sup> Mpindyewu, bantu bààbùngì bàà mu beena Mishòònyì bàdi bàteeta kwamba ne: “Cìvwa n’Yesù. Cìvwa mpa Yèyè pààkiibakilaYè Èkèleeziyà awu. Yèyè!” To, aci’s cìcidi ànu ntùpàkànyì. Nwènu bamòne, kacìvwa Yesù to, anyì kacìvwa nànsha Peetèlo to. Cìvwa ndibuulula.

. . . *ki mmunyinyi ne mashi bìdì bikubuulwile eci to, kàdi Taatù wanyì udi mu dyulu ngudi mufile dibuulula edi.*

<sup>133</sup> Tàngilààyì. Ndi muswè kunùkonka. Mu budimi bwà Edènà, kamùvwa Mifùndu mifùnda to. Nènku pashiishe ke bàna bàà balùme bàbìdì abu, Kaayina ne Abèlè, ne bònsò bàbìdì bàvwa bajinga kufila mulambu bwà kwanyishiibwa kùdi Nzambì. Pààkenzabo nàнку, Kaayina wàkalwa ne kwibakayè cyoshelu; Abèlè wàkiibaka cyoshelu. Èè, pìikalabi ne aci ki cyònsò cìdì Nzambì ùlòmba, Nzambì’s mmufwànyine kwikala ne kànsungànsungà bwà kupiisha Kaayina. Èyo. Pashiishe Kaayina kufilaye mulàmbù; ki mwakenza Abèlè. Bònsò bàbìdì bààkafila mulàmbù. Kaayina kukuukwilaye, ne ke mwà kenza Abèlè pèndè. Kaayina wàkenza cyònsò cyàkenzà Abèlè aci.

<sup>134</sup> Nàнку awu pìikala kuya kwà mu èkèleeziyà, kushààla wa mu èkèleeziyà, kufila milàmbù, ne kusambila, ne kukuukwila Nzambì, ki cyònsò cìdì Nzambì ùlòmba, dìbà adi Nzambì mmufwànyine kwikala ne kànsungànsungà bwà kupiisha Kaayina bwalu wàkenza ànu menemene byàkambaYe bwà kwenza abi.

<sup>135</sup> Kàdi, nudi numòna’s, Abèlè, ku dibuulula, wàkamanya ne kacìvwa mamuma àvwà mabàpàtule mu budimi bwà Edènà to, bu mùdi meeji à musunya àbùngì enza leelù ewu. Abèlè kulwaye ne kulàmbula mamuma à mu buloba abu, kàdi Nzambì kubìbengaye, kàdi cyàkabuuludiibwa . . . Ndi muswè

kwamba ne, Kaayina ngwâkacyenza, nùmfwileku luse. Kaayina wàkalàmbula mamuma à mu buloba bwalu yéyè wàkadyelela meeji ne ki cyàkabàpàtulà mu budimi bwà Edènà's. Tàngilààyi dibuulula adi's. Tàngilààyi dipangilangana dyàdi. Tàngilààyi mùdidi dyenza bibi leelù ewu's. Kàdi kabivwa bimuma bivwà bibàpàtule to. Evà kààkadyaku bimuma byà pomme to. Cyà bushùwà's. Mmunyi mwàkafikàye ku dimanya ne ùvwa butakà, piikalabi ne ndidyà dyà pomme? Cìvwa nku disangila dyà mulùme ne mukàji. Ki cìvwàci ne cyà kwikala!

<sup>136</sup> Mpindyewu, tudi twangata aci bu dilonga, nènku tudi ne, twalukilamù. Kabeena ne Mufùndu nànsha wùmwè to.

<sup>137</sup> Bàmwè bàà kudibo bàdi bàmba ne: “Èè, yéyè's mmwàmbe ne: ‘Ndi mupete mwànà wa balùme wa kùdi Mukalenge.’” Èyowà's, mukalenge. Ki mùdi ndumbà wàmba pèndè. Nzambì ke udi ne cyà kufila mwoyi wònsò ewu's.

<sup>138</sup> Kàdi's mmwoyi munyangakaja. Tàngilààyi ngiikadilu wa mwànà wa balùme awu. Ùvwa wa tatwèndè, dyabùlu awu's; mwena lukinu, mwena lwonji, mushipyanganyi. Nwamònu anyi?

<sup>139</sup> Nènku pashiishe mmunyi muvwabi ne, Abèlè, pàvwàbo. . . baledi bèndè bàvwa pàmwàpa bamwambile ne—ne micì yìkaavwa mikwame bimuma, ne bikwàbò. Kàdi, cyàkabuuludiibwa kùdi Abèlè. Abèlè wàkaya kangata mwànà wa mùkòòkò, bwà mashi, wangata mwoyi. Kì mmuci wà bimuma, ukwama pomme ne bibote ne poire to. “Kàdi Abèlè, ku dibuulula dyà nyumà,” Ebèlu 11, “wàkalàmbula Nzambi mulàmbu mwìmpè mutàmbe. Nzambì mwikàle ùwùfidila bujaadiki, bwalu wàkabuuludiibwa kùdiye ku diitabuuja.”

<sup>140</sup> Ki mwaba wàkiibakila Nzambi Èkèleeziyà Wendè awu. “Bwalu kì mmusunya ne mashi bidì bikubuulwile eci to.” Kacya kùtu muCìlonge mu sèminère to. Muntu kì mmukulongesheCi mu mwaba kampànda to. “Kàdi Taatù wanyì udi mu dyulu ngudi mukubuulwileCi.” Mwaba awu, cintu cyònsò mu kaabujimà cidi mu dibuulula, Èkèleeziyà mujimà, “Pa lubwebwe elu lwà Dibuulula dyà Yesù Kilistò, Nèngiibakilèpu èkèleeziyà wanyì.”

<sup>141</sup> Udi mufwànyine kwangata cidi mpaasàtà wàmba. Udi mufwànyine kwangata cidi sèminère ùlongesha. Udi mufwànyine kwangata cidi èkèleeziyà wàmba. Ne kì mbyanjì ànu kukumbana to, nànsha nàнку. Udi mufwànyine kwikala mukumbane mwà kucyùmvwija ne ngààkwilu wa kapelu. Kàdi pàdi ànu Nzambi kàyì mukubuulwile ne Yesù Kilistò m'Mwàn'Èndè, ne wèwè musùngidiibwe ku Mashi Èndè; pa dibuulula adi, dyà ne: “Yéyè ki Musùngidi wanyì.”

<sup>142</sup> “Pa lubwebwe elu Nèngiibakilèpu Èkèleeziyà Wanyì, ne biibi byà iferno kabyèna mwà kumutàmbe bukolè to.”

<sup>143</sup> Pa nàнку nudi numòna bwà cinyì Sàtaanà ùdi ùbengangana ne Mukàndà wà Bwàkabuulwibwà. Cyònsò cidi cibuuuludiibwe, dibuulula dyà nyumà, Sàtaanà ùdi ùbengangana naaci. Ki bwà

cinyi yêyè udi ulwishangana ne mudimu wà bwambi leelù ewu. Bwalu, ncinyi ciine aci? Dibuuludiibwa dyà Kilistò.

<sup>144</sup> Èkèleeziyà àtùngunukè ànu ne mângumba èndè manène awu ne malongolodi awu, ne tuumayiisha twèndè tukesè tulengeja ne bikwàbò. Bàlekelaayi bàtùngunuke, Sàtaanà kàakubàtácishaku to. Kabeena ne ntatu to. Bantu bônso's bàdi bàbàtuuta tuumapi paanyimà.

<sup>145</sup> Pàdiku kulwa cikondo cìdi Nzambi, ku Nyumà Mwímpè, ùbuulula Kilistò mu Èkèleeziyà amu, ne bukolè ne dilleja dyà patòòke dyà dyondopiibwa dyà babèèdì, ne wenza bwà bimanyinu byàkambaYe ne bivwa mwà kulonda beena kwitabuuja, kwenzekabi, dîbà adi Sàtaanà ùdi ùbinduluka's. Yêyè ùdi wenza cintu kampànda pa bwalu abu. Too ne pa diine dîbà adi, Sàtaanà kèna ucyùka èkèleeziyà kùdi mudiswike to. Nànsha wèwè mudileeje wa bishi. Kàdi pàdi Kilistò ukubuulwila ne Yêyè ùdi Mwànà wa Nzambi, ne byenzedi byàkenzaYe udi ubyènza pèèbè; kaciyi byenzedi bikwàbò to, kàdi byenzedi bimwèbimwè abi.

<sup>146</sup> “Ewu udi ungiitabuuja mèmè...” Yone Munsantu 14:7. “Ewu udi ungiitabuuja mèmè, byenzedi bîndì Mèmè ngènta neàbyènzè pèndè. Wenza byenzedi bimwèbimwè abi, ne binène bipite ebi.” Bwalu, Kilistò kàvwa mufwànyineku kuyiisha dibatiiza dyà Nyumà Mwímpè to, mbifwànyine kwikala bitàmbe bunène. Kavwa mwà kubatwadilaci to, bwalu Nyumà Mwímpè kàvwa mwanji kwikala mufidiibwe to. Kàdi pàakalwà Yesù ne kufilayè Mwoyi Wèndè, ki Nyumà Mwímpè kwalukilayè, dîbà adi bàvwa mwà kufila Mwoyi wà Cyendèlèlèlè kùdi bantu. Ke “citàmbe bunène ncyàci”.

<sup>147</sup> Kàdi bimanyinu ne maalu à kukema, Yesù wàkamba bitòòke tòò, mu Maako 16 ne: “Ndàayi pa buloba bujimà, nùkayiiishè cifùkiibwà cyònsò èvànjeeliyò.” Too ne penyì? Pa buloba bujimà. Mbanganyi? Cifùkiibwà cyònsò. Pàcidi ànu Èvànjeeliyò uyiishiibwa, bimanyinu ebi nebifile bàdi biitabuuja. Nènkù pàdi aci cilwa dibuulula, mwanèètù, wèwè udi pabwîpi ne Bukalenge dîbà adi. “Pa lubwebwe elu Nèngiibakilèpu Èkèleeziyà Wanyi, ne biibi byà iferno kabyèna mwà kumutàmbe bukolè to.”

<sup>148</sup> Bwalu, mulùme anyii mukàjì ukààdikù mu cipèèlè cyà kale cyàcya nkàayende, bu mùvwà Mòsà amu, ne dibuulula dyà Nzambi dimwènèshiiibwe kùdiye ku Nyumà Mwímpè, kàkwèna cìdi mwà kumunyungisha to. Yêyè mmushindame ne mukolakane ànu ne mwèndè mwònsò.

Sàtaanà ùtu ukina Dibuulula. Kàtu mudinange to, nànsha kakesè; dìdi dinyangakaja ndongamu yèndè.

<sup>149</sup> Ngiikadilu wa Mukàndà ùdi ùleeja ne Yone kî nguvwa muwùfunde to. Ncyà bushùwà. Bwalu yìdi–yìdi bwà bakwàbò... Mmifundu yèndè, kàdi kî ndisonsodiibwa dyèndè



nànsha. Ndisonsodiibwa dyà Nzambi didi difunde Mukàndà. Èyo.

150 Tumònààyiibi cidiwu wamba mpindyewu's.

*Wa disànkà ng'ewu udi ubala, ne aba bàdi bumvwa . . .  
ciprófetà eci, ne bálama maalu àdi mafùndamù: bwalu  
cikondo cikaadi pabwìpi.*

151 Mpindyewu: “Cikondo cikaadi pabwìpi.” Cinyi? Pàdi Dibuulula mu kaabujimà dyà Yesù Kilistò dimanyishiibwe kùdi èkèleeziyà Yèndè's. Nènku bu mùdi bikondo byènda bitungunuka, didi ànu dibuulùdiibwe kudibo.

152 Mpindyewu tukaadi ku cikondo cyà nshùkidilu, nènku mpindyewu tukaadi bulelèlè ku nshùkidilu wa buloba. Tudi ku dikumbana dyà maalu ónsò dyà maalu-malonda àa buloba. Nènku kumpàla kwà lumingu elu kujikalu, ne bu Nzambi mwà kwikala neetù, mwà kutùkwacisha, netùjaadike ne tudi ku dikumbana dyà maalu ónsò dyà bikondo byà èkèleeziyà. Tudi mu Filàdèl- . . . anyi mu Cikondo cyà Èkèleeziyà wa Laòdikiyà, dikumbana dyà maalu ónsò dyà bikondo byónsò. Tudi ku dikumbana dyà maalu ónsò bwà maalu àa cidiidi cyà buloba. Tudi ku dikumbana dyà maalu ónsò dyà—dyà buloba bwètù ebu. Tudi ku dikumbana dyà maalu ónsò dyà bintu byónsò. Tudi ku ndekeelu wa cintu cyónsò cyà mu bufùki, badilongòlole bwà kubwelamù.

153 Ditùkù dikwàbò ngènda ndwa, ngeela meeji ne mvwa munkaci mwà kuya ku Shreveport, anyi kulwila mwaba kampànda. Mémè kutàngila. Mémè ne: “Mici's ki kufwayi eku. Mashinde's ki kufwawù eku. Bilòngò ki kufwabi eku's. Ndi munkaci mwà kupùnga ne lufù. Buloba bìdi munkaci mwà kupùnga ne lufù. Byónsò bìdi munkaci mwà kupùnga ne lufù. Bintu byónsò pa buloba ebu bìdi munkaci mwà kupùnga ne lufù.” Tudi basómbe mwab'ewu mu dìndà emu, munkaci mwà kupùnga ne lufù.

154 Ncyà bushùwà ne kudi buloba mwaba kampànda, mùdi bintu byónsò kabiyi bifwa to. Pìikalaku buloba mwaba ùdi bintu byónsò bìpùnga ne lufù, kùdi ne cyà kwikala bùmwe mwaba ùdi bintu byónsò ne mwoyi. Ki citùdi tujinga ncyòci aci, bwà kufika mwaba mu awu mùdi. . . mici yidi yishààla kayiyi yifwakù to. Kaa, mwaba ùdi bintu byónsò kabiyi bìfwakù to kàdi biimane mu—mu butùmbi bwà Nzambi.

155 Mpindyewu, mpindyewu, mvensa yìsatu yà kumpàla yitùvwà naayi mpindyewu ayi, mmitèèke mwaba wa kushindamijila bitùdi twamba. Wa 1 ne: “Dibuulula dyà Yesù Kilistò.” Mwi2 ne: “Dyàkafidiibwa kùdi Yone kùdi mwanjèlo.” Ne mwi3, ùdi ne: “Wa disànkà, dibènesha kùdi aba bàdi babala, ne,” pawikala kùyi mwà kubala to, “wa disànkà ng'ewu udi umvwa.” Kwèna mwà kubala anyi? Udi uCitéèleja ànu cyanàànà. Kwajiki. “Wa disànkà ng'ewu udi ubala, ne,” pawikala kùyi mwà kubala

to, “wa disànkà ng’ewu udi umvwa, bwalu cikondo cikaadi pabwìpì.”

<sup>156</sup> Mpindyewu, cinkaayibi cìdì nsangilu wa eci umvwija, ngwa ne, Yone, mufùndi awu, mudicifùnda, uvwa... *Ewu* n’Yone mwaba ewu, wàmba ànu “mabènesha” ne bikwàbò. Mpindyewu, cìndì ngeela meeji ne civwa, mu Dipungila Dikulukulu, mmwakwidi ùvwa wiimana mu dindà ne ùbala Mifùndu. Disangisha òvwa ditèeleja. Bààbùngì kabàvwa mwà kubala to. Pa nàнку kwambàye ne: “Wa disànkà ng’ewu udi ubala, ne ewu udi umvwa.” Nwamònu anyì? Mubadi ne muumvu; ewu udi ubala, ne uumvwa, mmubènèshìibwe. Pa nàнку wèwè ànu musòmbe ne mucitèeleje, udi mubènèshìibwe. “Wa disànkà ng’ewu udi ubala, ne ewu udi umvwa, bwalu cikondo cikaadi pabwìpì.”

<sup>157</sup> Mpindyewu, kuumukila ku 4 too ne ku 6 ndyela dyà Èkèleeziyà mwoyi. Mpindyewu tudi baswè kwangata mwi4 ne mwi6 ewu.

<sup>158</sup> Mpindyewu, kumpàla kwà twètù kumulenga, ndi muswè bwà muntu ne muntu ateete bwà kwela meeji bikolè mpindyewu. Ncinyì ciine aci mpindyewu? Ndibuulula dyà Yesù Kilistò, mwaba wàkuumusha Nzambì cibwikilu cyà cikondo. Ki cikondo ncyòci *eci*, civwa Yesù kàyì mwà kumòna pàvwàYe pa buloba apa, bikondo byà èkèleeziyà, civwà mwà kwenzeka. Pa nàнку, Nzambì kuumushaye cibwikilu aci, kucipulumuna, kàdi kulekela Yone utàngilamu bwà kumòna civwa cikondo cyònsò cyà èkèleeziyà ne cyà kwenza, ne kucifùnda mu mukàndà ne kucitùminaye èkèleeziyà mwandamutekète.

<sup>159</sup> Ncinyì ciine aci? Kilistò mubuulùdiibwe mu matùkù à cyenzi Cyèndè—Cyèndè. Mmùle tente ne cyenzi, Mukàndà awu’s. Nèнку m’Mukàndà wà—wà cipròfetà ùdi Kilistò mufile, Nzambì mmutùpèele kùdi mwanjèlo Wèndè, mufùnda kùdi Yone. Ne dibènesha kùdi muntu yònsò wikala mwà kuWùbala anyì kuumvwa bàWùbala, bwalu—bwalu cikondo cikaadi pabwìpì pàdi eci cyònsò cikumbana.

<sup>160</sup> Tudi ne nshindameenu mwìmpè mpindyewu. Kàdi vùlukààyì ne, tudi balame Èkèleeziyà mu meeji. Ku luseke lùmwe, Èkèleeziyà kubangayè; ku lukwàbò luseke, èkèleeziyà ùdi ùjika. Netùtambe kubwelamu, mu òmwè dilòlò, patwàlenga bikondo byà èkèleeziyà.

*Yone kùdi èkèleeziyà mwandamutekète yidi mu Asie: Ngàsà ikale kunùdi, ne ditalala, byà kùdi ewu udiku, . . . uvwaku, ne udi ne cyà kulwa; ne byà kùdi Nyumà mwandamutekète yidi kumpàla kwà nkwaswa wa butumbi aji.*

<sup>161</sup> Mpindyewu tudi tubwela mu bitùpà bidì kabìyi byùmvwika ne byà ndondo byà bimfwànyì abi. Mbambila èkèleeziyà mwandamutekète yidi mu Asie Mineure. Bavwa ne—bavwa

ne. . . Bi—bikondo, pa diine díbà adi, bivwa ne cyà kulwa mu matùkù àcívàwà alwa. Kì kubazàngikaye ne—ne kubatumbisha bwà mudimu wabo ne byàkenzàbo. Kàdi, mpindyewu, mbambila èkèleeziyà ayi's, èkèleeziyà mwandamutekète yìdì mu Asie Mineure ayi's.

<sup>162</sup> Mpindyewu, Asie Mineure kàvwa Asie musanga ntete nànsha, cipaapu cyà buloba cyà Asie. Civwa ànu citùpà cikesè cyanàànà. Bàdi bàmba ne, mmwaba wa bunène bwipacila État wa Pennsylvanie ewu, nwamònu's, anyi cintu bu nànkù awu, anyi Indiana; ànu kaaba kakesè cyanàànà kàdi èkèleeziyà mwandamutekète eyi misòmbele. Kuvwa èkèleeziyà mipite ayi cikondo aci's. Nènku, kàdi, cyàkabuulula ngiikadilu wayi. Mpindyewu ndi mbala kaaba aka cìndi mupete ku dibala dyànyì dyà maalu malonda a cyòci aci.

<sup>163</sup> “Nènku ùdi. . . Mwedìbwe mulawu ng'ewu udi uumvwa ne, anyi, ne udi kàyì uCìtèèleja to.”

<sup>164</sup> Nènku—nènku mpindyewu, cidi cipweka ne mu cikondo cyà mvnsa mwi4 utùdi baswè kuumvwija cintu kampànda mwab'ewu ewu. “Byà kùdì Ewu uvwakù, ne udikù, ne udi ne cyà kulwa, ne udi ne Nyumà mwandamutekète; byà kùdì Nyumà mwandamutekète yìdì kumpàla kwà nkwasà Wèndè wa butùmbi ayi.” Mpindyewu: “Nyumà,” netùfike kudiyi aku pashiishe.

<sup>165</sup> Mpindyewu, mwab'ewu cidi cìleeja patòòke ne, bu nwènù mwà kumòna mwómò—mwómò amu. Kàbìdì mu mvnsa wa 7, anyi mvnsa wa 8, Yèyè udi ulwa cyàkàbìdì ne wàmba, kàbìdì patòòke. Mpindyewu tàngilàayi. Mbambila Èkèleeziyà mwandamutekète's. “Kùdì Ewu udiku, uvwaku, ne udi ne cyà kulwa. Úvwaku, musangu kampànda; ùdiku mpindyewu; ne udi ne cyà kulwa awu.” Mpindyewu, Ùdi uleeja patòòke mwab'ewu mìshindù Yèndè yìsàtù, mìshindù Yèndè yìsàtù yà dimwenesha patòòke dyà mudimu Wèndè.

<sup>166</sup> Mpindyewu bu nwènù mwà kwangata mvnsa wa 8. Netùkafikeku, ànu mu katancì kakesè emu. Netwàngatè mvnsa wa 8.

*Mèmè ndi Alpha ne Omega, cibangidilu ne ndekeelu, mùdì Mukalenge wàmba, udiku, . . . uvwaku, ne udi ne cyà kulwa, wa Bukolè bwònsò.*

<sup>167</sup> Mpindyewu tudi tukwàta mvnsa mwi4 ne mwi6 eyi's, yònsò yìbìdì yìdì cintu cìmwè. Mu umwe, Yèyè ùdi wàmba ne: “Kùdì Ewu uvwakù, udikù, udi ne cyà kulwa.” CidìYe uteeta kutèeka kumpàla kwà Èkèleeziyà ncinyi? Bunzambì Bwèndè. Leelù ewu, bantu bàdi bateeta kuMuvwija mu—mupròfetà. Yèyè's ùdi mutàmbe ne mupròfetà. Ne bàmwè bantu bàdi bateeta kuMuvwija Nzambì yìsàtù. Yèyè kèna Nzambì yìsàtù to. Yèyè ùdi Nzambì umwèpelè uvwa musòmbele mu midimu yìsàtù, didimwenesha mìshindù yìsàtù yà Nzambì umwèumwè awu.

168 Mpindyewu, vùlukààyì ne, eci ki Dibuuulula ne: “Ne ewu yònsò udi udyùmvwà kàdi kàyi ulama mēyi à mukàndà ewu to, cyèndè citùpà necyùmushiibwe mu mukàndà wà mwoyi.” Yesù kēna uDibuuulula bu Nzambì yisàtu to, kàdi Nzambì umwèpelè ne midimu yisàtu. Kaa! Nebiikale mwà kubanjika paanyimà pàà katanci kakesè, patùdi tubwela mu bikondo byà èkèleeziyà abi bwà kumòna ne mmwaba kaayi ùdìbo bajimije cyôci aci. Cyàkafikisha dipanduluka dinène ku Nsangilu wa Nicée. Bùbìdi bwàbò bàakaya kwa nàka.

169 Ne bàakenza cyàkàbìdi cintu cìmwècìmwè aci mu matùkù à ndekeelu aa, ànu bu Nsangilu wa kumpàla kwà Nicée kàbìdi, bwalu nekwikale mukwàbò. Cyà bushùwù ùnu mùndi mwimane kaaba aka emu, èkèleeziyà yà Kàtòlikè ne yà Mishòònyi neyìikale mwà kudisanga mu cintu kampànda, anyi kwitabangana muntu ne mukwèndè. Tàngilààyì mwepiskòpo wa mutambidile wa ku Canterbury udi lwà kwàka mpindyewu awu. Byònsò bìdi munkaci mwà kudisanga pàmwè. Ne kakwenaku dilongesha dyà Nzambì yisatu mu umwe mu Bible to. Kùdi Nzambì umwèpelè.

170 Ne ncibuulùdiibwe mwaba ewu mu Mukàndà wà Bwàkabuulwibwà, ne nsangilu mujimà wa Mifundu mmufwànyine kwikala mujaadikiibwe mwab’ewu, ne Kilistò mmutèèkepu citampi Cyèndè. Eci’s ki Cyôci. Muntu yèyè muumushe anyi musakidile, cintu cìmwècìmwè aci necyùmushiibwe ku Mukàndà wà Mwoyi, bwèndè yèyè. Pa nàнку tusemenàayi ku eci kabìyi byà citù to, semenaayi ku eci ne mwoyi mukangula ne meeji munzulula.

171 Mpindyewu, ku Nsangilu wa Nicée, bàakafika ku mapàngadika manène àbìdi. Pa . . . Kaa, bààbùngì bàà kùdìbo mu ditùkù adi dyà baataatù bàà èkèleeziyà wa ku cibangidilu, bavwa ne mmwenenu yìbìdi mishiilàngàne kule ne kule. Umwe wa ku yôyi uvwa Nzambì yisàtù mu umwe, mwena busàtù. Ne mukwàbò uvwa—n’Nzambì umwèpelè. Nènku yònsò yìbìdi kupatukilayi patòòke ne kuyayi pa matàmbà àbìdi mapanduluke, mipatuke mùshindù awu’s. Bunzambì busatù mu umwe abu kushààlabu mwaba wà muntu umwe mulwè nzambì yisàtù. Ci-unitaire kulwaci bwena Nzambì umwe, ànu mu cilema menemene muvwa cikwàbò aci amu’s. Pa nàнку bùbìdi bwàbò kutùngùnukabò pa matàmbà, kàdi ànu mwòmò *Emu* mmubuulule Bulelèlà.

172 Yesù kavwa mwà kwikala Tatwèndè Yèyè mwine to. Nànsha, bu ne Yèyè ùvwa ne taatù pa kuumusha Nyumà Mwìmpè, dìbà adi Yèyè’s mmwànà mulela mu masandi. Nènku kēna . . . Nyumà Mwìmpè ngwàkaMwimita, ne Yèyè wàkamba ne Nzambì ngùvwa Taatwèndè Yèyè. Pa nàнку Nyumà Mwìmpè ne Nzambì . . . Ki Maatàayi 1:18 awu’s. Byòbì ne . . . Bìdi bikèngela bwà Nyumà Mwìmpè ne Nzambì biikale Muntu umweumwe awu, cyanàànà Yèyè ùvwa ne baataatù bàbìdi’s. Ne Yèyè wàkabiikidiibwa ne

*Emanùwèle*, bwena kwamba ne: “Nzambi neetù.” Ûwva wàmba, pàvwàYe pa buloba apa ne, Yèyè ne Taatù bàvwa Umwe.

<sup>173</sup> Ndi ne Mifundu yònsò mifunda mwab’ewu bwà nupete mùshindù wa kupeta, bu twètù mwà kupeta lukonko elu—elu, anyì cintu kampànda.

<sup>174</sup> Mpindyewu, pààkamwèneshiibwàYe kaaba aka, bu mîshindù yisatu yà mudimu yà bumùntù Bwèndè abu, “Ewu uvwakù, Ewu udiku, Ewu wâlwa awu, wa Bukolè bwònsò,” mpindyewu, kakwèna Nzambi yisatu mwaba awu to; kùdi Nzambi umwèpelè.

<sup>175</sup> Kàdi mu Nsangilu wa Nicée, bwà kwenza cyôci eci, bwà kwenzabo ciine eci, byàkakèngela bwà kwangatabò búsàtù, bwalu mu beena Loomo bàvwa ne nzambi búngì cyanààna. Bavwa bàsambila bankambwa bààbo bafwè. Ndi ne bwalu-bulonda abu apa mene mwaba utùdi mwa kucyàngacila. Nwamònu anyi? Bàvwa bàsambila bankambwa bààbo bafwè abu’s. Ki bwà cinyì bàdi ne Cecilia Munsantu, ne Markus Munsantu, ne munsantu, munsantu, munsantu, munsantu, munsantu, munsantu.

<sup>176</sup> Piine apu, mpààkamba mupostòlò Peetèlo ne: “Kakwèna mutwangaji mukwàbò pankaci pàà Nzambi ne bantu to, pakuumusha Muntu awu Kilistò Yesù.” Umwe.

<sup>177</sup> Byàkakèngela bwà kwikalabo ne nzambi wa búsàtù. Pa nàнку, bôbò—bôbò bavwa ne Jupiter, Mars, Venus. “Kàdi kacivwa cijaalame to, kuciteeka cyònsò pa Nzambi umwèpelè,” ki kucikosololabo ànu mu tutùpà, ne kuvwija midimu yisàtù yà Nzambi ayi bwà kwikalayi Nzambi yisàtù mishìllàngàne.

<sup>178</sup> Kàdi Yèyè ùdi wàmba patòoke mwab’ewu, mu Bwàkabuulwà ne, Yèyè ùdi Nganyi. “Mèmè ndi Ewu wàkadiku, Ewu udiku, ne Ewu udi ne cyà kulwa, na Bukolè bwònsò.” NetùfikeKu pashiishe ndambù mwab’ewu, Yèyè mmwambe ne: “Mèmè ndi Alpha ne Omega,” A ne ku Z, cyònsò nkòong, alphabet wa cyena Ngelika awu. “Mbata wa mu Cibanda, Rose wa Shalònà; Taatù, Mwànà, Nyumà Mwîmpè; Ewu wàkadiku, udiku, ne wâlwa awu; Muji ne Mùtòlokù wà Davidi.” Yèyè udi Nzambi, Nzambi’s. “Kakù- . . .” Timòtè wa Kumpàla 3:16, “Kakùyi dipangananganana to, bwalu busokoka bwà difwànà dyà Nzambi mbunène: bwalu Nzambi wàkamwèneshiibwa mu mubidi, mumòna kùdi Banjèlo, mwitàbùùjìibwe pa buloba, mwakidila mu Butùmbi.” Nzambi’s wè! Kí mmupersona mwisàtù anyì mupròfetà to, kàdi Nzambi Yèyè mwine, mumwènèshìibwe mu mmwenekelu wa buntu. Mpindyewu, eci ndibuulula, nwavùlukaayi’s.

<sup>179</sup> Mpindyewu, Nzambi, ku cibangidilu, ùwva Yèhowàh munène uvwa musòmbèle mu Dikunji dyà Kapyà awu, mulembèlèle kumutù kwà Izalèlèlè, e kubàlombolayè. Awu ùwva n’Nzambi, Mwanjèlo wa Cipungidi. Wakatùuluka pa

mukùnà; mukùnà mujimà kukwàtawù Kapyà. Kapyà kutùuka ku mukùnà aku, ne kufùnda Mèyi matùma Dikumi. Yèye wàkabiikidiibwa ne “Buutaatù bwà Nzambi,” bwà bânà Bèndè, cisà Cyèndè cisungula cyà bantu, beena Yuda.

<sup>180</sup> Pashiishe Nzambi umweumwe awu kumwèneshiibwaye mu mubidi mulediibwe kùdì virgo wàkafukaYe munda mwà Màriyà, ne kusòmba ne kuvwàngala ne kwasaYe ntentà, mutùdì mwa kwamba’s, munkaci mwà bantu. Ne Nzambi umweumwe awu wàkavwijiibwa mubidi ne wàkasòmbela munkaci mwètù. Bible ngudi mwambe nàнку. “Nzambi uvwa munda mwà Kilistò.” Mubidi awu uvwa n’Yesù. Yesù ne: “Munda Mwèndè muvwa musòmbèle kaabujimà kàà Bunzambi mu mmwenekelu wa mubidi.” Mpindyewu, kanwèna mwà kuMuvwija bantu bàsàtù to. Kanùbatiji mu Nzambi yìsàtù to. Kùdì Nzambi umwèpelè. Nwamònu anyi? Nzambi umwèpelè. Mpindyewu, Nzambi umweumwe ewu wàkavwijiibwa mubidi.

Wàkamba ne: “Ndi mufùme ku Nzambi, ne Ndi nya ku Nzambi.”

<sup>181</sup> Paanyimà pàà Yèye mumane kuumuka pa buloba, ku lufù Lwèndè, dijiikiibwa, ne dibìika dyà ku lufù, ne dibànda, Pòlò wàkatuutakeena Nèndè mu njila wa ku Damàsèkà, pacìcivwaye ànu ubiikidiibwa ne “Shawùlà.” Ki Dìyi kampànda kulwadi, dyàmba ne: “Shawùlà, Shawùlà, udi uNkengesha bwà cinyi?”

Yèye ne: “Wèwè udi nganyi?”

Yèye ne: “Ndi Yesù.”

<sup>182</sup> Nèku Yèye uvwa Dikunji dyà Kapyà, Bukènkè bwàkafofomija mèsù à mupostòlò awu abu. Úkaavwa mwalukilekù. Yesù umwèumwe awu ukaavwa mwalukile ku Nzambi, Taatù awu, cyàkàbìdì. Ki bwà cinyi Yèye mmwambe kaaba aka ne: “Mémè ndi wa Bukolè bwònsò,” mu mmwenekelu umwèumwè uvwaYe kumpàla kwà kuvwijiibwaYe mubidi awu; ne mubidi Wèndè uvwàYe musòmbèlemù, ùdibo babiikila ne n’Yesù awu, Muntu utùdì bamanye awu, Yesù.

<sup>183</sup> Mpindyewu, ànu mùdì bààbùngì bàà kunùdì nwènu ba-unitaires bananga nubatiiza mu: “Dìnà dyà Yesù,” amu nudi bapùile. Kùdì nkamà yà ba-Yesù pa buloba leelù ewu, kàdi kùdì Mukalenge Yesù Kilistò ànu umwèpelè. Wàkalediibwa Kilistò. Ba-Yesù bùngì cyanààna. Nkaatu mutwiletwilangane ne bààbùngì bààbo. Kàdi kùdì Mukalenge Yesù Kilistò umwèpelè, Yèye udi Nzambi.

<sup>184</sup> Nèku Taatù, Mwànà, ne Nyumà Mwìmpè kî *mmènà* to. Mmyànzù yidì yikumbanyina Dìnà dimwèpelè. Bàdi bàbàtiiza ne: “Dìnà dyà “Taatù, Mwànà, Nyumà Mwìmpè.” Taatù kî ndìnà to, ne Mwànà kî ndìnà to, ne Nyumà Mwìmpè kî ndìnà to. Mmwànzù, bu mùdì “muntu.” Ki cìdiku aci, Nyumà Mwìmpè. Muntu. . . Anyi, nyumà, Nyumà Mwìmpè. Pashiishe kwamba ne: “Mu dìnà dyà “Taatù.” Tàngilàayi baataatù, ne bânà bàà

bànà bèènú bàà balùme. Tàngilàayi bantu bàdi muneemu aba. Nwamònu anyi? “Taatù, Mwànà, ne Nyumà Mwímpè” kí ndínà to. Mmwânzù ùdi wenda ne Dínà dyà “Mukalenge Yesù Kilistò.”

<sup>185</sup> Mùshindù awu ke ùvwa Èkèleeziyà wa bapostòlò ùbàtiiza, ku cibangidilu. Nènku nèndombèku muntu nànsha umwe bwà kupatula mufùndu nànsha ùmwè, anyi musangu ùmwè mu maalu malonda, ukààdikù muntu nànsha umwe mubàtìjìibwe mu Èkèleeziyà wa beena Kilistò mu mùshindù mukwàbò kanà wònsò pa kuumusha mu . . . pakuumusha mu Dínà dyà “Yesù Kilistò” too ne pààkabangabo èkèleeziyà wa Kàtòlikè. Nènku ke kwangatabò “Taatù, Mwànà, ne Nyumà Mwímpè” bu twitabàayi kampàndà. Mpindyewu twalaayaaku bwalubulonda bwènù abu, bàmwè, bafùndi bàà maalu-malonda. Èyowà. Cintu bu nàнку kacitukù to. Paanyimà pàà cidimu cyà 304 paanyimà pàà Kilistò, 304, ki kulwaku dibatiiza dyà pasatu bwà Nzambi yisàtù: “Nzambi Taatù, Nzambi Mwànà, Nzambi Nyumà Mwímpè.” Aci’s mbumpàngaanù.

<sup>186</sup> Kumpàla kwà lumingu elu kujika, nèncìbadilè mu mikàndà bwà kunuleejila ku Bible. Tudi twakula mu dindà emu pa Dibuuulula, ne tujaadika mwaba ùdidi dìbwela, ne mwàkabangadi kwikalaku. Alukila ku Bulelèlà, mwanèètù! Tudi mu ditukù dyà ndekeelu.

<sup>187</sup> Indilaayi too ne patwafika ku èkèleeziyà wa Efèsò awu ne kumufwànyikija ne wa Laòdikiyà, ne kutàngila cyàkenzekà pankacì pàayi. Nènùmòne mùshindù wàkadifinda cintu aci’s. Kubwela mu cikondo cyà Luther, kwamba ne: “Udi ne dínà dyà ne udi ‘ne mwoyi,’ kàdi udi mufwè.” Mwaku mene *Saàdi* udi wumvwija ne “mufwè.” Bòbò kucijimija mu bidimu cinunu ne nkamà yitaanu byà Bikondo byà Mídimà. Yònsò wa ku èkèleeziyà ayi wàkalama aci too ne pa diine dìbà adi. Pashìshe pààkenzàbo Nsangilu wa Nicée mu cidimu cyà 606, ki dìbà adi kushimbulabo Dínà adi ne kuDyenzabù Nzambi yisàtù.

<sup>188</sup> Wàkamba mwab’ewu ne: “Mémè ki Ewu wàkadiku, Ewu udiku, ne wálwa awu, wa Bukolè bwònsò.” Bushùwà’s.

<sup>189</sup> Ùvwa ne Kampànda wa pàsàtu pa buloba apa. PàvwàYe pa buloba, Ùvwa Kampànda wa pàsàtu. Pa buloba, Yéyè uvwa Mupròfetà. Ùdi kàbidi Mwakwidi, mu Dyulu’s. Nènku pààlukilàYe cyàkàbidi pa buloba, Yéyè neikale Mfùmù. Mupròfetà, Mwakwidi, ne Mfùmù. Ewu wakadiku, udiku, ne wálwa awu’s. “Ewu wakadiku,” uvwa n’Yesù, mupròfetà. “Ewu wakadiku mpindyewu,” m’Mwakwidi, ùfila milambu yà nyumà, Mwakwidi Munène udi mwà kulengiibwa kùdi njiya yà mateketa ètù, kàdi kuDìsokolola ne kujaadika ne Ùdi munkacì mwètù. Mupròfetà, Mwakwidi, ne Mfùmù, kàdi Nzambi Umwèpelè.

<sup>190</sup> PàvwàYe pa buloba, Ùvwa Mupròfetà, Dìyi adi. “Ntèmù wa lulamatu,” mùdi Bible ùMubiikila, paanyimà ndambù. Ntèmù

wa lulamatu, mmupròfetà awu. Yèyè uvwa Mwakwidi, nènku pavwa . . . Yèyè udi Mwakwidi mpindyewu, ne pààlwàYe, Yèyè neikale Mfùmù.

<sup>191</sup> Nwènú bafikeku, babale Bwàkabuulwibwà 15:3, nudi mwà kumòna mu Bwàkabuulwibwà 15:3. Tubuululààyaaku mwab'ewu bwà kumòna cidiYe . . . piikalàYe Mfùmù, neWíkala Mfùmù pààlwaYe. Mpindyewu netùfikè ku Bwàkabuulwibwà, nshapità wa 15 ne ku—ku mvensa mwi3.

*Nènku bavwa bìmba musambu wa Mòsà musadidi wa Nzambi, ne musambu wa Mwànà wa mùkòòkò, bàmba ne: Byenzi byèbè mbinène ne byà dikema, Mukalenge Nzambi wa Bukolè bwònsò; njìla yèbè myakane ne milelèlè, wèwè Mfùmù wa bansantu.*

<sup>192</sup> CìvwaYè ncinyì pa buloba? Mupròfetà. Mmunyì mwàkamanya bantu ne Yèyè ùvwa Mupròfetà? Wàkenza cimanyinu cyà Maasiyà, uvwa Mupròfetà awu. Kaa, Dìná dyà Mukalenge dibènèshiihwè's wè! Mmunyì mwàkapangilabo kuMujingulula? Bwalu bavwa bindile cintu kampànda cikwàbò. Ne Yèyè wàkenza cimanyinu cyà Maasiyà, kàdi bòbò kabàyi baswè kucitèèleja to. Ùvwa Mupròfetà.

<sup>193</sup> Mòsà wàkamba ne: “Mukalenge Nzambi webè neàjuule Mupròfetà mufwànàngane naanyi. Nebyenzeke ne bòbò kabàyi batèèlèje Mupròfetà ewu to, nebuumushiihwe munkaci mwà cisàmbà.”

<sup>194</sup> Yèyè ùvwa Mupròfetà pa buloba apa, mpindyewu, bwalu Yèyè ùvwa cinyì? “Ntèmù wa lulamatu wa Dìyì dyà Nzambi.” Amen. Yèyè uvwa Dìyì dyà Nzambi dimwènèshiihwe patòòke.

<sup>195</sup> Yone Munsantu, nshapità wa 1.

*Ku cibangidilu kwàkadi Dìyì, ne Dìyì dyàkadi ne Nzambi, ne Dìyì dyàkadi Nzambi.*

*Ne Dìyì dyàkavwijiibwa mubidi, ne dyàkasòmbela munkaci mwètù, . . .*

<sup>196</sup> Yèyè ùvwa ntèmù mulelèlè ne wa lulamatu ku Dìyì dyà Cyendèlèlè dyà Nzambi. Yèyè ùvwa Dìyì, ùvwa Dìyì dyà Nzambi. Nènku, bu mùvwàye Dìyì, Yèyè ùvwa Mupròfetà. Bwalu Dìyì dyà Nzambi divwa dituuta nkòkà munda Mwèndè. Ùvwa ne cyà kwamba ànu Cintu cìmwèpelè aci. “Ncyèna mwà kwenza cintu nànsha cìmwè mu Mémè to, ànu cidi Taatù uNdeeja bwà kwenza aci. Ki m'Mémè udi wenza byenzi to. Kàdi Taatù udi musòmbèle munda Mwànyì, Yèyè ngudi wenza byenzi. Mémè ne Taatù Wanyì tudi Umwe. Taatù Wanyì udi munda Mwànyì,” mwàkamba Yesù, Muntu awu, Tabernacle awu.

<sup>197</sup> Nzambi udi ne myànzu yàbùngì: Yehowàh, Yehowàh-Yilè, -Laafa, -Manassé. Kaa, ààbùngì! Ùdi ne mènà mwandamutekète mambakaja, à bupikudi. Ùdi ne myànzu yàbùngì: Rose wa Shalòna, Mbata wa mu Cibanda, Mùtootò wa mu Dìndà; Taatù,



Mwânà, Nyumà Mwímpè. Byônsò abi. Kàdi Yèyè ùdi ne Dîná dyà buntu dimwèpelè. Nzambì ùvwa ne Dîná ànu dimwèpelè, ne diine adi divwa “Mukalenge Yesù Kilistò.”

<sup>198</sup> PààkalediibwaYe, Kilistò, Mukalenge awu. Paanyimà pàà matùkù mwandamukùlù, Nyumà Mwímpè kumwinyika Dîná Dyèndè ne “Yesù.” Mamwëndè ùvwa muMutengwishe, ne kuMwinyika ne “Yesù.” Ùvwa mulediibwe Kilistò.

<sup>199</sup> Byenze bu ne, ndi mulediibwe Branham. Mvwa Branham pangààkalediibwa, kulwabò kumpa dîná dyà “William.”

<sup>200</sup> Amen. Ne Yèyè wàkalediibwa Kilistò, Musùngidi. Nènku pààkakùmbajaYe matùkù mwandamukùlù, BààkaMupèèsha Dîná dyà “Yesù.” Ne Yèyè ùvwa Mukalenge wa Butùmbi, mumwènèshìibwe. Pa nàнку, Yèyè ùdi Mukalenge Yesù Kilistò, Nzambì wa Butùmbi mumwènèshìibwe munkaci mwètù. Kaa, s’ki Yèyè awu!

<sup>201</sup> Pa buloba apa, Yèyè ùvwa Mupròfetà. Mu Butùmbi, Yèyè ùdi Mwakwidi. PààlwaYè, Ùdi Mfùmù. Kaa! Mèmè ntu munange aci’s.

Mupròfetà: “Ntèmù wa lulamatu wa Dîyì.”

Mwakwidi: “Ne Mashi Èndè Yèyè mwine kumpàla kwà Nzambì.”

Mfùmù: “Mfùmù wa bansantu.” Kî m’mfùmù wa buloba to, mpindyewu. Yèyè ùdi Mfùmù wa bansantu. Tudi ne bamfùmù bàà pa buloba pa bantu abu. Kàdi tudi ne Mfùmù, kàbidì, ne Bukalenge. Ki bwà cinyi tudi twenza maalu bishiilàngàne.

<sup>202</sup> Ànu mûmvwà mwambe matùkù mashààle aa, bwà mukàjàànyì, tuvwa tuya ku makàjiinyì muneemu ki twètù kumòna cishimà, bu nàнку awu’s. Kuvwa mmu cikondo cyà muvù wa luuya, mukàji kampànda ùvwa muvwale nkanzu. Ki mèmè kwamba ne: “Aci’s ncintu cyà dikèma’s.” Mèmè ne: “Bu ne mvwa ne cyamu cyànyì cyà fòtò, nùнку’s ndi mukwateku fòtò wa inàbànzà ewu’s.” Nwamònu anyi? Bwalu twètù... Awu’s ùvwa mukàji wa kumpàla utwàkamòna muvwale jipè, nudi bamanye’s, muvwale ànu mutùbi bikèngela bwà inàbànzà kwikalaye muvwale’s, bakàji bònsò mene’s.

<sup>203</sup> Kwambaye ne: “Èè, Bill, mbwà cinyi cisàmbà cyètù cidi civwala nàнку, kàdi twètù mbatufundile nàнку awu anyi’s?”

<sup>204</sup> Mèmè ne: “Ki ncisàmbà cyètù to. Mbantu bàà Nzambì. Bantu bàà Nzambì, mbalòmbiibwe cijila.”

Yèyè ne: “Èè, kabàtu bàya mu èkèleeziyà anyi?”

<sup>205</sup> Mèmè ne: “Kudi inàbànzà *mwaba awu* mene, utu wimba mu korale mu èkèleeziyà kampànda mwab’ewu.”

“Èè, dîbà adi, mbwà cinyi ciine aci?”

<sup>206</sup> Mèmè ne: “Bwalu yèyè kî mmulongèshìibwe mùshindù mushiilàngàne to.” Ncyà bushùwà menemene.

207 S'ki èkèleeziyà wa musunya awu, netùbwelemu lumingu elu; Èkèleeziyà wa nyumà, èkèleeziyà wa musunya. Yidi yònsò yàlukila kùdi èkèleeziyà uvwa muyilelè, bu mùdì Bible mwambe, mu Bwàkabuulwibwà 17, ne bàvwa mwa kucyenza. Yidi munkaci mwà kwalukila patùdì twakula apa, yònsò ayi, yenza maalu ànu bu yèyè, yidivwija bulongolodi. “Èè, twètù's tudi *cikampànda* . . . Tudi tudivwija bulongolodi. Tudi *cikampànda* ne tudi *cikansanga*.” Kabivwa nànkù ku cibangidilu to. Bànyenga èkèleeziyà bukolè bwònsò bàbùtèeka pa mwepiskopo anyi paapà. Nzambi ùdi mu Èkèleeziyà Wendè, munkaci mwà cisàmbà Cyèndè, ùDimwèneshila mu beena kwitabuuja ne mu myaba yònsò, mpindyewu. Kàdi mu ditùkù edi . . .

Yèyè ne: “Èè, twètù katwèna beena Àmèrikè anyi?”

208 Mémè ne: “To. Twètù tudi basòmbèle apa, kàdi katwèna beena Àmèrikè to. Twètù tudi beena Kilistò. Bukalenge bwètù mbwà ku Dyulu.”

209 Nènku pùikalabi ne nsòmbelu yètù mmifùmìne kuulu Kwàka, dìbà adi's tudi twenza maalu mùshindù awu. Bwalu, tudi tulwa . . . Mwoyi wètù ngwà ku Mwaba wa cijila. Mbishìilàngàne. Mbyà mvwadilu mushìilàngàne. Bakàji bàà kuulu Kwàka bàtù ne nsuki mile. Ne bóbò kabàtù balaaba bilaabu kwìsù to. Ne—ne kabàtù bàvwàla tùpùtulù to. Bóbò—bóbò bàtu bàvwàla njipè, ne nkanzu mileemilè ne nkanzu. Ne bàdi ne nsuki mile, ne bikwàbò. Pa nànkù—ngiikadilu awu, wa kuulu Kwàka awu, ùdi ùdileejila pambidi pèètù.

210 Balùme kabàtù bànwà mfwanka, bàcyànkunya mfwanka, bashima, anyi biiba to. Bàdi bafùma, yàbo nyumà, mmifùmìne mu Mwaba wa cijila, yìbenzeja maalu à cijila, bajingululàngana muntu ne mukwende bu bàna bàà muntu. Uh-huh. Ki cyòci aci's.

211 Twètù tudi bàà mu Bukalenge kampànda, ne tudi ne Mfùmù. Ne Yèyè ùdi Mfùmù wa bansantu. Ne mwaku *munsantu* ùdi ùfùmìna ku mwaku wà “bajidiibwe.” Dìbà adi pàdì muntu mujidiibwe, Kilistò, Nyumà Mwìmpè ùdi ùbwela mu mwoyi ne ùlwa Mfùmù pambidi pèndè. Kaa, ekèlekèle! Aci's civwa ne cyà kubwela kuya mu ndòndò. Kaa! Pàdi lupànzà lujidila lwà Nzambi . . . Kilistò, Mfùmù, Nyumà Mwìmpè, ùbwela munda. Ne Yèyè . . . Mfùmù's ùtu ne citùpà cyà buloba Bwèndè. Amen. Nènku buumùntù bwèbè bwònsò mu kaabujimà mbukòòkesha kùdi Mfùmù wa bansantu. Bukalenge's! Bukalenge bwònsò bwà pa buloba nebùkankishiibwe, bùsùnsudiibwe ku bukolè bwà bombes. Kàdi Bible ùdi wàmba ne: “Twètù tudi twakidila Bukalenge bùdi kabùyì mwà kunyungishiibwa to.” Amen. S'ki Yèyè awu, Mfùmù wa bansantu.

212 Ndi muswè bwà nwènù kumòna bimfwànyì byà Kilistò, kàbidì, mu Bible ne panu pa buloba apa. Pa buloba apa, Yèyè uvwa Mupròfetà. Nudi nwitabuuja aci anyi? Mupròfetà n'Díyì. Aci kaayi tudi bamanye. Mwaku ewu *mupròfetà* ùdi ùmvwija

ne “muumvwiji wa Dîyî wa kùdî Nzambî.” Dîyî dyà Nzambî ndifundîibwe, ne mupròfetà ùdî ne Nyumà wa Nzambî munda mwèndè. Nènku, nudi bamanye’s, mupròfetà mu Dipungila Dikulukulu ùvwa ubiikidiibwa ne “nzambî.” Mbanganyi bàvwa bamanye aci?

213 Yesù wàkamba ne: “Pìikalabi ne bààkabàbìikila ne mbanzambî. . . Ki mbifundîibweku mu mikenji yènù ayi, ne bàdî. . . ‘Nudi banzambî’ anyi? Nènku pìikalabi ne bààkabàbìikila ne ‘banzambî,’ aba bàvwa Dîyî dyà Nzambî dilwila kudìbò abu, mupròfetà, mmunyi munwàmpìisha Mémè pàNdi ngàmba ne Ndi Mwànà wa Nzambî?”

214 Bwalu, yèyè wàkabiikidiibwa ne “nzambî,” bwalu yèyè wàkambula munda mwèndè Dîyî dyà Nzambî, EMU MMÙDÌ MUKALENGE WÀMBA. Ki bwà cinyi, mwaku ewu *mupròfetà* ùdî ùmvwija ne: “dyèndè—dyèndè dyumvwija kî ndyà kusambakaja ne cintu to.” Nwamònu anyi? Pìikala Nzambî. . . Yèyè ùdî wàmba ne: “Kwòkò kwikale muntu munkaci mwènù, udi wa nyumà, anyi mupròfetà, Mémè Mukalenge nêngàakulangane nendè. Cìdiye wàmba cyòci cyènzeke, dîbà adi numutèeleje, bwalu Mémè ndi nendè. Kàdi cyòci kaciyi cyènzeke to, dîbà adi kanùmutèeleji to; Mémè ncyèna mumutume to.” Ki mùshindù wunùdî nucimanya awu’s. Nènku dîbà adi, nudi numòna’s, Dyumvwija dyà kùdî Nzambî dyà Dîyî didi ne cyà kukùmbanangana ne dibuulula dyà ndekeelu kùdî èkéleeziyà.

215 Yèyè ùdî Nzambî, wa Bukolè bwònsò. Pa buloba apa, Yèyè ùvwa Mupròfetà, cìdî cyumvwija ne mukanku. Mbanganyi bàdî bamanye ne mupròfetà ùtu ùbadiibwa bu mukanku?

216 Mukanku ke nyuunyi mutàmbe bukolè udiku, wa bukolè butàmbidile. Yimwè yìdî ne mapwàpwà pàdiwu mwolola afika ku metre anaayi ne citùpà, ku ntengu ne ntengu mukwàbò. Ùdî mwà kujjuuka ne kubùuka muulu menemene mu mùshindù wa ne nyuunyi mukwàbò yònsò ewu mudidìnge ànu mutèete kumulonda, mmufwànyine kusùnsuluka, masàlà mmawànyine kumpròpoka ne mmufwànyine kutaayika. Bwà bwalu kaayi? Mmwibakìibwe mu mùshindù wà pabwàwù. Nènku nebimwambulwishe ku cinyi bwà kubanda muulu bulemu pìikalaye kàyî mwà kumòna cìdiye wenza padiye muulu amu apu? Udi wakula bwà dîsù dyà kabemba anyi? S’bivwa bìkèngela wèwè kumòna dîsù dyà mukanku’s.

217 Kabemba kàdi mwà, nkafwànyine kumòna nzòòlo. Ncyà bushùwà. S’ki lutatù lùdiku leelù ewu ne tùmwe twà ku tubemba etu’s. Uh-huh. Kàdi, ndi nnwambila ne, mukanku ùtu ùya bikolè mu mùshindù wà ne, kabemba kòkò kadidìnge kuwùlonda, nkafwànyine kufwà’s. Mweyelu newùkashìikile. Kakeèna mwà kubwela mu bipaapu bìdî mukanku wubwela abi to.

218 Nènku dîbà adi ùdî ne dîsù, mu mùshindù wa ne ùdî mwà kumòna kule, pàdiwu ufika muulu mwàmwa. Pa nànkù ki bwà

cinyi Nzambi wàkabiikila *bapròfetà* Bèndè ne: “mikanku.” Ùdi ubànda muulu amu, ne yèyè’s mmukanku. Ùdi mwà kumòna, kule menemene.

219 Ne Kilistò pèndè, pa buloba apa, ùvwa Mukanku. PàakafwàYe, Ùvwa Mwakwidi, nènku aci cyàkaMuvwija Mwànà wa mùkòòkò. Ncyà bushùwà anyi? Nènku pàälwaYe cyàkàbidi, Yèyè ùdi Mfùmù, pa nàнку Yèyè neikale Ntambwe, amen, Ntambwe wa cisàmbà cyà Yuda. Amen. Yèyè m’Mukanku, Mwànà wa mùkòòkò, ne Ntambwe; amen; Taatù, Mwànà, ne Nyumà Mwimpè; Mupròfetà, Mwakwidi, ne Mfùmù; Ewu wakadiku, udiku, ne wàlwa awu; wa Bukolè bwònsò; Alpha ne Omega, kuumukila ku cibangidilu too ne ku ndekeelu, Nzambi wa Cyendèlèlè.

220 Ndi muswe kunukonka, bàmwè bàà ku nwènù beena Kàtòlikè bàà mushinga mukolè, bàdi bàbiikila aci ne: “Buumwànà bwà Cyendèlèlè bwà Nzambi; Nzambi, buumwànà bwà Cyendèlèlè bwà Yesù Kilistò ne Nzambi.” Mmunyi mùdi mwà kwamba mwaku wa mùshindù awu? Mémè ewu cimbulùntùntù, cyà mu kàlaasà kàà mwandamutekète, kàdi mémè’s ndi mumanye cidi cimpè kutàmba aci. Mwaku mwànà ùdi ne cyà kwikala ne mbilangilu. Pa nàнку mmunyi mùdiYe mwà kwikala wa Cyendèlèlè cikolè mwikale mwànà? Cyendèlèlè kacyènakù ne ntwadijilu anyi ne ndekeelu to. Pa nàнку, Yèyè kèna mwà kwikala mwànà, mwànà wa Cyendèlèlè, kàdi pashiishe kwikala ne mbilangilu to, bwalu cintu pààci ne m’mwànà wa Cyendèlèlè kacitukù to. Mwànà ùvwa ne mbilangilu, nàнку awu kèna mwà kwikala wa Cyendèlèlè to.

221 Nudi numòna’s, Yèyè udi Nzambi wa Cyendèlèlè, kí mmwànà wa Cyendèlèlè to. Butùmbi’s wè! Wa Bukolè bwònsò, Yèhowàh-yilè, Yèhowàh-laafà, mumwènèshiiibwe mu mubidi: “Munda Mwèndè mùvwa musòmbèle kaabujimà kàà Bunzambi mu mùshindù wà mubidi.”

222 Nènku mu Ditùkù dyà Mpenta, pàakapwekà Dikunji dyà Kapyà adi pa bantu, nuvwaku bamòne ne, DyàkaDyàbanya anyi? Ne ndimi yà Kapyà yàkasòmba pamutù pàà muntu ne muntu wa kudibo. Kapyà, bu ndimi, kusòmba pamutù pàà muntu ne muntu. Cìvwa Nzambi wenza ncinyi? ÙDyàbanya Yèyè mwine mu Èkèleeziyà, kùdi muntu ne muntu, ùpèesha bakàji, balùme, ne bònsò bàà kudibo abu; cìvwa bitùpà byà Nyumà Wèndè, ùDìpandulula munkaci mwà Èkèleeziyà Wèndè.

223 Mmunyi mùdi muntu mwà kulwa apa ne kwamba ne: “Muntu wa cijila’s m’paapà. Muntu wa cijila’s m’mwepiskòpò”? Muntu wa Cijila n’Kilistò, Nyumà Mwimpè munda mwètù. Mmunyi mùdi mwà kwamba ne mwena kwitabuuja kèna ne dìyì nànsha òmwè dyà kwamba? Muntu ne muntu wa kunùdi ùdi ne cyà dyamba. Muntu ne muntu wa kunùdi ùdi ne mudimu wa kwenza.

Muntu ne muntu wa kunùdi ùdi ne cyà kutwàla Mukenji. Butumbi's wè!

224 Nyumà Mwîmpè wàkaDyàbanya mu Ditùkù dyà Mpenta. Nzambi, ùDyàbanya. “Mu ditùkù adi nenùmanye ne Mémè ndi munda mwà Taatù, Taatù munda Mwànyì; Mémè munda mwènù, ne nwènù munda Mwànyì.”

225 “Ditùkù adi,” Nyumà Mwîmpè, “kumutù kwà bônso, munda mwà bônso, mu bônso.” Amen. Ke cyôci aci's. Nyumà Mwîmpè ùdi ne bukenji bwà kuya mwaba kanà wônso wùdiYe muswè kuya awu, pa muntu kanà yônso udiYe muswè kuyapu awu. Kabyèna bikèngela bwà wèwè kwangata cidì mwepiskòpò kampànda anyì nsaserdosè kampànda wàmba to. Yèyè ki Mwakwidi wetù umwèpelè, cyà bushùwà, Mwakwidi Munene. Mpindyewu: Mupròfetà, Mwakwidi, ne Mfùmù.

226 Mpindyewu:

*Nènku. . . Yesù Kilistò, yèyè udi ntèmù wa lulamatu awu, . . . mwàn'à-butè wa bafwè, . . . (Netùbwele mu cyôci aci.) . . . ne mfùmù wa bamfùmù bàà pa buloba. Kùdi ewu wàkatùnanga, ne kutùsukula ku mpèkaatù yètù mu mashi èndè yèyè mwine,*

227 Mwaku awu *musukula* mwaba awu, mu bushùwà bwà bwalu, mu cyena Ngelika, mbwena kwamba ne “kusùulula.” Yèyè wàkatùsùulula ku yètù. . . Twètù tuvwa baswikila ku buloba, kùdi mpèkaatù wetù. Katùvwakù mwà kumòna to, katùvwakù mwà kuumvwa nànsha, katùvwa nànsha ne cingenyengenyi cyà Dyulu anyi ní ncinyi to. Kàdi pàakalwà Mashi panshi, Akakòsa munyololo ne twètù kusùuludiibwa. Kaa!

228 Ngàkabala bwalu bulonda kampànda musangu mukwàbò, cidì. . . cidì mwà kukumbana mwab'ewu mene. Cidime kampànda wàkakwàta cikololò kàdi yèyè kuciswika ku mwonji. Ki kwambayè ne: “Nèmpeeshè bikololò bikwàboò dileesòna.” Ki kuswikaye cikololò cya kale aci, lwà ku mukòlò, ne nshinga kampànda, ne cikwàcikwètù aci kwamba kufwà lwà nzala's. Kucyòkaci èyo, kaciciyi mwà kunyunguluka mwab'awu to.

229 Aci's ki cidì, àmwè à ku malongolodi aa ne èkèlezìyà eyi myenze, mmiswikile bantu panshi ku myonji. “Ànu ne kwèna mwà! Èè, *ebu* ke bule bwònsò bùdi mwà kwendela. Matùkù à bishima akaadi mamane kupita.” Èyowà. Udi ànu muswikilbwe's. Kwajiki. “Cintu pààci ne n'Nyumà Mwîmpè kacitukù to. Yèyè kàtu wàkula mu myakulu muvwaYe ne ciibidilu cyà kwakula amu to.”

230 Yèyè's ùdi Nzambi. “Yèyè ùdi ànu umwèumwè awu makèlèlè, leelù, too ne kashidi,” Ebèlu 13:8, mwikale ne mwoyi mu èkèlezìyà yônso. Netùkùfikè paanyimà pàà dishindamija dyà mu dindà emu edi. Nwamònu anyi? Yèyè's ùdi Nzambi, udi ne mwoyi mu cikondo cyònsò cyà èkèlezìyà. Neikale ne mwoyi mu cikondo cyònsò cyà èkèlezìyà, ne neikale ne mwoyi

munda mwà bantu Bèndè bu . . . bwà Cyendèlèlè. Bwalu tudi mpindyewu, munda mwètù, ne Mwoyi wà Cyendèlèlè.

<sup>231</sup> Pa nàнку, dingumba edi divwa dimuswikile panshi, nwamònu's, "Èè, matukù à bishimà àkaadi mamane kupita. Cintu pààci ne ndyondopa dyà kùdi Nzambi kacituku to." Cikwacikwètù cikulakaji cikwàte ne byà luse aci kutètukaci mu mùshindù wà ne cikaavwa cicyòke menemene kàciciyi ne mùshindù wà kwenda to.

<sup>232</sup> Ke dîngà ditukù kupìcilaku muntu mwîmpè mwaba awu, e kwambaye ne: "Udi mumanye's, cikòlòlò cyà kale cikwàte luse aci, ndi ncyùmvwila luse be. Ndekeelu wa byònsò, cìvwa cìfwànyine kwikala cidya matalà èndè awu, kàdi's ke mùshindù umwèpelè ùdici cishààla ne mwoyi. Bikèngela ciikaleku ne cintu cyà kudyà's. Pa nàнку kacìvwa ne cikwàbò cyà dyenza to, cìdi ànu cipatuka mwaba awu bwà kupetaku matalà. Pa nàнку pìikala . . ." Pashìishe kwangatayè wendè . . . kwangatayè keele kèndè ne kukòsa myonji yà cikòlòlò cyà kale aci kucilekelela.

<sup>233</sup> Nèнку nudi bamanye's, ki bikòlòlò bikwàbò bìlwalwà ebi, bilwa mwab'awu, byàmba ne: "Lwàku kunu, Johnny Cikòlòlò. Lwa tuye ku Sud. Cipeepèlè cyà mashika cilwalwa."

<sup>234</sup> Nudi bamanyè mùdi bwalu anyi? Cikòlòlò aci cìvwa ànu cìfwànyine kuya mu ntàntà ùvwaci paaci mwà kuya kashìikidila awu's. Cyòci ne: "Ncyèna mwà kukòòkeshaku to. Kabyàkukumbanaku to, kabyena ànu bwètù twètù mu ditukù edi to. Katwèna—katwèna ànu mwà kucyèna to." Nwamònu anyi? Cikaavwa ciswikiìbwe ntàntà mule menemene, mu mùshindù wa ne cikaavwa ànu cyèla meeji ne cìcìdi ànu ciswikiìbwe. Nwamònu anyi?

<sup>235</sup> Nèнку mùshindù awu ke ùdi bantu bààbûngì, nudi baswikila panshi ne twitabàayi ne màngumba, kubangila ànu ku maamù ndumba wa kale kwàka, ùnwàmbila, ne: "Yesù Kilistò kèna umwèumwè awu to. Ne cintu pààci ne ndyondopa kacitukù to. Dibatiiza dyà Nyumà Mwîmpè kaditukù to. Kakwènakù nànsha cimwè cyà bu bintu bu nàнку to." Ûteeta kukwambilabi. Nudi baswikiìbwe ntàntà mule be mu mùshindù wà ne nucidi ànu nwela meeji ne nudi baswikiìbwe's.

<sup>236</sup> Muntu mwîmpè, Kilistò, wàkafila Mashì Èndè bwà Wàmòna mwà kutùsukula ne kutùsùulula ku mpèkaatù wetù. Mpèkaatù ncinyi? Ndi ndomba muntu kanà yònsò bwà kungambila. Mpèkaatù ncinyi? *Mpèkaatù* "mbupidya." Ncyà bushùwà. "Ewu udi kàyi witabuuja mmumane kupiìshibwa."

<sup>237</sup> Nèнку mpèkaatù webè ki cintu cimwèpelè cìdi cikupangisha bwà kwikala mudishikamine. Ànu bwalu Nzambi mmunùsùulule ku bupidya bwènù, kàdi nudi baswikiìbwe bikole ne twitabàayi mu mùshindù wà ne nucidi ànu nwela meeji ne nudi baswikiìbwe's. Biikale ànu bafwa ne nzala, nwamònu's, batètukangana ne: "Mémè ndi Presbytérien. Ndi

Méthodiste. Ndi Baptiste. Bàdi bàngambila ne (Mémè ndi Église de Christ) ne: ‘Matùkù à bishimà akaadi mamane kupita. Cintu bu nàнку kacitukù to.’”

238 Wèwè cikòlolò cikwàte ne luse wè! Cyùdi kùyi ulwilà mu dindà emu mbwà cinyi’s? Bwà cinyi kwèna ubùuka uya’s? Àlèluuyàh! “Juuka ne mapwàpwà à dindà, bùuka uye mutangile ku Dìbà dyà Bwakàne, ne dyondopa mu mapwàpwà Àadi.” Amen. Ki cyôci aci. Ki cyôci aci, mwanèètù wa balùme, mwanèètù wa bakàji. Kaa! “Èwu udi Mwànà mupe budishikaminyi, mmushàale mudishikàmine ànu byà menemene ebi.” Èyowà’s, mukalenge!

239 “Èè, mpaasàtà wanyì. . .” Aci ncyèna naaci bwalu nànsha bùmwè to. Bible mmwambe ne: “Udi mudishikàmine.” Ncyà bushùwà. Udi mudishikàmine.

“Èkèleeziyà wanyì. . .”

240 Èè, sùùlukàayi. “Wàkatùsukula ne kutùsùùlula ku mangumba etù, mu Mashi Èndè Yèyè mwine,” ne mutùvwije badishikàmine mu mùshindù wà bafwànyine kudyèlela meeji, ne kudyenzela, ne kudyakwila, ne kudyenzela maalu.

241 “Èè, bu mémè mwà kwalukila ne kwambila mpaasàtà ne bìvwa bikèngela bwà mémè kubatiijibwa cyàkàbidi, nunku yèyè’s. . .”

242 Kàdi bishi bwà ne: “Udi mudishikàmine”? Eci ndibuulula, nudi bamanye’s. Èyo. Udi mudishikàmine.

243 Pawikala mummyamina màyi pamutù à mu kààsù kàà mukele mùshindù ewu, mu dìnà dyà “Taatu, Mwànà, ne Nyumà Mwimpè,” ciina cyà màyi ncyôci eci citèeka mwab’ewu, cilongolola mu dindà emu, ciikàle ne màyi munda. Nwamònu anyi? Èyowà’s, mukalenge. Ki mmwòmò to.

244 Pa nàнку, kwèna kàbidi muswikìibwe to. Udi mudishikàmine, kàdi pàmwàpa kwèna mucimanye to. Kàdi lekelaayi nzwàmbilè mu dindà emu, Bible mmwambe ne: “Yèyè mmutùsùùlule ku mpèkaatù yetù, ku bupidyà bwètù, bwà twàmòna mwà kupeta Dibuulula dyà Yesù Kilistò.” Umuka uye, mudishikàmine! . . . bikaadi bikèngela kwangata cidì èkèleeziyà kanà yònsò wamba pa Bwalu abu. Angata cidì Nzambi mwambe pa Bwalu abu. Dibuulula Dyèndè ndyôdi edi munkaci mwà kubuulula CidìYe Yèyè aci’s.

245 “Mvwa misangu yònsò ànu mwitabuuje ne Nzambi Taatù ùvwa ne mwedi mule, mutòoke, ne nsuki mitòoke; ne Mwànà awu uvwa muntu mushindame; ne Nyumà Mwimpè uvwa mwànà wa balùme wa kutuma wa majimbu.” Mwanèètù, aci’s mbumpangaanu. Aci’s mbumpangaanu pawikala witabuuja Nzambi yisàtu.

246 Dìyì ditùma dyà kumpàla, Dìyì ditùma dyà kumpàla ncinyì? “Teelejaàyi, Éyì Izalèlèlà: Mémè ndi MUKALENGE Nzambi webè, Nzambi umwèpelè.” Ki cyôci aci.

247 Yèyè udi Nzambi umwèpelè, kî nzambi yisàtù to. Ûvwa musòmbèle mu midimu yisatu, mukwacile mudimu mu myaba yisatu. Yèyè ùdi Mupròfetà, Mwakwidi, ne Mfùmù. Yèyè ùdi Mukanku, Mwànà wa mùkòòkò, ne—ne Ntambwe. Yèyè ùdi Mbata wa mu Cibanda, Rose wa Shalòna, Mbata wa mu Cibanda, ne Mutòòtò wà mu Dindà, Muji ne Mùtoloku wà Davidi. Yèyè ùdi kuumukila ku A too ne ku Z. Yèyè ùdi Taatù, Mwànà, ne Nyumà Mwímpè. Yèyè ùdi byònsò abi, kàdi Yèyè ùdi Umwe. Yèyè ùdi Nzambi umwèpelè. Ayi mmyànzu Yèndè yidì miMukùmbanyine, kàdi kùdi Nzambi umwèpelè.

248 Kacya muntu nànsha umwe, dibèji nànsha òm̀wè dyà mu Bible anyì mu maalu-malonda, too ne ku èkèleeziyà wa Kàtòlikè, katuku mubàtìjìibwe mu diinyijìibwa mu màyi mu dìnà dyà “Taatu, Mwànà, Nyumà Mwímpè to.”

249 Nwènu mwà kundeeja dibèji anyì cintu nànsha cìmwè, ucifunde, ucinshiile mwab’ewu, dilòlò edi, nènku nèmputukè mu èkèleeziyà emu, ngàm̀ba ne: “Mémè ndi mwena lubombo; ndi mulongeshe bantu mashimi.” Nwènu mwà kundeeja mufundu umwèpelè wà Mifundu, anyì nuntwadileku bwalu-bulonda bumwèpelè, bwalu-bulonda bwena dìnà, bwikala mwà kundeeja ne mmwaba kaayi ukaadiku bantu babàtìjìibwe, mu Bible emu, mu dìnà dyà “Taatu, Mwànà, Nyumà Mwímpè.” Anyi, ntwadilaayi Mufundu umw-...anyì, mukàndà wà maalu-malonda umwèpelè, dibèji òm̀wèpelè, dīyì dyamba òm̀wèpelè mu maalu-malonda, mùdiku muntu nànsha umwe mubàtìjìibwe mu dìnà dyà “Taatu, Mwànà, Nyumà Mwímpè,” too ne ku Nsangilu wa Nicée wa èkèleeziyà wa Kàtòlikè. Lwāyi, nucintwadileku; nènku nèndamike citaata paanyimà pàanyi apa ne kwenda mu Jeffersonville mujimà emu, ne nwènu munyimà mwānyì ne mpungi, nwenda nwela. Nèmfùndepù ne: “Mupròfetà wa mashimi, ùpambwisha bantu.”

250 Nènku, mpaasàtà, pawikala kaaba aka mu dindà emu, udi mufwānyìne kwenza nànkù, bìvwa bikèngela bwà wèwè kungitabila bwà kukwenzela nànkù’s. Nwamònu anyì? Lwāku, undeeje. Kàdi’s ngwèwè awu uciina.

251 Mpindyewu, ncinyì aci? *Eci s’ki Dibuuulula. Eci s’ki Dibuuulula.* Nènku eci s’ki Nyumà Mwímpè, Kilistò, munkacì mwà kutùma Mukenji Wèndè kùdi maèkèleeziyà. Ûtèelejaayi. Ûtèelejaayi. Ki cidì Bible ulongesha.

252 Cyàkabwelela penyì? Bu nwènu ànu kanùyì mwà kufiika munda to, kanùyì batentemukeku, munda mwà lumingu elu, a—angàtaayi Nsangilu yà Nicée ayi. Angataayi mukàndà wà *Baabolònà Yìbidì* wà Hislop. Angataayi. . .



<sup>253</sup> Mpindyewu, bwalu-bulonda bwà Josèphe mbulelèlè, kàdi yèyè wàkafùnda ànu kasaka kàmwèpelè bwà Kilistò, wàmba ne: “Kuvwa muntu dìnà dyèndè Yesù uvwa wendakana eku ne eku, wòndopa bantu. Ne—ne yèyè wàkafwà, anyi, to, Pilaatù wàkamushebeya, ne—ne, anyi Helòode, anyi wàkamushebeya. Ki pashiishe bayiidi kuyabo kwiba mubidi wèndè, ne kuwùsokokabò. Nènku pashiishe dilòlò dyònsò bàyaaya kàdi kukosa katùpà kàwù ne bàkadya.” Yèyè ne: “Bavwa badi bàà munyiinyi wà bantu’s.” Kàdi pààbi’s, bavwa bangata mèèsà à Mukalenge, nudi numòna’s. Meeji à musunya! Josèphe awu kî mmuntu wa kutèèlejaku to.

<sup>254</sup> Kàdi angataayi *Mukàndà Wà Bafwile Diitabuujà Wà Foxe*. Ke mwîmpè ùdiku ne wà bushùwà’s. *Mukàndà Wà Bafwile Diitabuujà Wà Foxe*, mbanganyi bàkààdiku bawùbale? Bushùwà. *Bikondo Byà Mbangilu* byà Pember, anyi—anyi *Baabulònà Yibidi* yà Hislop, anyi—anyi ùmwè munène wà mujaadikiibwe. Anyi, mutàmbe—mutàmbe bunène utùdì nawu s’ke Nsangilu wa Nicée, Nsangilu mudyanjidile Nicée ne Nsangilu wa Nicée. Nènku nènùsanganemu ne, aci kacya kacyakatèèdiibwaku to, kùdi muntu nànsha umwe.

<sup>255</sup> Angataayi Mifùndu Minsantu bwà numòne ní kùkaatukù muntu kampànda mu Bible emu ukààdikù mubatijiibwe, bàkwàta mudimu ne myànzu ayi, dìnà dyà “Taatù, Mwànà, ne Nyumà Mwîmpè.” Bidi byàmba nzambi yisàtù. Abi mbwà dyenza dyà mushingà wà bampàngaanu. Nènku cyena Kàtòlikè kî cingà cintu pa buloba to ànu mmwè—mmwènekèlu wa cimpàngaanu wa bwena Kilistò. Nènku ku èkèleeziyà wa Kàtòlikè kulwakù Martin Luther, John Wesley, Baptiste, ba-Presbytériens, ne bakwàbò.

<sup>256</sup> Kàdi mu matùkù à ndekeelu kuvwa ciibi citèèkiibwe pankaci apu, cyôci ke cyàkakàngulà Bulelèlè cyàkàbìdì, ne: “Bible ngudi mwambe nànkù,” ne mupròfeta munène uvwa ne cyà kulwa pa buloba mu matùkù à ndekeelu. Nènku tudi twitabuujà ne yèyè ulwalwa. Tangilàayi. Nènku yèyè neikale ne Èkèleeziyà. Mpindyewu, netùmòne cyôci eci.

<sup>257</sup> Mpindyewu—mpindyewu, vùlukàayi ne, eci n’Dibuulula. Kwèna mwà kuumushilaKu to. Mpindyewu, nkadyombo kaayi aka’s wè! Petàayi muntu umwèpelè mu Bible, mwaba nànsha ùmwè ukaadibuku babàtiziè muntu mu dìnà dyà “Taatù, Mwànà, Nyumà Mwîmpè,” anyi mene bamyamineku muntu kampànda màyi pa mutù, petàayiku aci mu Bible, bwà dilekelediibwa dyà mpèkaatù yààbo. Kacya kabàtukù banji kucyèza to. Nènku muntu yònsò, nànsha bôbò bamubàtiziè bishi, uvwa ne cyà kulwa e kubatijiibwa, cyàkàbìdì, mu Dìnà dyà “Yesù Kilistò,” bwà kupetaye Nyumà Mwîmpè.

<sup>258</sup> Byenzedi 19: “Pòlò kupicilaye ku nseke mitumbùke yà ku Efeso, kusanganaye bayiidi kampànda.” Yèyè ne...Bayiidi,

bavwa munkaci mwà kwenza disangisha dinène. Bavwa benda balonda muntu kampànda dínà dyèndè Apòlò, uvwa mwakwidyanganyi mukùdimune mucima; Baptiste uvwa mwitabuuje Yone Mubatiji, ne mwikale ujaadika ku Mifundu ne Yesù nguvwa Kilistò awu.

259 Pòlò kupicilaye mwaba awu e kumònaye Akùlà ne Piisikilà, mu nshapità wa 18 wa Byenzedi. Ki pashìshe kuyaye bwà kudia cyàkudya cyà mundaamuunya, anyi cintu kampànda cikwàbò, ne Akùlà ne Piisikilà. Kumwambilabò bwà mwine muntu munène ewu. Kuyabò bwà kamutèeleja. Yèyè kumutèeleja dilòlò adi. Yèyè ne: “Údi bímpè be. Abi’s mbilenga be. Abi’s mbímpè. Kàdi,” yèyè ne, “nukàadi bapete Nyumà Mwímpè kacya nwítabuuja anyi?”

260 Kàdi nwènù ba-Baptistes bakwàte ne byà luse bàdi pàapa baba, bàdi nwela meeji ne nudi bapete Nyumà Mwímpè *panùdi* nwitabuuja apu?

Yèyè ne: “Nwàkapeta Nyumà Mwímpè *kacya* nwítabuuja anyi?”

Muntu kampànda kwamba ne: “Aci kacivwa cifunda amu to.”

261 Ndi ngeela aci kadyòmbò. Ndi ne nkudimwinu wà cyena Ngelika mujaadika mwab’ewu mene’s, ne cyena Ebèlu, kàbìdi. Bible ùdi wamba mu cyena Ngelika, ne byònsò bìbìdi, cyena Ebèlu, ne kàbìdi mu ci-Alàmàyikà. Mu byòbi byònsò bisàtu abi, ndi naabi mwab’ewu mene, mbàmbe ne: “Nwàkapeta Nyumà Mwímpè *kacya* nwítabuuja anyi?” Ncyà bushùwà. “Nwàkapeta Nyumà Mwímpè kacya nwítabuuja anyi?”

262 Mpindyewu, yèyè ne: “Katwèna bamanyeku ne Nyumà Mwímpè ùtukù to.”

Ki yèyè ne: “Nwàkabàtijiibwa mu dibatiiza kaayi?”

263 Bòbò ne: “Twètù tukaadi bamane kubatiijiibwa kùdi muntu wàkabàtiiza Mukalenge Yesù Kilistò awu. Twètù tudi babàtijiibwe mu dibatiiza dyà Yone,” mu ciinà cimwècimwè cyà màyi aci, pàmwäpa, “muntu umweumwe awu.”

264 Pòlò wàkamba ne: “Aci kacyakukùmbanakù to. Wàkabatiiza ànu bwà kanyinganyinga cyanàànà, kacivwa bwà dilekelediibwa dyà mpèkaatù nànsha.”

265 Mpindyewu, bàmwè bàà ku nwènù ba-Unitaires bàdi balwa mwab’awu ne—ne babàtiize nàнку, bibì. Nudi nubatiiza nàнку, bwà lupandu. Màyi kaèna asungila muntu to; m’Mashi, kanyinganyinga. Kí mmu dibatiiza bwà difùkùludiibwa to. To, mukalenge. Difùkùludiibwa dilwalwa ku Nyumà. Dibatiiza didi—didi ncyenzedi cyà patòoke cyà mudimu wà difùkùludiibwa udi wenzeka munda. Nwamònu anyi? Èyo. Mònaayi.

266 Yèyè ne: “Nwakapeta Nyumà Mwímpè kacya nwítabuuja anyi?” Bôbò ne. . .

Yèyè ne: “Katwèna bamanye ne Nyumà Mwímpè ùtukù to.”

Yèyè kwamba ne: “Nwènù nwákabàtìijibwa bishi?”

Bwôbò ne: “Twètù tudi babàtìijibwe mu Yone.”

267 Wákamba ne: “Bulelèlè Yone wákabàtiiza bwà kanyinganyinga, bwà kanyinganyinga, wamba ne ‘bivwa bìkèngela bwà nwènù kuMwitabuuja Yèyè,’ Mwànà wa mùkòòkò awu, Mulambu ùvwa ne cyà kulwa, Mukalenge Yesù Kilistò.” Nènku pàakumwabo cyòci eci, bàakabàtìijibwa cyàkàbìdì mu Dìnà dyà Yesù Kilistò. Ki Pòlò kubàtentekelayè byanza ne kupetabò Nyumà Mwímpè, ne kwakulabò mu myakulu ne kwambabò cipròfetà.

268 Ngambilaayaaku aci ne kî m’Mufundu to, ne nundeeje mwaba kampànda mukwàbò, ùkààtùku muntu kanà yònsò ewu mubàtìijibwe mungà mùshindù mu Dipungila Dipyadiya pa kuumusha mu Dìnà dyà Mukalenge Yesù Kilistò. Ndeeyaayi.

269 Munsantu Agàbò ne bààbùngì, kùvwa bakwàbò, bàakabàtìijibwa too ne ku cikondo cyà—cyà Nsangilu wa Nicée, ne yònsò wa kùdìbo wákabàtìijibwa mu Dìnà dyà Yesù Kilistò. Ba-missionnaires bàakabundulula madimi à bwambi ne Dìnà dyà Yesù Kilistò.

270 Kàdi pàakalwa Nsangilu wa Nicée, byàkakèngela bìikale ne nzambi yisàtù. Kuumushabò Pòlò . . . anyi kuumushabò Jupiter, kàdi kwalujabò Pòlò pa kaaba kèndè aku. Kuumushabò Venus, ne kutèèkabò Mariyà pa kaaba kèndè aku’s. Bavwa ne nzambi yà mishindù yònsò, bansantu bàà mishindù yònsò ne bikwàbò byònsò, ne kwenza dibatiiza dyà busatu ne kudidiisha beena Mishòdnyì. Ne bàcìdi ànu batungunuka ne kucisùkumina.

271 Kàdi Makènkè à dilòòlò àfiki mpindyewu. Mupròfetà wákamba ne: “Nekwikalè Bukènkè ku ìbaamulòòlò.”

Nekwikalè—nekwikalè Bukènkè ku ìbaamulòòlò,

Kajila kàa ku Butumbi nenùkàpetè bushùwà;

Mu njila wa màyi, ki Bukènkè leelù ewu,

Bajiika mu Dìnà dyà musinga dyà Yesù.

Bànà ne bakolè, nyingàlalaayi ku mpèkaatù yènù yònsò,

Nyumà Mwímpè neàbwelè bushùwà;

Makènkè à dilòòlò àfiki,

Mbulelèlè ne Nzambi ne Kilistò bàdi Umwe.

272 Nudi nuCìitabuuja anyi? Peetèlo wákamba, mu Ditùkù dyà Mpenta ne: “Eci cìmanyiibwè, kunùdì nwènù, nzùbu wa Izalèlèlè, ne Nzambi mmwenze Yesù umwèumwè ewu, Unùdì bapoopèle pa nkùruse ewu, byònsò bibìdì Mukalenge ne Kilistò;” mvensa wa 16 wa nshapità mwi2. Èyowà. “Nzambi mmwenze Yesù

umwèumwe ewu, Unùdi bapoopèlè pa nkùruse ewu, byònsò bibìdi Mukalenge ne Kilistò. Nzùbu mujimà wa Izalèlèlà amanye, ne ditwishiibwa dyònsò.”

<sup>273</sup> Mvwa nyiikila ne mwena Yuda kampànda ànu àbìdi àdi panshi aa, mu Nzùbu wa Davidi emu, kwambaye ne: “Nwènu bantu bàà Bisàmbà byà bendè kanwèna mwà kukosolola Nzambì mu bitùpà bisàtu kàdi kuMupa mwena Yuda to. Twètù tudi bamanye bìmpè bipite abi.”

<sup>274</sup> Mémè ne: “Cìdi ànu aci, Laabì. Katwèna tukosa Nzambì mu bitùpà bisàtu to.” Mémè ne: “Utu witabuuja bapròfetà anyi?”

Yèyè ne: “Cyà bushùwà’s.”

Mémè ne: “Udi witabuuja Yeshàayi 9:6 anyi?”

Yèyè ne: “Èyowà.”

Mémè ne: “Uvwa mupròfetà wàmba awu nganyi?”

“Maasiyà.”

Mémè ne: “Mbulelè kaayi bwìkalà Maasiyà naabu ne Nzambì?”

Yèyè ne: “Yèyè neikalè Nzambì.”

Mémè ne: “Aci ncyà bushùwà.” Amen.

Nwamònu’s, s’ki bwalu abu’s. Nwamònu’s, kanwèna mwà kuMukòsa mu bitùpà bisàtù to.

<sup>275</sup> Nwènu ba-missionnaires bàdi mwaba ewu aba... Umwe wa kudibo ùyaaya kùdi beena Yuda, ngeela meeji, muntu udi musòmbè *apa* ewu. Kudìdingiku bwà kupèèsha mwena Yuda nànsha umwe “Taàtù, Mwànà, ne Nyumà Mwìmpè to”. Neàkwàmbilè ne lukasa lwònsò ne, mmumanye kùdici cifumina ne: “Nsangilu wa Nicée.” Yèyè kààkutèèlejakù aci to. Kàdi mufikishe ku dimòna mwaba ùvwa Nzambì muvwijìbwe mubidi, ne Yèyè ke Nzambì umwèpelè udiku. Nzambì, muvwijìbwe mubidi mu mmwenekelu wa buntu ne musòmbèlè munkaci mwètù, bwà kutujidila; kuumusha, bwà Yèyè mwine Wàmòna mwà kulwa mu mmwenekelu wa Nyumà Mwìmpè. Nzambì, Taatù, Nyumà Mwìmpè, m’Mupèrsona umwèumwè awu.

<sup>276</sup> Bible mmwambe mu—mu dilondangana dyà bankambwa bàà Yesù Kilistò, mu nshapità wa 1 wa Maataayi, Mmwambe ne: “Abraham wàkalela Izàkà. Izàkà wàkalela Yakòbò.” Wenda utungunuka ànu nànkù, wamba, ne pashiishe mu... Ngànjibi kucibala tũng, nènku dìbà adi mpindyewu nènùshiishè kumanya cìndi munkaci mwà kwakula. Maataayi, nshapità wa 1. Nènku netwìkalè... Mpindyewu tubangilaayi ku mvensa wa 18.

*Mpindyewu dilediibwa dyà Yesù Kilistò dyàkenzeka mùshindù ewu: Pàvwà... mamw’Èndè Mariyà mubangila kùdi Yòzefù, kumpàla kwà kushàalabo pàmwè, wàkasanganyiiibwa ne difù dyà... .*

277 “Nzambi Taatù anyi”? Aci cidi cibàdiibwa mùshindù awu anyi? [Disangisha didi dyàmbe ne: “To.”—Muf.] Musangana ne Difù dyà Nganyi? [“Nyumà Mwímpè.”] Kùdì. . . [Katùpà kàà mukàbà wà mèyì munda mutupu.] S’mwva ngeela meeji ne Nzambi Taatù ki Tatw’Èndè? Dìbà adi, Nzambi, Taatù ne Nyumà Mwímpè, bàdi Nyumà umweumwe awu, anyi Ûvwa ne Baataatù bàbìdì.

*Pashiishe Yözefù bàyendè, bu mùvwàye muntu mujaalàme, . . .kàyi muswè bwà kumufwìshaye bundu, ùvwa wela meeji. . .kumubengaye mu musokoko.*

*Kàdi pàcìvwàye wèlangana meeji pa maalu aa, mònaayi ne, mwanjèlò wa Mukalenge wàkamuwènekela mu cildòtá, wàmbe ne: Yözefù, wéwè mwànà wa Davìdì, kuciinyi nànsha. . .angàtá Màriyá mukàjèèbè, bwalu udi mwimita munda mwèndè awu ngwa kùdì. . .*

278 “Nzambi Taatù anyi”? Huh? [Disangisha didi dyàmbe ne: “To. ‘Nyumà Mwímpè.’”—Muf.] “Nyumà Mwímpè.” Dìbà adi Nganyi uvwa Tatw’Èndè wa Yesù Kilistò? [“Nyumà Mwímpè.”] Nyumà Mwímpè. Ncinyi cidi munda mwèbè? [“Nyumà Mwímpè.”] Èè, aci’s n’Nzambi, Taatù awu, kàbìdì’s. Ki mmwòmò anyi? Bushùwà’s.

*Nènku yéyè neàlelè mwànà wa balùme, nènku wéwè neumwinyike dìnà dyèndè YESÙ: . . .*

279 Nzambi Taatù nyéyè ewu, Nzambi Nyumà Mwímpè nyéyè ewu, ne ki Nzambi Mwànà nyéyè ewu, nwamònu’s, ki Nzambi yisàtù nyòyì ayi’s. Bible kèna wàmbe nànkù to. Bikèngela bàbìdì aba bìikale bàà mwomùmwe, cyanààna Yéyè uvwa ne baataatù bàbìdì. Nwamònu anyi? Yéyè kèna mwà kwikala ne baataatù bàbìdì to. Aci kaayi nudi bamanye.

*Mpindyewu, yéyè neàlelè mwànà wa balùme, nènku bòbò nebàmwinyike dìnà ne YESÙ: bwalu yéyè ki wàsùngila cisàmbà cyèndè ku mpèkaatù yàbò.*

*Mpindyewu byònsò ebi byàkenzeka, bwà kumònabi mwà kuuja cìwà cyakula kùdì Mukalenge ku mupròfetá, wàmbe ne:*

*. . .virgo neimite, ne neàlelè mwànà wa balùme, ne nebàmwinyike dìnà ne Emanùwèlè, cidi ku dyumvwija cyàmbe ne, Nzambi neetù.*

280 Ki nshapità wa 1 wa Maatàayi nyéyè awu’s.

281 Maatàayi 28:19, mùdì Yesù mwambe ne: “Ndaayi, nubatiize mu Dìnà dyà Taatù, Mwànà, ne Nyumà Mwímpè.” Dìnà dyà Taatù, Mwànà, Nyumà Mwímpè ncinyi? Yesù Kilistò, mu bushùwà bwà bwalu’s.

282 Udi ubala bwalu bulonda bwà dinanga, bwàmbe ne: “John ne Marie bavwa ne nsòmbelu wa disànkà pashiishe.” John ne

Marie mbanganyi? Alùkila ku mbangilu wa bwalu-bulonda abu, bwà ucijandule's.

283 Kòkù kakùyi cintu bu nàнку to, kakùyi dìnà dyà: “Taatù, Mwànà, anyi Nyumà Mwîmpè,” dîbà adi Nganyi, Dìnà adi ndyà Nganyi? Alùkila, ku mbangilu wa bwalu-bulonda abu, bwà umòne ne Mwena bwalu bùvwàbo bààkula Nganyi.

284 Peetèlo, mu Ditùkù dyà Mpenta, wàkamba ne: “Nyingàlàlaayi, muntu ne muntu wa kunùdì, nubatiijùbwe mu Dìnà dyà ‘Yesù Kilstò’ bwà dilekelediibwa dyà mpèkaatù.” Ûvwa ne dîbuulula.

Yone uvwa ne dîbuulula.

285 Yesù *uvwa* Dîbuulula adi, Yèyè wàkaDipatula mwab'ewu mene mu Mifùndu ne: “Mémè kî Ewu wàkadiku, udiku, ne wâlwa, wa Bukolè bwònsò.” Yoyòyò! Èyo.

286 Mpindyewu, twàngatàayi mvensa wa 7, ne lukasalukasa mpindyewu, kumpàla kwà twètù kupatuka, ne lukasa ne mwètù mwònsò. Wa Bukolè bwònsò.

*. . .bukòòkes- . . .butùmbi ne bukòòkeshi bwà kashidi ne kashidi. Amen.*

*Ne . . .mmutuuvije bamfùmù ne baakwidi bwà Nzambi . . .Tatwëndè; ne kùdìye kwikale butùmbi ne bukòòkeshi bwà kashidi ne kashidi. Amen.*

287 Nudi numòna dîbuulula adi mwaba awu, mùdìDi dîbuulùdìbwe anyi? Mùshindù ùdi Nzambi . . .Bantu bàdikoonya mu mitù ne bàdìtuula nsuki, ne bikwàbò, bàteeta bwà kujandula cìdì “Taatù, Mwànà, Nyumà Mwîmpè” ne ncinyi, benza yìsàtu, mu umwe.

Kwikadi wàdìtùùla nsuki ne wàdikoonya mu mutù to. Banduluka cyanàànà. Dîbuulula's dìdì difumina mu Dyulu. Nènku aci's ncyà bushùwà. Yèyè neàbuulule ne, kî “n'Taatù, Mwànà, ne Nyumà Mwîmpè to.” Mmidimu yìsàtu yìdì Nzambi musòmbèlemu.

288 Yèyè uvwa mu mudimu wà, “Nyumà,” ku Yèyè nkààyende, bwalu muntu wetù ewu awu ùdi wenza bu udi ùdìpwekesha milongo, pashiishe Yèyè kuDyenzela mubidi, kusòmbelamù, bwà kupatula Mashi Èndè Yèyè sungasunga; kabiyi ku disangila dyà mulùme ne mukàjì to, bu mwàkadibi mu budimi bwà Edènà amu to, kàdi kupatula mubidi wa mufùka. Nènku ku mubidi mulela kùdì virgo awu, Yèyè wàkafila Mashi àvwa matùjìdile ne matùsùùlule ku bupidyà bwètù, bwà kuMwitabuuja. Dîbà adi, tudi twenza nàнку, tudi tuMupeta mu mwoyi wètù, aci's n'Nzambi munda mwètù; Nzambi: Taatù, Mwànà, ne Nyumà Mwîmpè. Nwamònu anyi? Ànu bu Mupròfetà, Mwakwidi, ne Mfùmù, kî cintu cimwècimwè aci. Èyo.

289 Mpindyewu, mvensa wa 7, eci ndimanyisha. Dimanyisha dìdì ne:

*Mònaayi, yêyè ùdi ùlwa ne matutu; ne òsù dyònsò nedimùmònè, . . . aba kàbìdì bààkamutwà difùmà abu: ne bifuku byònsò byà pa buloba nebidile mwadi bwà bwalu bwèndè.*

<sup>290</sup> Kaa! Tudi ne dîbà bûngì kaayi? Abi's mbilenga be mwab'awu. Nudiku mwà kulama tukwàbò tusunsa makumi àsàt- . . . makumi àbìdì anyi? [Disangisha dìdì dyàmba ne: "Èyowà."—Muf.] Nudiku bafwànyine kwenza nànkù anyi? ["Amen."] Èyo. Mpindyewu, dîbà adi, mààlabà. . . Dilòlò edi, netùteetè bwà kwangatakù bikwàbò byà ku *Cisanga Cyà Paatèmò* abi, dilòlò edi. Leelù ewu, netùjikije ne dimanyisha.

<sup>291</sup> Kaa! Nudi badyūmvwè bîmpè anyi? [Disangisha dìdì dyàmba ne: "Amen."—Muf.] Nudi banange Bible wa kale ewu anyi? ["Amen."] N'Dibuulula. Ncinyi, ncinyi ciine aci? Nzambi utùluka, mu Mukàndà ewu, ne wumusha cibwikilu aci, wàmba ne: "S'ki Yêyè awu: Mupròfetà, Mwakwidi, Mfùmù; Taatù, Mwànà, Nyumà Mwîmpè; Èwu wàkadiku, udiku, ne wâlwa awu. Bintu byònsò ebi, Yêyè ùdi Nzambi."

<sup>292</sup> Mpindyewu, twänjì tuumushaayi cibwikilu aci, ànu bwà tusunsa tukesè cyanààná mpindyewu, bu Mukalenge mwà kutùkwacisha, kuumusha cibwikilu aci ku mèsù kwètù. Ne kupeta . . .

*Mònaayi, yêyè ùdi ùlwa ne matutu; . . .*

<sup>293</sup> Mpindyewu, Yêyè ulwalwa bishi? "Ne matutu." Ditutu dyà mùshindù kaayi? Matutu à butùmbi. Ki ndimwè dyà ku mavuba mafiikuluke à citwàla-mvula awu, divuba dyà mvula to, kàdi mmatutu à butùmbi.

<sup>294</sup> Nènùmònè ne nditutu dyà mùshindù kaayi muvwaYe muDijìngile pààkamònà Peetèlo ne bakwàbò abu cikèèná-kumòna Cyèndè pa Mukùnà wà Dikudimuka dyà mpala, ditutu dyàkaMubwikila. Bilùlù Byèndè kubàlakanabi. Úvwa mujìngila kùdì ditutu, bukolè bwà Nzambi.

<sup>295</sup> Kaa, tudi tukafika ku cyòci aci, apa mu bikondo byà èkèleeziyà ebi's. Ndi nnwambila ne, bìdì ànu—bìdì ànu binguosha ku muntu wànyì wa munda awu, pàndì ngeelaku meeji's. Civwa dilwa Dyèndè. . . Ndi mmona ditùkù ditùdimu ne mwoyi edi, mùdì kamùyi mushààle kantu nànsha kàmwè, ditekemena nànsha dyà kànà, pa kuumusha Dilwa Dyèndè.

<sup>296</sup> Mpindyewu netùfike ku cyòci eci ne lukasa lwònsò. Mpindyewu vùlukàayi.

*. . . òsù dyònsò nedimùmònè, . . .*

<sup>297</sup> Mpindyewu, nènku aci kacivwa Dyambwibwa to, mmwòmò anyi? [Disangisha dìdì dyàmba ne: "To."—Muf.] Nwamònu anyi? Kacivwa Dyambwibwa to. Kacivwa Dyambwibwa to. CivwaYè wakwila aci cinyi? Dilwa dyà cyàkàbìdì.

*...ne aba kàbidì bàakamutwa difùmà abu: ne bifuku byònsò byà pa buloba nèbidile mwadi bwà bwalu bwèndè.*

<sup>298</sup> Mpindyewu netwàlukile bwà kwangata bùmwe bwalu-bulonda. Twàlukilàayi mu Zekàayi, bwà twàngate nshapità wa 12 wa Zekàayi. Zekàayi's. Èyo.

<sup>299</sup> “Nènku Mukalenge ùvwà ùsàkidila ku èkèleeziyà ku ditùkù ne ku ditùkù aba bavwà mwà kusùngidiibwa abu.” Mùshindù mwine wutùdi ne kusàkidila bwà dibuulula dimpè dyà Yesù Kilistò's wè! Kwènàku ne disànkà bwà bwalu Bwèndè anyi? Mpindyewu, netwélè eci mu mmwenekelu wa mukàndà ànu ne lukasa ne mwètù mwònsò, bwà bantu, nènku dîbà adi nudi mwà kucipeta, bwà kucibala mu cinyàanya cyà mu cibambalu cyènù amu ne bikwàbò, kàdi kucilonga, wèwè mwine. Èyo.

<sup>300</sup> Zekàayi, Zekàayi awu, nshapità wa 12 mpindyewu wa Zekàayi. Nènku tudi baswè, kwangata eci munkaci mwà disambila mpindyewu. Nènku ndi muswè kwangata eci bwà butùmbi bwà Nzambi. Mpindyewu, Zekàayi 12, tubangilàayi ku mvensa wa 9. Teelejàayaaku ne ntema mpindyewu. Ùdi wakula bwà Dilwa. Zekàayi 12, nènku netùbangile ku mvensa wa 9, mu mvensa wa 9.

*Nènku nebyènzeke ne . . .*

Zekàayi, wàmba cipròfetà, bidimu nkàmà yinaayi ne makumi mwandamukùlù ne mwandamutekète kumpalà kwa dilwa dyà Kilistò.

*Nènku nebyènzeke mu ditùkù adi ne, nènkebe mwà kubutula ónsò. . . matùnga àlwà kulwisha Yelusàlèrà. (Anji elàayi bi meeji pa bwalu abu's.)*

*Nènku mèmè nèngùcikiyè pa nzùbu wa Davidi, ne pa bantu bàdi basòmbèle mu Yelusàlèrà, nyumà wa ngàsà ne wa misèngeleelu, ne bóbò nebàtàngiyè mèsù kùndi mèmè wàkatwabò difùmà, . . .*

<sup>301</sup> Mpindyewu, ndìbà kaayi dyàlukila Èvànjeeliyò kùdi beena Yuda? Pìikala ditùkù dyà bàà Bisàmbà byà bendè dijike, Èvànjeeliyò ùkaadi pabwìpì, bwà kuya kùdi beena Yuda. Kaa, mvwa mufwànyine, bu mèmè mwà kudyanjila kunwambila kaacintu kampànda kàdi kàmba kwenzeka ànu mwab'ewu mene, nwamònu's, mu ditùkù edi mene. Nudi numòna anyi? Cidi pabwìpì ne kwenzeka. Tudi bacyùmvwè mu Cikondo cyà Èkèleeziyà. Nènku cintu cinène eci cidì pabwìpì ne kwenzeka, necikwobèkè too ne ku Bwàkabuulwibwà 11 ne cyàngata bapròfetà bàbidì abu, Eliyà ne Mòsà bàalukila cyàkàbidì bwà beena Yuda. Tudi badilongòlòle bwà cyòci aci. Byònsò mbitèeka mu bulongame, mbimana kulongolola. Mukenji wa bàà Bisàmbà byà bendè ewu, ànu mùvwà beena Yuda bawùtwadila bàà Bisàmbà byà bendè amu, bàà Bisàmbà byà bendè nebàwalùje cyàkàbidì kùdi beena Yuda. Nènku Dyambwibwa nedilwe.



<sup>302</sup> Mpindyewu vùlukàayi ne, eci cilwalwà eci, paanyimà pàà Dikenga dinène. . . Èkèleeziyà kèna ùpicila mu Dikenga dinène to. Tudi bamanye aci. Bible ngudi mwambe nàнку. Nwamònu anyì? Èyo.

<sup>303</sup> Mpindyewu, Yéyè neàpòngololè pa nzùbu wa Izalèlèlà, (cinyì?) Nyumà Mwîmpè umwèumwè awu, nwamònu's, paanyimà pàà Èkèleeziyà wa bàà Bisàmbà byà bendè mumane kuya.

*. . . nènku bôbò kutangija mèsù kúndi mémè wakatùbulabò ne difumà awu, ne bôbò nebàmudilè, mùdi muntu udi udila mwanèndè umwèpelè wa balùme, ne nebìikalè mu kanyinganyinga bwà bwalu bwèndè, mùdi muntu mu kanyinganyinga bwà mwanààbutè wendè.*

*Nènku mu ditùkù adi nekwikalè. . . madilu manène mu Yelusàlemà, . . . ne madilu. . . mu—mu cibandabanda cyà Meegidòdnà.*

*Ne—ne ditùnga nedidile, dikù ne dikù dyònsò pa bwàdi; dikù dyà nzùbu wa Davidi pa bwàdi, ne. . . dikù dyà nzùbu wa Natànà pa bwàdi, ne umwe ne umwe wa ku nzùbu pa bwèndè; (pààmònabo, cyenzeka aci, cyenzeka pàalwaYe mu matutu à butumbi, ku dimwènèka Dyèndè diibìdi.)*

<sup>304</sup> Nènku piikala beena Yuda bààkaMutwà difumà abu. . . Nudi bamanye's, Mufundu mukwàbò ùdi wàmba ne nebàMukonke, mwaba ùvwàYe mupetèle mputà eyi's.

Yéyè ne: “Mu nzùbu wa mulunda Wanyì.”

<sup>305</sup> Nènku kacýàkwikala ànu cikondo cyà madilu bwà beena Yuda nkàyaabò bààkaMubenga, bu Maasiyà abu to, kàdi neciikalè cikondo cyà madilu bwà bàà Bisàmbà byà bendè biikala bashààle paanyimà apa abu, bàdi biitàbe. . . bàdi baMubenge bu Maasiyà wabò wa ditùkù edi abu. Nebiikalè munkaci mwà kudila mwadi ne kudila. Virgo mukùtakàne neikalè munkaci mwà kudila mwadi. Ki èkèleeziyà wàkabènga kwikala ne Maanyì mu bukènkè bwèndè awu. Kuvwa bavirgo dikumi bàkapatuka, bònsò bantu bìmpè, kàdi bataanu bà ku bôwò bavwa ne Maanyì mu myèndù yàbò. Bakwàbò bataanu bàvwa bantu bìmpè, bantu bìmpè, kàdi bapangile bwà kwangata Maanyì mu myèndù yàbò. “Nènku bàkiipaciibwa mu mîdimà yà pambelu mwikala myadi, ditwà dyà mikemu, ne disumakaja dyà mènù.”

<sup>306</sup> S'ki cyôci eci ne: “Bôbò nebìikalè mu didila dyà mwadi.” Bible mmwambe apa ne: “Bôbò nebìikalè mu didila dyà mwadi, ne myoyi micibùlùke be, mu mùshindù wà ne nànsha. . . ”

<sup>307</sup> Mwab'ewu, nènnpèèshèku mukwàbò, Genèsè 45, panwikalà bàswè kufika ku cyôci aci. Tuyaayiku ànu bwà

katancì kakesè cyanààná bwà kubala kàbidì cyôci aci mu Genèsè, kùdi . . . ngeela meeji, ku nshapità wa 45 wa Genèsè. Ndi muswè kwangata eci kaaba aka, Yòzefù ùdìmanyisha kùdi bàà—bàà kwàbò. Nènku netùpetè eci, ànu kuleeja bi—bimfwànyì byà cìikalà mwà kwenzeka mu ditùkù adi aci, díbà adi netùciswìkè pàmwè.

*Dìbà adi Yòzefù kàvwa mwà kudìkànda yéyè mwine kumpàla kwà . . . aba bàvwà biimane nendè abu to; ne kuboobolayè mwadi, Enzaayi bwà muntu yònsò aye . . . kule naanyi.*

<sup>308</sup> Mpindyewu vùlukàayi ne, Yòzefù, ùdìmanyisha, kwelaye lubila ne: “Muntu yònsò ùmuke kumpàla kwànyì.”

*Nènku kakwàkashààlakù muntu nànsha umwe mwimàne pàmwè nendè to, pàvwà Yòzefù ùdìmanyisha kùdi bàná bààbò apu.*

*Ki kwelayè cibòòbò wa mwadi, ne beena Ejiipitu ne bàà mu nzùbu wa Pàlò kumutèèlejàbo. (Úvwa ne cyà kwikala mwelè mbilà mikolè.)*

*Ki Yòzefù kwambilaye bàná bààbò ne: Mémè ndi Yòzefù; taatù wanyi ùcìdi ne mwoyi anyi? Kàdi bàná bààbò kabààkapeta mùshindù wa kumwandamuna to; bwalu barwa batàcishìibwe mu bwikadi bwèndè.*

*Ki Yòzefù kwambilaye bàná bààbò ne: Seemenaayi pabwìpì . . . naanyi, ndi nnùsèngeleela. Ki kuseemenabo pabwìpì. Ki yéyè ne: Mémè ndi Yòzefù mwanèènú, udi . . . unùvwà—unùvwà basùmbìshe mu Ejiipitu.*

*Ki bwà cinyi mpindyewu kanwikadi nwàbungamijiibwa to, anyi kudìkwàcila ciji, bwà ne nuvwa bansùmbìshe bwà kulwa muneemu nànsha, bwalu Nzambì ngwàkantuma kumpàla kwènú bwà kunupàndisha. (Kaa, bilenga kaayipu’s we!)*

*Bwalu mu bidimu bìbìdì ebi kùdi . . . ciyòle cìdi mu ditùnga, ne . . . mwikala, kakwàkwikala ní mmwepu ní dinowa nànsha.*

*Nènku Nzambì ngwàkantuma kumpàla kwènú bwà kusùngidila ndelanganyi mu buloba, ne bwà kupandisha myoyi yènú ku dipìkudiibwa dinène.*

<sup>309</sup> Ngǎnjìbi kwangata mpindyewu ne kucìpalakaja ne Zekàayi, wa 12, ànu bwà katancì cyanààná. Mpindyewu, tudi bamanye aci, mu cifwànyikijilu. Nwènú balongeshe bifwànyikijilu, díbà adi nenùcìpetè misangu yònsò ànu mu cyôci, ngeela meeji, mu—mu cifwànyikijilu.

<sup>310</sup> Mpindyewu, Yòzefù, pààkalediibwaye, ùvwà mukinyiibwe kùdi bàná bààbò. Ncyà bushùwà anyi? Mpindyewu ndi muswè kunuleeja ne, Yòzefù udi uleeja Èkèleeziyà mùle tente ne Nyumà. Yòzefù úvwa mukinyiibwe kùdi bàná bààbò. Bwà cinyi? Bwalu

yêyè ùvwa wa nyumà. Yòzefù kàvwa ne civwàye mwà kwenza to bwalu ùvwa mwà kumòna cikèènà-kumòna. Kàvwa ne civwàye mwà kwenza to bwalu ùvwa uloota bilòòta, nwamònu's, ne ùvwa mwà kuumvwija bilòòta. Yêyè, ke civwà munda mwèndè ncyòcì aci. Kàvwa mwà kuleeja cintu cikwàbò nànsha cimwè civwà kaciyi mu yêyè to. Èè, ki dibà adi, bânà bààbò kumukinabo, kakùyi bwalu to. Kàdi tatwèndè ùvwa mumunange, bwalu tatwèndè ùvwa mupròfeta.

<sup>311</sup> Nudi numòna muvwabi ne Yesù anyi? Nzambì ùvwa munange Mwàn'Èndè. Kàdi bânà bààbò, Bafaalèsà ne Basadoka, bààkaMukina, bwalu Yêyè ùvwa mwà kwondopa babèèdi, ne kudyanjila kwamba maalu, ne kumòna bikèènà-kumòna, kuumvwija. Nudi bumvwe cìndì muswè kwamba aci anyi? “BààkaMukina, kakùyi bwalu to.”

<sup>312</sup> Kàdi cyàkenzelàbo Yòzefù ncinyi? Bààkadyambidila ne mmufwè, ne kumwelabò mu mukidi. Kwàngatabo cinkutu cyà mashi, cyà meekala mwandamutekète, civwà tatwèndè. . .

<sup>313</sup> Kùdi ànu meekala mwandamutekète mu mwanzankòngòlò. Ne mwanzankòngòlò, tudi bamanye ne ncinyi, bwà ne netùkafikekù pashiishe ndambu, ngeela meeji, dilòòlò edi. Mwanzankòngòlò kumutù Kwèndè eku, Yesù, mwaba udi ne: “Bikèngela Yêyè ikale ne mmwenekelu wa dibwe dyà jaspe ne sardoine, ne mwanzankòngòlò.” Mwanzankòngòlò ncipungidi.

<sup>314</sup> Ne aci civwa cipungidi cyà Nzambì pa Yòzefù. Ki pashiishe kulaababò mashi pa cinkutu cyèndè, ne kwalukilabo naaci kùdi taatù. Nènku bààkacinkila ne yêyè ùvwa mufwè. Nènku. . .

<sup>315</sup> Kàdi wàkabiishiibwa kupatudiibwa mu mùkidi amu ne kutèèkiibwa mu—mu. . .kupanyishiibwa kùdi Pàlò, muntu kampànda mu Ejiipitu amu's, ke ka—kalààlà kàà masàlaayi kampànda kumulama. Nènku pààkenzabo nànkù, yêyè, cintu cibi kumufiikilaci, ne kumwelabo mu bùlokò. Nènku mwômò amu kwambaye cipròfeta, ne kwambila bantu bàbìdì kùvwa umwe mwà kuya ne kùvwa mukwàbò ne cyà kuya; mufidi wa mvinyo ne mu—ne mufidi wa màmpà, bilondeshile bilòòtà byàbò.

<sup>316</sup> Ki pashiishe kubandishiibwaye kubangila ànu mwaba awu, too ne ku dyàbalùme dyà Pàlò. Ne muntu nànsha umwe kàvwaku mwà kulenga Pàlò to, ànu mupìcile kùdi Yòzefù. [Katùpà kàà mukàbà wà mèyi munda mutupu—Muf.]

<sup>317</sup> Cinyi eci. Mpindyewu, kùdi. . . dibà adi pààkasumbishiibwà Yòzefù mu beena Ejiipitu. Nènku, tàngilàayi, cintu cyònsò cyàkenzaye civwa cimfwànyì cyà Kilistò. Tàngilàayi mufidi wa mvinyo ewu ne mufidi wa màmpà ewu muntwamu, ne bùbìdì bwàbò bàvwa ne bilòòta. Nènku Yesù, pàvwàYe mu nzùbu Wèndè wa lukanu. Vùlukàayi ne, Yòzefù uvwa mu bùlokò. Nènku pàvwa Yesù mu Bwèndè bùlokò, (mùshindù kaayi?) mupoopela ku nkùruse, kwàkasungidiibwa muntu umwèpelè ne

umwe kujiminaye. Yözefù, pàvwàye mu bwèndè buloko, umwe wàkapànda, umwe wàkajimina.

318 Kàdi mònaayi. Pashiishe paanyimà pàà Yesù mumane kuumushiibwa ku nkùruse, Yèyè wàkazànjikiibwa mu Dyulu, ne mmusòmbe ku dyàbalùme dyà Nyumà munène, Yèhowàh. “Muntu nànsha umwe kèna mwà kulwa kùdi Nzambi kàyi mupìcile kùNdì nànsha.” Kakwèna byà *Mwoyi Mariyà* to, kakwèna byà ne wa dyàkalenga *kampànda* anyi wa dyàkalenga *kansanga* to. Kàdi, ku Yesù Kilistò: “Mutwangaji umwèpelè udiku pankaci pàà Nzambi ne bantu,” mubidi wà musinga mukolè ùvwa Nzambi musòmbèlemù, munkaci mwètù awu, wàkangata Dìna dyà Nzambi. Ki Nzambi kwangata dìnà dyà buntu. Nzambi kwangata . . .

319 Tàngilàayi kuneeku. Ku cibangidilu, pàvwà Adàmà . . . Ncyèna ànu mwà kuumuka ku aci to. Mbimweneke ànu bu ne muntu kampànda kèna ùCyùmvwa to, mwaba kampànda. Tàngilàayi. Ku cibangidilu . . . Lekelaayi nnùleeje cyàkàbìdì cintu kampànda. Nyumà Mwimpè ùdi undimwija bwà mèmè kwenza cyòcì eci. Ndi nshiyaku cyena-bwalu cyànyì bwà katancì kakesè. Pàakafika luumu lwà kumpàla mu Butùmbi, bwà ne mwànà wa balùme ùvwa mujimine, Adàmà, Nzambi wàkatuma Mwanjèlo anyi? Wàkatùma mwànà wa balùme anyi? Wàkatùma muntu mukwàbò anyi? Wàkalwa, Yèyè mwine, bwà kupikula mwàn'Èndè wa balùme mujimine awu. Àlèluuyàh! Nzambi kàakacyèyemeja kùdi muntu nànsha umwe to pa kuumusha Yèyè mwine. Nzambi wàkavwijiibwa mubidi ne wàkasòmbela munkaci mwètù, ne wàkapikula muntu, Yèyè mwine. Bìdi ne . . . “Tudi basùngidìibwe,” mùdi Bible mwambe, “ku Mashì à Nzambi.” Cyà cifwàka, Nzambi uvwa . . . Nzambi uvwa kàyi ufwa awu wàkavwijiibwa wa cifwàka, bwà kuumusha mpèkaatù, bwà kwikala Mwànà wa mùkòòkò, Yèyè mwine; bwà kubwela mu Butùmbi, mubwikila, ne Mashì Èndè Yèyè mwine kumpàla Kwèndè, dyàmwàmwa dyà cilàmbà cikudika.

320 Mpindyewu, ki Yözefù, uyààya mu Ejiipitu wàwa's. Nènku mwòmò amu kuzanjikiibwaye kuumukila ku bùlokò bwèndè aku, too ne ku dyàbalùme dyà Pàlò, ne kuvwijiibwaye mulami wa bintu byònsò. Nènku bintu byònsò kutantabì mu matùkù à Yözefù.

321 Mpindyewu, pààlukilà Yesù, nànsha cipèèla ciine necisàsè bu cilòngo cyà rose. Yèyè m'Wànà wa ditanta, cifwànyìkijilu cyà Yözefù.

322 Bàakatèèka Yözefù mu . . . Kalàlà kàà màsàlaayi awu uvwa nendè mwèndè mu nzùbu; byònsò bìvwàye wènza, wàkatanta. Kumwelabo mu bùlokò, ne bùlokò bujimà kutantabù. Byònsò byàkenzabo, yèyè wàkatanta. Ne pàakabàndishiibwàye, mutàmbe kutumbuka, wa Pàlò, cindondà cyà Pàlò, bintu

byònsò mu Ejiipitu kutantabi kumutù kwà ní ncinyi cyònsò pa buloba apa.

323 PààlukilàYe, nekwikalè buloba bwà ditanta. Bipèela byà kale nebisampilè, ne nekwikalè cyàkudyà myaba yònsò. Nènku tudi mwà kusòmbèla, muntu ne muntu, mwinshi mwà mucì wètù wà mfigì awu, ne kuseka ne kusànkà, ne kwikala ne mwoyi kashidi mu Bwikadi Bwèndè, pààpinganaYe bu Mfùmù.

324 Ûvwa Mwànà wa muntu, Mupròfetà. Amen. Ûvwa Mwànà wa muntu, Mulambu, Mwakwidi. Yèyè udi Mwànà wa muntu, bu Mfùmù, Mwànà wa Davidi musòmbè pa nkwasa wa butùmbi wa Udi Mutàmbe bunène. Mwànà wa muntu, Yèyè ùdi cish-. . . Nzambi mumwènèshiiibwe bu Mwànà wa muntu. Yèyè wàkatuuluka ne kushààlaye muntu, bwà kuumusha mpèkaatù kùdi bàà pa buloba. Wàkashààla muntu, bu Mupròfetà. Wàkashààla muntu, bu Mwakwidi. Wàkashààla muntu, bu Mfùmù; Mfùmù wa mu Dyulu, Mfùmù wa bansantu, Mfùmù wa Cyendèlèlèlè; misangu yònsò ùvwa ànu Mfùmù, ke wíkala misangu yònsò ànu Mfùmù, Mfùmù wa Cyendèlèlèlè.

325 Mpindyewu mònaayi, pashiishe, Yòzefù. Kumpàla kwà Yòzefù kupatukaye, bivwa bikèngela kwanjibu kwela mpungi, dyàmbedi. Ne bantu bàvwà beela mbila mikolè ne: “Twayi cinù panshi bwà Yòzefù.” Civwa muntu wenza nànsha ciikale cinyi, ní uvwa usumbisha cintu kampànda mu mùsèsù, pàvwà mpungi awu udila, ùvwa ùtwa cinù cyèndè panshi. Muntu ùkaavwa pabwipi ne kwolola cyanza bwà kwangata mfranga, kàdi ùvwa ùtwa cinù cyèndè panshi, Yòzefù ùvwa munkaci mwà kulwa. Kaa! Kùdi mwen-. . . mwen—mwen—mwenji wa bikasa ní ukaavwa wamba kwenza cikasa cyèndè aci, kàdi ciikalaye mwà kwenza ncinyi? Bivwa bikèngela bwà kwimanyikaye. “Yòzefù nyèyè awu ùlwa.” Mpungi kudilaye.

326 Dimwè dyà ku matùkù adi panshi àà, bintu byònsò, nànsha cikondo, nebiimane. “Pààdilà mpungi wa Nzambi awu, ne bafwè mu Kilistò nebàbiikè, ne dindà dibwayika dyà Cyendèlèlèlè, dyà dibàlakana ne dilenga kumòna.” Byònsò nebitwe cinù panshi. “Cinù cyònsò necitwe panshi, ne ludimi lwònsò nelùCijikulè.”

Bangaayi mpindyewu. “Mpèkaatù yà bàmwè bantu yitu yidyanjidila, yimwè yilonda.”

327 Kàdi mpindyewu mònaayi cyàkenzekà aci. Mùshindù mwine ùvwàci cyà butùmbi's wè! Dìbà adi pàvwà Yòzefù. . . paanyimà pàà yèyè mumane kusela muntu wa Bisàmbà byà bendè ne mupete dikù, Efàlàyimà ne Maanàsè, bânà bèndè bàà balùme. Nukààvwaku bamòne ku ndekeelu anyi? Pàvwà Yòzefù. . . Yakòbò kubanga kubènesha Efàlàyimà ne Maanàsè. Mmwenze ànu ubanga kutenteka byanza byèndè anyi, kutèekaye Efàlàyimà ku dyàbalùme, Maanàsè ku dyàbakàji, bwà ne cyanza cyà balùme aci cibèneshe mukulumpe. Kàdi mmwenge ànu ubanga kusambila, byanza byèndè kucyàmakanabi, nènku kupeeshaye

mwânà mukesè menemene awu dibènesha dyà cyanza cyà balùme pamutù pàà ewu uvwa usanganyiibwa ku dyàbalùme awu.

<sup>328</sup> Ki Yözefù kwamba ne: “Kabyèna nàнку to, Taatù.” Yèyè ne: “Wèwè’s udi mutèèke dibènesha pa Maanàsè pamutù pàà Efàlàyimà.”

Ki yèyè ne: “Nzambì gudi mucyàmàkaje cyanza cyànyì.”

<sup>329</sup> Cinyì? Kuumukila ku beena Yuda, bakulumpe menemene abu, basungula bàà nzànzànzà bàà Nzambì, ku Nkùruse dibènesha kulwadi kùdi bàà Bisàmbà byà bendà, bwà kupeta Mukàji-musèla. Dibènesha ndilwile ku Nkùruse, kuumukila kùdi beena Yuda kuya ku bàà Bisàmbà byà bendè. Mubèngiibwe, bààkabenga Nkùruse, ki bwà cinyì Yèyè wàkapeta Mukàji-musèla wa Bisàmbà byà bendè.

<sup>330</sup> Mpindyewu pàvwà Yözefù, kumpàlà kwà cyòci eci, pàvwàye...mumvwe bwà bânà bààbò, bàvwà...Bàvwa pambelu pàà bwobùmwe munda mwà bidimu byàbùngi, beena Yuda abu.

<sup>331</sup> Mpindyewu tàngilàayi. Tudi munkaci mwà kwalukila ku Zekàayi mpindyewu, mwàkatwàbu mikemu amu, ne kwasa myadi ne kutwà mikemu. Nèngu nànsha mèkù neàtapuluke ôwò miine ne makwàbò mèkù, kupatuka, bàmba ne: “Tudi bacyènzè bishi? Mmunyì mutùdi mwà kwikala bacyenze’s?” Pààkambabo ne: “Ebi bibangu Udi mubipetèle penyì, bishidilu bìdi mu byanza Byèbè abi’s?” nànsha bààkaMutwà difùmà abu mene. “Yèyè neàlwe mu matutu. Nèngu nebàMumòne, nànsha mene bààkaMutwà difùmà abu. Nèngu nzùbu yònsò neàse mwadi, ne nebàtwe mikemu.” Kabààkumanya cyà kwenza to.

<sup>332</sup> Nèngu pàvwà Yözefù...Nudi bamanye bwalu-bulonda abu’s. Pààkamònaye bânà bààbò, ki kwenzaye bu ne kàvwa mwà kwakula cyena Ebèlu to, ki kukebaye mwandamunyi bwà kumwandamvwinaye. Nèngu kavwa mwà kwakula cyena Ebèlu to, kwenzaye bu nàngu awu’s; kàdi’s ùvwa ùsua kujandula. Nèngu ki ndekeelu wa byònsò, dīngà ditùkù, pààkatwàlábò mwakunyèndè wa balùme mutekète awu, nukaavwaku bamòne anyi? Ùvwa m’Benyàminà wàkasalula musùukà wà Yözefù awu’s?

<sup>333</sup> Ncinyì aci, leelù ewu, cùkalà mwà kusalula musùukà Wèndè, Yözefù wetù, Yesù? Èkéleeziyà wa citende udi mu Iran mwàmwa, udi mulamè mikenji yà Nzambì awu. Nèngu mbantu balediibwe pashìishe bàdi badikungwije mu Palestine, ne baalujuludiibwe cyàkàbìdi. Mùtootò wà Davidi wà matumba àsambòmbò awu, dibendela dyà kale ne kale dyà pa buloba, ditunga ndilediibwe mu ndambù wa bidimu bishààle ebi. Ki Izàlèlèlà nyèyè awu’s.

Matùngà àdi àpanduluka, Izàlèlèlà nyewu ùtàbuluka,

Bimanyinu byàkadyànjlà Bible kwamba;

Matùkù à bàà Bisàmbà byà bendè mmabala ku byanza, mùle tètè ne bintu bìdi bikwàcishà bwôwà;

“Alùkilaayi, Éyì nwènù bàdi batàngalàjìibwe, kùdì beenu sungasunga.”

Ditùkù dyà bupikudi dikaadi pabwîpi, Myoyi ya bantu ki kufwayi ne bwôwà eku; (Anji citàngilaayi ànu’s, nyawu bônso bashààle banyunguluke mitù.)

Ujìibwà ne Nyumà, mwëndù wèbè mulongolola kakùyi dikàla ne musukula, Bàndulukà! Bupikudi bwèbè bùkaadi pabwîpi.

Bapròfeta bàà mashimi bàdi bàshima, bàdi bàvila Bulelèlè bwà Nzambì,

Bwà ne Yesù Kilistò awu ki Nzambì wetù to; (Butùmbi’s wè!) Kàdi Dibuulula ndilwe’s.

Pa nàнку netwèndeke myaba yìdi bapostòlò badyacile. (Ànu mu mwaba wàbo ùmwèùmwè awu menemene.)

Bwalu ditùkù dyà bupikudi dikaadi pabwîpi,

Myoyi yà bantu ki kufwayi ne bwôwà eku’s;

Ujìibwà ne Nyumà wa Nzambì, mwëndù wèbè mulongolola kakùyi dikàla ne musukula,

Bàndulukà! Bupikudi bwèbè bùkaadi pabwîpi.

<sup>334</sup> Kaa! Kaa, Yözefù, pààkamònaye Benyàminà mutekète mwimane mwaba awu! S’ki mwakunyèndè wa balùme awu’s. Nudi numòna Benyàminà mwànà awu mpindyewu kuntwaku...?..kwàka naka, musòmbe mwaba awu anyi? Bifuku byà—byà buloba, byà beena Yuda, kwalukilabi mwaba wíkala binunu lukama ne makumi anaayi ne binaayi bààbò biimane awu, bwà kwakidila Kilistò pààMumònàbò Ülwa. Bòbò nebàmbè ne: “Mònaayi, ewu s’ki Nzambì wetù Utùvwà bindile awu’s.” Dìbà adi nebàmònè mutwibwe difùmà awu...“Ebi mbilwe penyì?”

Yèyè ne: “Mu nzùbu wa mulunda Wanyì.”

<sup>335</sup> Nènku nebàtwe mikemu ne nebàdilè. Ne dìkù dyònsò, bifuku byàbò byà Davidi ne Nefàtàlimà ne bònso, nebiikalè batàpuluke bòbò biine, dìkù ne dìkù dyònsò, ne bàdididila pààMumònabo mwimane mu mpeepèlè, Ewu wàkatwàbo difùmà awu.

<sup>336</sup> Mukenji Wendè newikale cinyi? Tàngilàayi cyàkamba Yözefù. Pààkambàye. . .

<sup>337</sup> Tangilaayi cikwàbò cintu. Pààkapeta Yözefù bânà kumpàla kwèndè, yèyè kubàtàngila, kumònaye Benyàminà mutekète awu. Yèyè kumòna Efalàyimà, kumònaye bakwàbò abu mwaba awu, Gaadà ne bònso baa kùdìbo. Nènku bifuku dikumi ne bibidi,

bifuku dikumi abi musangu awu, biimane kumpàla kwèndè. Kubàmònyè bònso biimane mwaba awu. Ùvwa mumanye ne bavwa mbàna bààbò. Kàdi kutàngilaye Benyàmìnà mutekète awu, dyàkamwè, cyà mu dibòdi kumba kumupata. Kumanyaye ne mbàna bààbò. Cyàkambaye ncinyi? “Bantu bònso banshiile kaaba.” Cyàkenzekelà mukàjèndè ne bàna bèndè ncinyi? Bòbò kubwela mu nzùbu wa bukalenge.

338 Èkèleeziyà wa bàà Bisàmbà byà bendè neàye penyì mu Dyambwibwa? Mu Nzùbu wa bukalenge. Mukàji-musèla, Àlèluuyàh, Mukàji-musèla neùmushiibwe pa buloba, uya mu Dyambwibwa. Pashiishe pàalukilàYe, Mukàj’Èndè-musèla kààkwikalakù pàdiYe ùDimanyisha kùdi bàna Bààbò, beena Yuda nànsha, bàvwà baMutwè difùmà abu, bàvwa baMubenge abu.

339 Kàdi mukàjèndè ne munanga wendè awu, balunda bèndè bàà pa mwoyi abu, ba—banyàwendè batuma kùdi Nzambì, bàvwa mu ntempelu. Nènku mmwenze ànu utàngila anyi, kwambaye ne bàvwa . . . Kabàvwa bamanye to. Kwambabò ne: “Kaa, mfùmù munène ewu’s wè!” Kubangabò kwambilangana, umwe ne mukwèndè, kaa, bwà bintu bivwàbò benze abi.

340 Ngeela meeji ne ùvwa ng’Efàlàyimà, anyi kì ng’Efàlàyimà to, kàdi ndi mupwe ne mwoyi ni ùvwa nganyi mene mpindyewu, wà—wàkamba ne: “Èè, kabìvwa bikèngela bwà twètù kwikala bashipe mwanèètù, Yòzefù to.” Yéyè ne: “Udi umòna’s, tukaadi munkaci mwà kufuciibwa.” Luubènà, Luubènà kwamba ne: “Kabìvwa bikèngela twètù kwikala bashipe mwanèètù to,” yéyè ne: “bwalu, nudi numòna’s, tudi munkaci mwà kufuciibwa bwà bitùvwà benze.”

341 Nènku Yòzefù mwimane mwaba awu; kabàvwa beela meeji ne ùvwa mwà kuumvwa cyena Ebèlu to. Kàdi’s yéyè ùvwà mucimanye.

342 Bàmwè beela meeji ne, kèna mwà kwakula . . . kuumvwaku dyakula dyà mu myakulu to, kàdi’s Yéyè mmumanye byònso abi. Èyowà, Yéyè mmumanye. Bukalenge bwà bàà Bisàmbà byà bendè bwàkabanga ne dyakula dyà mu myakulu ne dyandamuna, mu mutù wa ngòlò (mutù wa kumpàla) kumpàla kwà kupònwù. Cyàkajikijà cipungu cyà kumpàla cyà bàà Bisàmbà byà bendè aci ncinyi? Mufundu wa mu myakulu myenyi ku cimanu, ne muntu mwaba awu uvwa mwà kuwùmwija ne kwamba ne ncikampànda. Bidi bipatuka mùshindù wùmwèwùmwe awu. Amen. Bìbwela ne bìpatuka mùshindù wùmwèwùmwe awu.

343 Bavwa beela meeji ne kàvwa mwà kuumvwa myakulu yìvwàbo bàakula ayi to, kàdi’s ùvwa muyimanye. Bòbò ne: “Nudi numòna citùdi bapete anyi?”

Nènku ki Yòzefù dîbà adi kumònyaye ne bàdi banyingalala bwà cìvwàbo benze aci’s.



344 Mpindyewu Ûdi umòna cinyongopelu ne kanyinganyinga bwà muùvwàbo baMubenge, pa nàнку Yèyè mMulengùibwe ne muminu Wèndè mmupate mpindyewu. Ûdi pabwipi bwà kutangalaja Èkèleeziyà Wèndè pa buloba, kuMubweja mu Butùmbi. Pashiishe kwalukila, ne díbà adi bifuku byònsò byà pa buloba nebyase mwadi.

345 Bààkenza cinyi? Luubènà, bònsò bwàbù, bààkabanga kwela mbila, kwambabò ne: “Kaa! Kaa!” Kuumvwabò bwòwà ne kwambabò ne: “Ewu’s n’yèyè. Bwà mpindyewu kaayi tudi tusuna tudyàmbika’s. Mpindyewu yèyè’s neàtushipe. Mpindyewu yèyè. . . Tudi bamanye ne netùbutudiibwe mpindyewu mene, bwalu n’Yòzefù uwva kule neetù kukaadi ntàntà awu. S’n’Yòzefù, mwanèètù awu, bwà mpindyewu kaayi tudi tusuna tudyàmbika’s.”

346 Yèyè ne: “Kanufìkidyanganyi munda to. Nzambi ngwakenza cyòci eci bwà kunùpàndisha.”

347 Cyàkenza Nzambi ncinyi? Bwà cinyi beena Yuda bààkabenga Yesù? Bwà twètù bàà Bisàmbà byà bendè, bwà ne, bantu bààkabiikilàYè bwà bwalu bwà Dìnà Dyèndè abu, Nzambi wàkacyenza bwà kupàndisha mwoyi wà Èkèleeziyà wa bàà Bisàmbà byà bendè, Mukàji-musèla.

348 Bifuku byònsò byàkaMubèngà abi nebyase mwadi. Nebàdisokokè mu nyòngòlo, ne mu mbwebwe, ne bikwàbò, bàmba ne: “Tusokòkaayi, tùpònènaayikù, nwènù mikuna.” BààkaMubenga, Yèyè. Bisàmbà byà pa buloba nebidilè mwadi bwà bwalu Bwèndè. Nènku dikù ne dikù mu Izàlèlèlè nebiikè batàpuluke. Mèkù neàtapulukè, dimwè ne dikwàbò, bàmba ne: “Cituvwà bacyènzèle ncinyi? Mbitùfikile munyi bwà kuMubèngà? Munyi’s? Ki Yèyè udi mwimane wàwa’s. Ki Nzambi Utùvwà bindilèndile wàwa. Kàdi’s ki Yèyè awu, mwikàle ne bibangu byà mputà yà misonso mu byanza Byèndè, kàdi twètù’s ke bààkacyèna.”

349 Ki cyòci aci menemene ciwva bânà bèètù abu bàmbe ànu mwaba awu mene’s, pààkaalukilabo e kwamba ne: “S’ki Yòzefù, utwàkasùmbisha awu’s.”

Yèyè ne: “Mémè ndi Yòzefù, mwanèènù, unwàkasùmbishà mu Ejiipitu awu.”

350 “Kaa!” Bàvwa ne bwòwà. Nènku bavwa munkaci mwà myadi ne batwa mikemu, bàdyèla muntu kùdi mukwèndè ne: “Citùdi mwà kwenza ncinyi’s?”

351 Yèyè ne: “Kanudifìkidi munda to, bwalu Nzambi nguvwa mwenze byònsò ebi. Nzambi nguvwa muntume kumpàla.”

352 Nzambi ngwàkafuka bantu bònsò; batòòke, bafiike, bafiikuluke, bàà kalaabi, muntu yònsò. Nzambi ngwàkafuka muntu yònsò wendenda ewu. Wàkafùka muntu wa Bisàmbà byà bendè, kufùka mwena Yuda. Wàkafùka bwònsò. Byònsò

bìdi bwà butùmbi Bwèndè. Ne byàkakèngela bwà beena Yuda kubèngiibwabò bwà kwangata Mukàji-musèla wa bàà Bisàmbà byà bendè.

<sup>353</sup> Ki bwà cinyi bifwànyikijilu byònsò ebi bìdi nàнку. Bwà ne Mukàji-musèla wa bàà Bisàmbà byà bendè ne ndelàngànyì Yèndè, Èkèleeziyà wa butùmbi wa cyena mpenta awu musukula mu Mashi a Mwànà wa mùkòòkò, ne bukolè bwònsò bwà dibìika dyà ku lufù busòmbèle munda mwàbo, neàbiike dīngà ditùkù mu Dyambwibwa (mu katanci, mu mubùnyì wà dīsù) bwà kuya kashàala mu Bwikadi bwà Yesù, pàdiYe wàlukila (ne utangalaja bintu byònsò) bwà kuDimanyisha kùdi bàna Bààbò.

<sup>354</sup> Tàngilàayi cìdi Mufùndu wàmba mwab'ewu, bwà kujikija. Kaa!

*Mònaayi, yèyè ùdi ùlwa ne matutu; ne dīsù dyònsò nedimùmònè, (mpindyewu ùdi wàkula bwà Dilwa diibìdi, kī n'Dyambwibwa nànsha), ne aba bààkamutwa difuma kàbìdi: . . .*

<sup>355</sup> Nshapità wa 7, mvensa wa 1 . . . Anyi, mvensa wa 7 wa nshapità wa 1.

*. . . dīsù dyònsò nedimùmònè, ne aba bààkamutwa difuma kàbìdi: ne bifuku byònsò byà pa buloba nebítwe mikemu bwà bwalu bwèndè. Amu nàнку, Amen.*

<sup>356</sup> Pashiishe Ùdi uteela diyì dyamba dinène adi. Ewu nùнку nganyi's? Nganyi Ewu udibo ne cyà kwindila's?

*Mémè ndi Alpha ne Omega, ndi A ne Z, (A wa cyena Ngelika ne Z, alphabèt wa cyena Ngelika) . . .*

<sup>357</sup> Byenzedi 2:36, kùdi . . . Peetèlo wàkamba ne: “Kakwèna dīngà dīnà difila mwinshi mwà Dyulu dīdì bantu ne cyà kusùngidiibwaku to.” Anyi, to, mfwilaayiku luse; ndi mucitèèle bibi's. Wàkamba ne: “Nzùbu yònsò wa Izalèèlà àmanyè bulelèlà ne, Nzambi mmwenze Yesù umwèumwe ewu, unùdi bapoopèlè pa nkùruse ewu, byònsò bibìdi Mukalenge ne Kilistò.”

<sup>358</sup> Yone 14:7 ne 12, Toomààsè wàkamba ne: “Mukalenge, tùleejè Taatù, aci necitùsànkishè.”

<sup>359</sup> Yèyè ne: “Mémè ndi neenù ntàntà mule be, kàdi wèwè kwèna mummye anyi?” Yèyè ne: “Ewu udi muMmòne mmumònè Taatù. Bwà cinyi udi wamba ne: ‘Ndeeye Taatù’? Mémè ne Taatù Wanyì tudi Umwe.”

<sup>360</sup> Mémè kwambila muntu kampànda cyòci aci musangu kampànda. Inábànzà awu kwambaye ne: “Anji indila kakesè, Mukalenge Branham.” Yèyè ne: “Wèwè ne mukàjèèbè's nudi umwe, nwènu pèenu.”

Mémè ne: “Kàdi aci kī mmu mùshindù awu to.”

Yèyè ne: “Mfwileku luse.”

Mémè ne: “Udi mummòne anyi?”

Yèyè ne: “Ndi mukumòne’s.”

Mémè ne: “Udi umòna mukàjàànyì anyi?”

Yèyè ne: “To.”

<sup>361</sup> Mémè ne: “Dìbà adi, Bòbò’s bàdi mu mùshindù mushiilàngàne’s. Yèyè ne: ‘Paùdi uMmòna, wàmònu Taatù.’” Pa nàнку aci civwa cikumbane bwà cyòci aci.

<sup>362</sup> Pa nàнку mu Yone Munsantu, anyi mu Yone wa Kumpàla 5:7 too ne ku 8, nwènù bònsò bàdi bàcìfùnda abu. Yone wa Kumpàla 5:7 too ne ku 8, Bible ngudi mwambe. Mwakudi awu, muntu ànu umwèumwè wákafùnda Dibuulula divwà Yesù mumupe edi, wákamba ne: “Kùdi bàsàtu bàdi bàfila bujaadiki mu Dyulu: Taatù, Dìyi (Dìyi s’ki Mwànà). . . Taatù, Dìyi, ne Nyumà Mwímpè, ne bàsàtu aba bàdi umwe. Kùdi bisàtu bìdì bifila bujaadiki pa buloba: màyi, Mashi, ne Nyumà, ne bìdi bipetangana; kì ne bìdi cintu cimwè to, kàdi bìdi bipetangana mu cimwè.”

<sup>363</sup> Kwèna mwà kwikala ne Taatù kùyì ne Mwànà to. Kwèna mwà kwikala ne Taatù anyi Mwànà kùyì ne Nyumà Mwímpè to. Cyà bushùwà. Kàdi wèwè. . . Nènku màyi, Mashi, ne Nyumà, s’ki bintu bìdì bìkèngela bwà kubwela mu Mubidi Wèndè mbyòbì abi.

<sup>364</sup> Pàdi dilediibwa dyà mu mubidi dyènzeka, ncintu kaayi cyà kumpàla cìdì cyenzeka pàdi mukàjì ulela mwànà? Cintu cyà kumpàla, mmàyi. Cintu ciibìdì, mmashi. Neyà bushùwà anyi? Cintu cìdì cìlondà, n’nyumà. Mwànà ùdi ubakula mweyelu wèndè, utwadija kweyela. Màyi, mashi, ne nyumà, kì bìdì byenza dilediibwa dyà mu mubidi.

<sup>365</sup> Kàbìdì, Dilediibwa dyà mu nyumà. Dibatiiza dyà mu màyi mu Dìna dyà Yesù Kilistò; dibingishiibwa ku diitabuujà, kwitabuujà Mukalenge Yesù Kilistò. Màyi! Cìdì cìlondà ncinyì? Mashi; dijidiibwa, disukula, dimupàtula.

<sup>366</sup> Ki mwaba ngwòwò awu unùdì nwènù ba-Nazaréens bapangile’s; nudi baye ànu too ne mwaba awu kàdi kanùyì batàmbe kuya kule to. Dibungu didì dijidiibwe pa cyoshelu, dilongolola bwà mudimu, kàdi kadyèna ku mudimu to. “Bàà disànkà ng’aba,” masànkà, “bàdì ne nzala ne nyoota yà bwakàne, bwalu bóbò nebuukucishiibwe.” Dibungu ndijidiibwe. Aci’s mbulelèlà.

<sup>367</sup> Aci’s cìdì ànu bu virgo. Mwaku ewu *virgo* ùdi umvwija ne “mukezùke, wa cijila, kàyì musopakaja to, mujidiibwe.” Yìtaanu yìvwa ne maanyi, ne yìtaanu kayìvwa ne maanyi to; yìtaanu yìvwa myùjìibwe, ne mikwàbò ayi yìvwa ànu kacya yàshààla mu dijidiibwa’s. “Nukaadi bapete Nyumà Mwímpè *kacya* nwìtabuujà anyi,” nwènù ba-Baptistes, ba-Presbytériens?

“Katwèna bamanye mene ne Nyumà Mwímpè ùtukù to.”

“Àpu, nwàkabàtìijibwa mùshindù kaayi’s?” Uh-huh.

368 Paanyimà pàà yéyè mumane kubatentekela byanza, bavwa díba adi, paanyimà pàà bamane kusungidiibwa ne kujidiibwa, bààkuujiibwa tente ne Nyumà Mwîmpè. Cyà bushùwà.

369 Mâyì, Mashi, Nyumà! Yesù wàkalwa bwà kwowesha mâyi ne kukezula, ne bwà kujidila Èkèleeziyà, bwà Wàmòna mwà kulwa ne kusòmbelamù. Ne Mashi Èndè Yéyè mwine; Yéyè wàkafila Mashi Èndè Sungasunga malela à kùdì Nzambì, bwà Wàmòna mwà kutukezula ku dilediibwa dyètù dyà ku disangila dyà mulùme ne mukàjì adi, ne kutupa lupanza lujidila, lwà cijila bwà Yéyè mwine kulwamù.

370 “Katancì kakesè aka, bàà pa buloba kabààkuMmòna kàbìdì to; kàdì nwènù nenùMmòne bwalu Mémè,” mupinganyi muleeji muntu, “nèngiikale neenù, munda mwènù mene, too ne ku ndekeelu kwà dikùmbana dyà maalu ònsò.” Amen. “Too ne ku ndekeelu, Mémè nèngiikalè neenù ne munda mwènù. Byenzedi bìndì Mémè ngenza nenùbyenzè pèenù. Bimanyinu ebi nebifile bàdì bìtabuuja.” Nzambì mu Èkèleeziyà! Kaa, ekèlekèle! Bunzambì! “Kùdì basatu bàdì bàfila bujaadiki mu Dyulu: Taatù, Dìyi (Mwànà), Nyumà Mwîmpè. Bàdì Ùmwe.”

371 Mpindyewu, udi mwà kusungidiibwa kùyi mujidiibwe to. Udi mwà kwikala mujidiibwe kàdì kùyi ne Nyumà Mwîmpè to; cyà bushùwà, nyumà mujidila, kùyi mùjiibwe tètè to. Dijidila dyà mwoyi wèbè, dikezula dyà mwoyi wèbè, kawùyi ùjiibwa tètè ne cintu kampànda to. Ki cyàkambaYe ne: “Pàdì nyumà wa bukooya ùpàtuka munda mwà muntu awu, ùdì wèndakana mu myaba myùmè. Wàlukila, usangana nzùbu wèndè awu mulengeja yònsò, kàdì kubwelamù. Ngiikadilu wa ndekeelu wa muntu awu ùdì misangu yàbùngì, misangu mwandamutekète, mutàmbe kubìpa kupita muvwabi ku cibangidilu amu.”

372 Ki cyàkanwènzekelà nwènù ba-Pèlerinins de la Sainteté, ba-Nazaréens, ne bakwàbò. Nwènù kwitaba. Nènku pàkalwa Nyumà Mwîmpè, kubanga kwakula mu myakulu, ne kufila bimanyinu ne maalu à kukèma, nwènù kucibìikila ne “ndémon” ne kupenda byenzedi byà Nzambì, kubìbìikila ne “nnyumà wa bukooya.” Kàdì nudi bamòne kwàkaya èkèleeziyà wenù anyi? Pàtukàayi munda mwèndè! Dìbà ndyèdì, Dibuuulula dyà Yesù Kilistò didi munkaci mwà kulongeshiibwa, Nzambì ngwàkabuuulula mu bukòlè bwà dileeja Dyèndè dyà patòoke dyà Nyumà Mwîmpè. Amen. Ditùkù dyà bupikudi dikaadi pabwipi.

373 Mpindyewu, Bunzambì munda Mwèndè, Timòte wa Kumpàla 3:16.

*...kakùyi dikòkangana to bwalu busokoka bwà difwànà dyà Nzambì mbunène: bwalu Nzambì wàkamwèneshiibwa mu mubidi, ...mumòna kùdì banjèlo, ...mwitabùùjiibwe pa buloba, mwakidila mu butumbi.*

374 Kaa, ànu nàнку ànu nàнку ànu nàнку's. Kàdi mpindyewu tudi penyì? Ku ndekeelu kwà mvensa wa 8.

375 Dilòlò edi tudi tubanga mvensa wa—wa 9, *Cikèèná-kumò cyà Patèmò*. Kaa, kùdi bintu binène mu cibucilu bwètù twètù's. Nudi baMunangè anyì?

Ndi muMunange, ndi muMunange  
Bwalu Yèyè wàkannanga kumpàla  
Ne wàkampetela lupàndu  
Pa mucì wà Kàlvaryò.

376 Ncyà bushùwà ne nudi nwenza nàнку anyì? Nzambì mmuDimanyishe kùdi, mubuuludiiibwe ne Yèyè ùdi Mwàná wa Nzambì, Yesù Kilistò, Nzambì mumwènèshiiibwe mu mubidi, bwà kuumusha mpèkaatù? Ùdi munkacì mwà kuDibuulula mu matùkù à ndekeelu aa mu èkèleeziyà Yèndè, uDìmanyisha.

377 Mpindyewu, bintu biine bìdi munkacì mwà kwenzeka mu Èkèleeziyà ebi, tàngilàayi numòne, ku ndekeelu kwà Mukenji ewu, Bible ne kèna wamba ne maalu aa àdi ne cyà kwenzeka, ànu mu wòwù menemene. Kumòna ní kabyàkenzeka ànu menemene, mu Cikondo cyà Efèso, ne cyà Pegàmò, cyà Twatilà, kutungunuka, mu cikondo cyònsò.

378 Kwamba mùvwà Luther mwà kwenza, ne mùvwà Wesley mwà kwenza. Ne mùshindù mwine wikalà dingumba dyà beena Mpenta edi mwà kubwela mu ngiikadilu wa Laòdikiyà, wa civùmvù ewu, kàdi, mu byònsò abi, Yèyè ùvwà mwà kukoka bantu. Ncyà bushùwà. Mmwòmò menemene. Tukaadi ku ndekeelu. Kaa, mémè's ndi ne disànkà dyàbùngì be! Nèngu, kaa, ànu mungàdimònu ngenda ncyòka, ne ntàngila balunda bàanyi ne bikwàbò, ne pa kumòna buloba ne—ne cimvundu cinènè cidibu busanganyiibwamu eci, ne pashiishe kudyambidila ne Dilwa dyà Mukalenge dikaadi pabwìpì menemene. Tukaadi ku ndekeelu wa cikondo.

379 Myoyi ya bantu yìdi yàmba kwimana bwà bwòwà. Myaba yònsò, bantu bònsò, bàdi ànu badilakana ku bisanji, dìbà dyònsò, “Ikalaayi badilongòlòle ku dibundiibwa dyà mvità yà mu lupeepèlè. Angataayi *cikampànda*, angataayi *cikansanga*, nubwele mu nzùbu wa mwinshi mwà buloba.” Mmunyi muwàsokoma aci? Kanwèna mwà kusokoma aci to. Èè, cintu aci necibwele mwinshi mwà buloba mu bwondòkè bwà metèlè makumi anaayi ne ataanu, mu bule bwà kilòmèètà nkamà yibìdi ne makumi anaayi, mu nseke yònsò yinaayi. Mòna's, munyùkunyuku wàaci newikale. . . Cyòci cilenge apa nùngu, ncifwànyine kunyukusha Indianapolis too ne mwinshì mwà buloba. Mòna's, mbifwànyine ànu kutaayisha Indianapolis kumusùsulula, kulenga mene mu Louisville emu, nwamònu's, cimwè cyà ku byòbi abi's. Mbikolè bwà kwamba cidìbo naaci pa kuumusha aci.

<sup>380</sup> Nènku, tàngila, kabyèna bikèngela bwà wèwè ku... Udi mumanye's, kabyèna bikèngela bwà Russie kwenzayè nànkù to. Cuba udi mwà kwenza nànkù. Dìna kaaba kakesè kwònsò, kaaba ka—kakesè kàà bunènè bwà Alcatraz udi kwaka wàwa, nkafwànyine kucyènza, ne cikwàta buloba bujimà. Cintu cimwèpelè cìdi cikèngela kwenza cìdi ànu kumuteeka mu njila kàdi kukoka kaanshinga kàmwèpelè. Kwèna dijinga ne cilwìlu to. Bìdi bikèngela ànu mukoleshi wa maalu umwèpelè cyanààna bwà kucyènza, mu byanza byà dyabùlù. Ncyà bushùwà menemene. Ùvwa mwà kucyènza, nènku dìbà adi cintu cyònsò mu kaabujima's ncijike. Dìbà adi kwònsò's nkumane kujika.

<sup>381</sup> Kàdi, kaa, lekèlè nkupèeshèku cintu cibènesha eci. Patùdi tumòna aci pabwìpi menemene, patùdi tumòna ne ncifwànyine kwenzeka kumpàla kwà dindà. Vùlukàayi ne, Èkèleeziyà mmumane kwalukila kumbelu kumpàla kwà aci kwenzekaci. Dyambwibwa didi dyènzeka kumpàla.

<sup>382</sup> Mpindyewu, bwà kanwikadi nwàlwa kukònyangajiibwa, vùlukàayi ne, Yesù wàkamba ne: “Ànu mwàkadibi mu matùkù à Noà, ànu mwàkadibi mu matùkù à Lotà.” Vùlukàayi ne, kumpàla kwà mvula kanà yònsò ewu kumatayè, Noà ukaavwa mu bwàtù. Nwamònu anyi? Noà ukaavwa mu bwàtù. Wàkangaciibwa, ku cyòci eci. Nènku mpindyewu, Noà uvwa cimfwànyì cyà beena Yuda. Kàdi Henoka wàkaalukila kumbelu kàyi mufwè to. Nènku Noà mmwenze ànu ùmòna Henoka uya, kumanyaye ne civwa ncikondo, bwà kutwàdija kwenza bwatu. Ncyà bushùwà. Aci civwa ncimanyinu cyà Noà, pàakayà Henoka kumbelu apu. Nènku pàdi ànu Èkèleeziyà wa bàà Bisamba byà bendè ne cyà kuumushiibwa, dìbà adi Ùdi uDìmanyisha kùdi Izàlèlèlè. Nwamònu anyi? Ncyà bushùwà.

<sup>383</sup> Vùlukàayi ne, mu matùkù à Lotà, bu mwàkambà Yesù, kumpàla kwà kasunsukila nànsha kàmwè kàà kapyà kulengaku buloba, Mwanjèlo awu wàkamba ne: “Lwijakaja. Ambuluja. Patuka mwab'ewu, bwalu ncyèna mwà kwenza cintu nànsha cimwè paùdi kuyi mwanji kuumuka apa to.” Kumpàla kwà kapyà kanà kònsò kulengakù, Lotà ne dìkù dyèndè bavwa bamane kupatuka bayè. Pa nànkù, Dyambwibwa nedilwe kumpàla kwà Dikenga dinène kubweladi.

<sup>384</sup> Dikenga dinènè, bantu bààbùngì bàtu babwejakaja aci's. Netùcìlongòlòle, lumingu elu, byàswà Mukalenge, ku dikwacisha dyà Mukalenge. Vùlukàayi ne, nudi bindile Cikondo cyà Dikenga dinènè, civwa ne, bu nwènu mwà kucifwànyikija mu Bible, civwa mmatùkù à lutàtù à Yakòbò, nudi numòna's, pàakatacishiibwàye. Aci kacivwa citangila bàà Bisàmbà byà bendè to. Bàà Bisàmbà byà bendè kabèena ne cyà dyanza naaci to. Kakwèna cifwànyikijilu mu Bible bwà aci to. Èkèleeziyà wa bàà Bisàmbà byà bendè mmwambwibwe.

<sup>385</sup> Ne nwènu nudi nukeba bwà “màyì àndamuke mashi,” ne

bintu byà mùshindù awu. Aci cidi cyàlukidila kàbìdì Izalèèlà, kuntu kwaka ne Mòsà ne Eliyà, pàalukilabò. Eliyà, bwà musangu mwinâyì, ùdi wàlukila mu nyumà. Nànsha umwe wa ku bôbò abu kààkafwà to, anyì, Mòsà wàkafwà, bôbò kabààkamanya mwaba wàkajiikiibwaye to. Úvwa ne cyà kwikala mujuke mwaba kampànda pankaci pàà cikondo aci ne mwaba awu, bwalu, pa Mukùnà wà Dikudimuka dyà mpàla, s'ki yèyè awu, uyiikila ne Yesù, kì mmwómò anyì? Nwamònu anyì?

<sup>386</sup> Pa nàнку nebàalukile ne nebàshebeyiibwè, ne nebàlàlàadikè mu mùsèèsù wà nyumà awu wùdìbò babiikila na “Sodoma,” mùvwà Mukalenge wetù mupoopèdiibwe pa nkùrusè, Yelusàlèmà. Bôbò nebâyishè beena Yuda, ne nebèlè buloba milawu, ne nebàkangè maulu, ne bikwàbò byà mùshindù awu. Nènku ndekeelu wa mudimu wà bwambi wà bàà Bisàmbà byà bendè neùtungunuke ne neùswikakanangane ne cyôci aci, ne bàà Bisàmbà byà bendè nebàye kumbèlu, ne mudimu wà bwambi awu newùtungunukè. Kì kwikala kabutu kàà bintu byònsò. Byàbisàtu bibìdì byà bàà pa buloba nebifwe, ne bikwàbò byònsò. Pàvwà mibidi mifwè ayi milàadika mu mùsèèsù amu, munda mwà matùkù àsàtu, tàngilàayi numòne ne civwa ncinyi.

<sup>387</sup> Tàngilàayi bimfwànyì ebi bìndì mmupete bifumina ku Àmèrikè wa ku Sud, pàakashipabo missionnaire wa cyena Mpenta awu mwaba awu, mukàjèndè, mwadija mu mùsèèsù, ne yèyè ne bânà bèndè bakesè bàbìdì. Mwànà mukesè wa bakàji, ne kafù kèndè kakesè aku kuulakane mùshindù awu. Kabàvwaku nànsha baswè kubajiika to. Bavwa babapicila ku luseke, babatwila mate mwab'awu mùshindù ewu, munda mwà matùkù àsàtu anyì anaayi. Mwanèètù Kopp kukwàtayè bindìdimbi. Ndi naabi kumbèlu, nwamònu's, mùshindù ùdìbò benza's.

<sup>388</sup> Pashiishe bàdi bàtùminangana mapà, ewu ne ewu. Tàngilàayi mùdì aci cifwànyìkijiibwe mu Bible, nudi numòna ne ng'èkèleeziyà kaayi wikala mwà kwenza aci. Ncyà bushùwà, pabwìpì menemene, ne kubwela buludi bu nyoka mpindyewu mene, ànu ne budimù muvwabo naabu amu, cimanyinu cyà bintu mpindyewu mene.

<sup>389</sup> Tàngilàayi cipròfetà cyàkampà Mukalenge mu cidimu cyà '33, muvwaci mwà kwenzeka ne: “Mbafwànyine kwitabila bakàji bwà kwenzabo masungulangana. Mu dyela dyà tukàndà, bôbò nebàsungule muntu udi kàyi ùkengediibwa to.” Bintu mwandamutekète byàkafidiibwa, ne bitaanu byà ku byôbì bikaadi byenzèke. Cintu cìvwa cìlondà cìvwa mmukàji munène, èkèleeziyà, bukòlè kampànda anyì cintu kampànda, cìvwa mwà kwangata États-Unis ewu, bwà kukòokèsha. Pashiishe mèmè kumumòna mwenze bu butù, butangalaja, mwaba wàkafikaye ku ndekeelu. Cìvwa ncikondo cyà nshìikidilu.

<sup>390</sup> Cyàkamba ne: “Nekwikale màshinyì ikalà mwà kwenda.

Kabyàkukengela kwikala ne mwendeshimù to.” Bààfumu ku diàpwàngaja. Kwambaci, bidimu dikumi ne cimwè . . .

<sup>391</sup> Nyumà Mwîmpè kungambilaye. S’ki cyôci aci pa dibeji. Kwêna mwà . . . Kacyèna mwà kuvidiibwa to. S’ki cyôci aci pa dibeji, ànu bu mwàkambà Nyumà Mwîmpè amu.

<sup>392</sup> Bidimu dikumi ne cimwè kumpàla kwa Cimanu cyà Maginot kwibakiibwaci, Mêmè ne: “Beena Allemagne . . . Àmèrikè neikalè ànu . . . Mfùmù wa ditùnga Roosevelt ki wikalà mucimbàkàne wa ku bônso.” Nènku ncyà bushùwà. Ki cìvwàYe.

<sup>393</sup> Ki nkunutapa ku mwoyi nwènù ba-Démocrates to, kàdi ndi—ndi nzwambila. Kí Démocrate anyi Républicain mpindyewu to. N’Yesù Kilistò, Mwànà wa Nzambi, utùdi twamba ewu. Mêmè ncyèna ní Démocrate anyi Républicain to. Mêmè ndi mwena Kilistò. Nènku dîbà adi, bôbò, cyônsò cìvwàku aci, kàdi nudi numòna mwaba awu’s.

<sup>394</sup> Kàdi tàngilàayi kuneeku, ditùkù adi, bu nwènù baswè kumòna mùdibu musùmbà wa bavile diitabuuja. Bàngata màshinyi awu ne baàlongolola, bwà ne, musangu wônso wùdi mufwányine kwelela Mukalenge Nixon tukàndà awu, uvwa ne cyà kwelela mulumyana mukwabo ewu, ànu musangu ùmwèumwè awu. Ed- . . . J. Edgar Hoover kupàtulaye màshinyi awu. Mbanganyi bakaadiku bacibale? Mòna’s, cyà bushùwà, byônsò’s mbifundiiibwe mu bibejibeji byônsò nkông, nguumu, ne bikwàbò byônsò. Nudi bamòne kutwafiki anyi?

<sup>395</sup> Kakucyèna cikwàbò cintu cyà meeji matòoke to pa kuumusha ànu Kilistò. Amen. Kaa, Mukàndà mubènèshiiibwe wà kale awu! S’ki Cyôci aci’s. Ki Umwèpelè ùdi ukwambila ne wèwè udi nganyi, kùdi mufùmìne, ne kûyaaya (Èyowà’s, mukalenge.), m’Mukàndà mubènèshiiibwe wà kale ewu, kaa, aci’s cidi cimfikisha ku diMunanga. Kàdi nwènù?

Diitabuuja mu Taatù, diitabuuja mu Mwànà,  
Diitabuuja mu Nyumà Mwîmpè, basatu aba  
bàdi Umwe;  
Démons neyizakalè, ne bangènzàmpèkààtù  
nebàtabulukè;  
Diitabuuja mu Yèhowàh didi dinyukusha cintu  
kanà cyônsò.

<sup>396</sup> Amen. Nditùkù kaayipu dinène didi kumpàla kwètu, balunda bàanyi’s! “Dibuulula dyà Yesù Kilistò divwà Nzambi mupèeshe mwanjèlo Wendè, ne mulwè ne mudijaadikile Yone, bwà byàmònaku mwà kumanyikila ku Bikondo byà Èkèleeziyà, cintu cidi mu cibucilu bwètù twètù aci.”

<sup>397</sup> Mukalenge àtùbènèshèku mpindyewu, patùdi tujuukila kuulu apa. Nènku ewu yônsò udi wimba pyano awu, utupeku cyona tûng bu wèwè mwà kuswa, *Angata Dîna Dyà Yesù Wendè Naadi*.



398 Mpindyewu tèelejàayi. Kùdi, kakùyì mpatà to, kùdi beenyi mwaba ewu munkaci mwètù mu tabernacle emu mu dindà emu. Ndi muswè bwà nubàlabulè ku byanza. Nubàbiikileku, nuye naabu mu mèènù, ne bikwàbò kàbìdì. Nènku nwàkìdileku muntu yònsò bîmpè. Ndi muswè bwà bantu bònsò biikale batwishiiibe bwà kwenza nàнку.

399 Nènku nwavùlukaayi ne disangisha neditwàdije pa dibà mwandamutekète jaajaaja, dilòlò edi. Nènku pa dibà mwandamutekète ne tusunsa makumi àsàtu, nêngàkulè pa *Cikèèna-kumòna Cyà Mu Patèmò*. Maalaba dilòlò, bu Mukalenge mwà kwanyisha, nêngàkulè pa cikondo cyà kumpàla cyà èkèleeziyà, Efèsò, cyà Cikondo cyà Èkèleeziyà.

400 Mpindyewu netwimbè *Angata Dîna Dyà Yesù Wendè Naadi*, kaamusambu kèètu kakesè kàà mu tabernacle kàà ditangalajangana naaku aku. Nènku muntu ne muntu ìmbè mpindyewu. Eyo.

Angata Dîna dyà Yesù wèndè naadi,  
Wèwè mwànà wa tunyinganyinga ne dikènga;  
Nedìkupè disànkà ne busàmbi,  
Nda naaDi kwònsò kúyaaya.

Dîna dyà mushinga, Éyì dyà bupolè be!  
Ditèkemena dyà buloba ne disànkà dyà Dyulu;  
Dîna dyà mushinga, (Dîna dyà mushinga!) Éyì  
dyà bupolè be!

Ditèkemena dyà buloba ne disànkà dyà Dyulu.

401 Mpindyewu kumpàla kwà twètù kwimba cituminyi cidi cilondà, ndi muswè bwà ba-Méthodistes, ba-Baptistes, beena Mpenta, beena Kàtòlikè, ba-Nazaréens, ba Pèlerin de la Sainteté, bwònsò kwòlola ànu cyanza cyanàànà, kulabulangana ku cyanza ne muntu kampànda udi kumpàla kwèbè, ku luseke lwèbè, lwà paanyimà pèèbè apu awu, wamba ne: “Mwena Kilistò mwena lwendu naanyì, mulunda wanyì, ndi ne disànkà dyà kwikalaku neebè kaaba aka mu dindà emu. Ndi ne disànkà dyà kwikalaku neebè mu bwòbùmwè, banyùngùlùkile maalu à Nzambi. Ndi mumanye ne tudì bapete cikondo cyà dicyònkómoka. Ndi ntèkemena ne nènnumònè cyàkàbìdì mwab’ewu dilòlò edi.” Cintu cyà mùshindù bu nàнку, panùdì nulabulangana ku cyanza ne bantu apu, kumpàla kwèbè apu, paanyimà pèèbè apu, ne eku ne eku.

Twinamina Dîna dyà Yesù, (Tumòngane dilòlò edi, Mwanèètù Neville. Tumòngane dilòlò edi.)

...makàsà,  
Mfùmù wa bamfùmù, mu Dyulu, netùMwase  
cifulu cyà butumbi,  
Pààjika lwendu lwètù.

Kaa, Dîna dyà mushinga, Éyì dyà bupolè be!

Ditèkemena dyà buloba ne disànkà dyà Dyulu;  
 Dìná dyà mushinga, Éyì dyà bupolè be!  
 Ditèkemena dyà buloba ne disànkà dyà Dyulu.  
 Too ne patwàsangilà! too ne patwàsangilà!  
 Too ne patwàsangilà ku makàsà à Yesù; (Too ne  
 patwàsangilà!)  
 Too ne patwàsangilà! too ne patwàsangilà!  
 Nzambi ikalè neenù too ne patwàsangilà  
 cyàkàbìdì!

Mpindyewu patùdì twinyika mitù yètù apa:

Too ne patwàsangilà! too ne patwàsangilà! 🐦

60-1204M Dibuulula Dyà Yesù Kilstò  
Branham Tabernacle  
Jeffersonville, Indiana États-Unis

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)